

পারা বাইবে না। ১৮৫৬ সালের মধ্যে নীলকরদিগের অত্যাচারের কথা কর্তৃপক্ষের ও কলিকাতাবাসী ইংরাজগণের কর্ণগোচর হওয়াতে সেই মনের ভাব প্রবল হইয়া উঠে। তদনুসারে ১৭৫৭ সালের জানুয়ারি মাসে, কলিকাতা হাইকোর্টের চীফ জুডিস্ সুপ্রসিদ্ধ সার বার্নেস পীকক্ গবর্ণর জেনারেলের মন্ত্রিসভাতে কোম্পানির মফসলস্থ ফৌজদারি আদালতের এলাকা বর্ধিত করিবার ও ইংরাজগণকে তদধীন করিবার উদ্দেশ্যে এক বিল উপস্থিত করেন। ইহাতে ইংরাজগণের মধ্যে আবার এক আন্দোলন উপস্থিত হয়। কিন্তু এবারে তাঁহারা কোম্পানির আদালতের অধীন হইব না, এই রবটী না তুলিয়া, এদেশীয় বিচারকদিগের বিচারপ্রাধীন হইব না, এবং ইংরাজ জুরির সহায়তা ভিন্ন তাঁহাদের বিচার হইবে না, এই বাণী ধরিলেন। ইহা কতকটা ইলবার্ট বিলের আন্দোলনের স্থায়। ইংরাজদিগের চেহর অব কমার্স, ট্রেড্‌স এসোসিয়েশন, ইণ্ডিগো প্লান্টার্স এসোসিয়েশন প্রভৃতি সমুদয় সভা এই আন্দোলনে যোগ দিয়া টাউনহলে এক প্রকাণ্ড সভা করিলেন। রামগোপাল ঘোষ প্রভৃতি ব্রিটিশ ইণ্ডিয়ান এসোসিয়েশনের প্রধান প্রধান সভাগণ এই আন্দোলনের প্রতি উদাসীন থাকিলেন না। তাঁহারা হরিশের ও হিন্দু পেট্রিয়টের সাহায্যে দেশের লোককে জাগ্রত করিয়া তুলিলেন। দেশের মান্ত গণ্য সমুদয় শিক্ষিত ব্যক্তি সমবেত হইয়া ১৮৫৭ সালের এপ্রেল মাসে টাউন হলে এক সভা করিলেন। ঐ সভাতে কোর্ট অব ডাইরেক্টর-দিগের নিকটে প্রেরণের জন্য এক আবেদন পত্র গৃহীত হইল। সে আবেদন পত্রে ১৮০০ লোকের স্বাক্ষর হইয়াছিল। কিন্তু তৎপরেই মিউটিনীর হাঙ্গামা উপস্থিত হওয়াতে তৎপরবর্তী নবেম্বর মাসের পূর্বে তাহা যথাস্থানে প্রেরণ করা হয় নাই। এদেশীয়দিগের আবেদন পত্রের দশা বাধা হয়, ঐ আবেদন পত্রের দশাও তাহাই হইয়াছিল। রাজারা বাহা ভালা বুঝিলেন তাহাই করিলেন, আবেদনকারীদিগের ক্ষেউ ক্ষেউ করা সার হইল। এপ্রেল মাসে টাউনহলে যে সভা হয়, তাহার উল্লেখযোগ্য বিষয়ের মধ্যে সুবিখ্যাত বাগ্মী জর্জ টমসন সাহেবের উপস্থিতি একটা বিশেষ ঘটনা। তিনি ঐ সালে আবার একবার এদেশে আসিয়াছিলেন। তৎপরে বোধ হয় মিউটিনীর গোলমাল উপস্থিত হওয়াতে নিজ কার্যসাধনের সুযোগ না দেখিয়া দেশে ফিরিয়া যান।

পূর্বেই বলিয়াছি এই কালের একজন প্রধান পুরুষ ছিলেন

হরিশচন্দ্র মুখোপাধ্যায়। তাঁহার পশ্চাতে রামগোপাল ঘোষ, দিগদর মিত্র, প্যারীচাঁদ মিত্র প্রভৃতি নবাবদের তদানীন্তন নেতা ও ডিরোজিও শিষ্যদের অগ্রণী ব্যক্তিগণ উৎসাহদাতারূপে ছিলেন। কাহার কাহারও মুখে এইরূপ ক্ষোভের কথা শুনিতে পাই যে রামগোপাল ঘোষ প্রভৃতিই দরিদ্র ব্রাহ্মণের সন্তান হরিশকে সুরাপানে লিপ্ত করিয়া-
ছিলেন। এ অপবাদ কতদূর সত্য তাহা জানি না; তবে তাঁহারা যে হরিশের পৃষ্ঠপোষক, উৎসাহদাতা, ও পরামর্শদাতা ছিলেন তাহাতে সন্দেহ নাই। বলা বাহুল্য যে লাহিড়ী মহাশয়ও এই উৎসাহদাতা বন্ধুদিগের মধ্যে একজন ছিলেন। মিউটিনীর হাদ্যমা উপস্থিত হইবার সময়ে আমরা তাঁহাকে বারাসতে রাখিয়া আসিয়াছি। বারাসত হইতে তিনি ১৮৫৮ সালে দ্বিতীয় বার কৃষ্ণনগর কলেজে যান।

কৃষ্ণনগর হইতে ১৮৫৯ সালে কলিকাতার দক্ষিণবর্তী রসাপাগুলা নামক স্থানে টিপু সুলতানের বংশীয়দিগের শিক্ষার জন্য স্থাপিত ইংরাজী স্কুলে দ্বিতীয় শিক্ষক হইয়া আসেন। টিপু সুলতান নিহত হইলে ইংরাজগণ যখন তাঁহার বংশীয়দিগকে বন্দী করিয়া আনেন, তখন তাঁহাদিগকে অবোধার নবাবের ছায় কলিকাতার উপকণ্ঠেই রাখা স্থির করেন। তদনুসারে রসাপাগুলা নামক স্থানে তাঁহাদের উপনিবেশ স্থাপন করা হয়। ইহাদিগকে রসাতে স্থাপন করিয়াই গবর্ণমেন্ট ইহাদের বংশধরগণের শিক্ষার উপায় বিধানার্থ অগ্রসর হন। মহা সমারোহে এক ইংরাজী স্কুল স্থাপিত হয়। যে সময়ে লাহিড়ী মহাশয় সেখানে দ্বিতীয় শিক্ষকরূপে গমন করেন, তখন মিঃ স্কট নামে একজন ইংরাজ হেড মাষ্টার ছিলেন। সে সময়ে বাহাদুর রসাপাগুলা স্কুলে লাহিড়ী মহাশয়ের নিকট পাঠ করিয়াছিলেন, তাঁহাদের মুখে শুনিয়াছি যে, প্রথম শ্রেণীর ইতিহাস, ভূগোল প্রভৃতি পড়াইবার ভার তাঁহার প্রতি ছিল; সেই সকল বিষয় তিনি এমন সুন্দররূপে পড়াইতেন যে ছাত্রগণ মন্থমুগ্ধের ছায় থাকিত। তাঁহার ভূগোল পাঠনার রীতির বিষয় পূর্বেই উল্লেখ করিয়াছি। ছাত্রেরা বুকক, না বুকক, ভালবাসুক, না বাসুক, তাহাদের মস্তিষ্কে কতকগুলি জ্ঞাতব্য বিষয় প্রবিষ্ট করাইয়া দিতেই হইবে, এ রীতিকে তিনি অন্তরের সহিত ঘৃণা করিতেন। তিনি যে বিষয় ছাত্রদিগকে শিখাইতে বাইতেন, সে বিষয়ে আগে তাহাদের কোতূহল জন্মাইবার চেষ্টা করিতেন। তৎপ্রসঙ্গে নানা কথা বলিয়া, সমগ্র বিষয়টী তাহাদের

মনের সমক্ষে উপস্থিত করিতেন ; তৎপরে তাহাদিগকে জিজ্ঞাসু দেখিয়া সেই জ্ঞাতব্য বিষয়টী তাহাদের নিকট উপস্থিত করিতেন । একবার তাহা উত্তম-রূপে বিবৃত করিয়া তৎপরেই আবার প্রশ্নের দ্বারা ছাত্রদিগের মুখ হইতে বাহির করিবার চেষ্টা করিতেন । এইরূপে বিষয়টী জন্মের মত ছাত্রগণের মনে মুদ্রিত হইয়া যাইত । ইহার ভিতরে যদি ছাত্রদিগের অন্তরে কোনও মহৎ সত্য বা উদার ভাব মুদ্রিত করিবার অবসর আসিত তাহা হইলে তিনি উৎসাহে আত্মহারা হইয়া যাইতেন । তখন আর পাঠ্য বিষয়ে মন থাকিত না । এই সকল কারণে পাঠ্যগ্রন্থে পাঠের উন্নতি আশারূপ হইত না । সেজ্ঞাত তিনি কখন কখনও কর্তৃপক্ষের বিরাগ-ভাজন হইতেন । পূর্বেই বলিয়াছি তাঁহার ছাত্রগণ পাঠ্য বিষয়ে অধিক উন্নতি করিত না বটে, কিন্তু যেটুকু পড়িত তাহাতেই ব্যাপ্তি লাভ করিত ; এবং তদ্ভিন্ন নানা বিষয়ে জ্ঞান লাভ করিয়া সুশিক্ষিত হইত । কেবল তাহা নহে, হৃদয় মন চরিত্রে এমন কিছু পাইত যাহা চিরদিনের মত জীবনপথের সম্বল হইয়া থাকিত । রসাপাগ্লাতে লাহিড়ী মহাশয় যে অল্পকাল ছিলেন, তাহার মধ্যেও অনেক যুবককে প্রকৃত সাধুতার পথ দেখাইয়া যান ।

রসাপাগ্লাতে অবস্থান কালে তিনি কলিকাতার অতি সন্নিকটেই থাকিতেন ; সুতরাং সর্বদাই কলিকাতার বন্ধুদিগের সহিত গিয়া মিশিতেন । রামগোপাল বোষের ভবন তাঁহার নিজের বাড়ীর মত ছিল । অবসর পাইলেই সেখানে গিয়া রাজি ঘাপন করিতেন । সেই সূত্রে তৎকাল-প্রসিদ্ধ প্রায় প্রত্যেক শিক্ষিত ব্যক্তির সহিত তাঁহার আলাপ ও আত্মীয়তা হইয়াছিল । অবশ্য তিনি সুরাপানের গোষ্ঠীতে থাকিতেন । কিন্তু তাহার ফল এই হইত যে, তাঁহার মুখের দিকে চাহিয়া অপর সকলকে সংবত হইয়া চলিতে হইত । কেহই অভদ্র আচরণ করিতে সাহস করিত না । আমি লাহিড়ী মহাশয়ের মুখে শুনিয়াছি যে এই সময়ে তিনি একটা বিশেষ কারণে বহুদিনের জ্ঞাত সুরাপান পরিত্যাগ করিয়াছিলেন । একদিন তিনি দেখিলেন যে রামগোপাল বোষ মহাশয়ের সম্পর্কীয় একটা যুবক অতিরিক্ত সুরাপান করিয়া অতি অভদ্র আচরণ করিতেছে । দেখিয়া তাঁহার অতিশয় লজ্জা বোধ হইল । তিনি রামগোপাল বোষকে বলিলেন—“দেখ রামগোপাল, আমাদের সুরাপান দেখিয়া বাড়ীর ছেলেরা ধারাপ হইয়া যাইতেছে । আজ তোমার * * * এর অতি অভদ্র আচরণ দেখিয়াছি । এস আমরা সুরাপান পরিত্যাগ করি ।” রামগোপাল বাবু বোধ হয় সে উপদেশ

গ্রহণ করিলেন না ; কিন্তু তদবধি লাহিড়ী মহাশয় বহুকাল সুরাপান করেন নাই । পুরাতন বন্ধুদিগকে ভালবাসিতেন ; সুরা-গোষ্ঠীতে থাকিতেন ; কিন্তু সুরাপান করিতেন না । এ নিয়ম বহুবৎসর ছিল । পরে অসুস্থ হইয়া পড়িলে ডাক্তারদিগের ও বন্ধুগণের পরামর্শে এ নিয়ম ভঙ্গ হয় । আমার বিশ্বাস তাহাতে তাঁহার দেহ মনের মহা অনিষ্ট সাধন করিয়াছিল ।

রসাপাগলা হইতে লাহিড়ী মহাশয় ১৮৬০ সালের প্রারম্ভে বরিশাল জেলা স্কুলের হেডমাষ্টার হইয়া গমন করেন । সেখানে তিনমাস মাত্র ছিলেন । কিন্তু সেই অল্পকালের মধ্যে ছাত্রগণের মনে অবিদ্যার স্মৃতি রাখিয়া আসিয়াছেন । এই সময়ে বাঁহারা তাঁহার নিকট পাঠ করিয়াছিলেন, তাঁহাদের মধ্যে অনেকেই এখন প্রাচীন । তাঁহাদের মুখে শুনিতে পাই যে মধুবিম্বুর চারিদিকে যেমন পিপীলিকাশ্রেণী ঘোটে, তেমনি সন্ধ্যার সময় বালকগণ লাহিড়ী মহাশয়ের চারিদিকে ঘূর্তিত । তিনি স্কুলগৃহের নিকটস্থ পুকুরিগীর বাঁধাঘাটে তাহাদের মধ্যে সমাসীন হইয়া বিবিধ বিষয়ের প্রশঙ্গ উত্থাপন করিতেন ; এবং কথোপকথনচ্ছলে নানা তত্ত্ব তাহাদের গোচর করিতেন । ইহার আকর্ষণ এমনি ছিল যে, বালকগণ গুরুজনের নিকট তিরস্কার সহ করিয়াও সেখানে আসিতে ছাড়িত না । কোন কোনও বালক সেই হইতে চিরজীবনের মত সাধুতার দিকে গতি পাইয়াছে । তাঁহারা এক একজন এখন কণ্ঠক্ষেত্রে দণ্ডায়মান । সকলেই লাহিড়ী মহাশয়কে চিরদিন গুরুর ভাষা ভক্তি শ্রদ্ধা করিয়া আসিয়াছেন ; এবং এখনও তাঁহার স্মৃতি হৃদয়ে ধারণ করিতেছেন ।

বরিশাল হইতে ১৮৬১ সালের এপ্রিল মাসে লাহিড়ী মহাশয় আবার কৃষ্ণনগর কলেজে আসিলেন । এই কৃষ্ণনগর কলেজ হইতেই ১৮৬৫ সালের নবেম্বর মাসে পেন্সন লইয়া কর্তব্য হইতে অবসৃত হন । তিনি যখন পেন্সনের জন্ত আবেদন করেন তখন মিঃ অলফ্রেড্‌ স্মিথ্ কৃষ্ণনগর কলেজের অধ্যক্ষ ছিলেন । লাহিড়ী মহাশয়ের আবেদন ডিরেক্টরের নিকট প্রেরণ করিবার সময় স্মিথ সাহেব লিখিয়াছিলেন :—

"In parting with Baboo Ram Tanoo Lahiri I may be allowed to say that Government will lose the services of an educational officer, than whom no officer has discharged his public duties with greater fidelity, zeal and devotion, or

has laboured more assiduously and successfully for the moral elevation of his pupils."

অর্থ—বাবু রামতল্লাহ লাহিড়ীকে বিদ্যার দিবার সময় আমি বলিতে চাই যে ইনি চলিয়া গেলে গবর্ণমেন্ট এমন একজন শিক্ষক হারাইবেন, যাহার অপেক্ষা আর কোনও শিক্ষক অধিক বিশ্বস্ততা, উৎসাহ ও তৎপরতার সহিত স্বীয় কর্তব্যসাধন করেন নাই অথবা ছাত্রগণের নৈতিক উন্নতির জন্য অধিক শ্রম করেন নাই, বা সে বিষয়ে অধিক কৃতকার্যতা লাভ করেন নাই।"

কলেজের অধ্যক্ষ তাঁহার পক্ষে যে কয়েকটা কথা বলিয়াছিলেন তাহা শত শত হৃদয়ের অন্তর্নিহিত বাণীর পুনরুক্তি মাত্র। যদি কোনও মানুষের সহক্ষে এ কথা সত্য হয়—“তিনি শিক্ষক হইয়াই জন্মিয়াছিলেন,” তাহা লাহিড়ী মহাশয়ের সহক্ষে। তিনি যে শিক্ষকতা কার্যে অসাধারণ কৃতকার্যতা লাভ করিতে সমর্থ হইয়াছিলেন, তাহার ভিতরকার কথা এই বুঝিয়াছি যে তিনি নিজে চিরজীবন আপনাকে শিক্ষাধীন রাখিয়াছিলেন। কোনও নূতন বিষয় জানিবার জন্য তাঁহার যে ব্যগ্রতা ও জ্ঞানিলে যে আনন্দ দেখিয়াছি, অন্য কোনও মানুষে সেরূপ আগ্রহ বা আনন্দ দেখি নাই। উত্তরকালে যখন তিনি অগীতিপূর হুবির, তখনও কাহারও মুখে কোনও ভাল কথা শুনিতে, আনন্দে অস্থির হইয়া উঠিতেন; বলিতেন “রসো, রসো কথাটা লিখে নি” এই বলিয়া স্মারক-লিপির পুস্তকখানি বাহির করিতেন। শিক্ষকবৃত্তিতে ছাত্রগণকে যখন শিক্ষা দিতেন, তখন কোনও বালক যদি কখনও তাঁহার কোনও ভ্রম প্রদর্শন করিত বা তাঁহার কৃত কোনও ব্যাখ্যা অপেক্ষা উৎকৃষ্টতর ব্যাখ্যা দিতে পারিত, তাহা হইলে তিনি শিশুর ছাত্র বিনীতভাবে শুনিতে, এবং ব্যাখ্যাটা উৎকৃষ্ট হইলে আনন্দ প্রকাশ করিতেন।

এই কৃষ্ণনগর কলেজে শেষ অবস্থানকালের কয়েকটা গল্প শুনিয়াছি। একবার লাহিড়ী মহাশয় পাঠ্য বিষয়ের কোনও এক অংশের ব্যাখ্যা করিতেছেন, ইতিমধ্যে একটা বালক বলিল, “মহাশয়, ওটার মানে ত ওরকম নয়।” তিনি অমনি তন্ময়, “সে কি? তুমি কি আর কোনও অর্থ জান না কি?” তখন বালকটা আর এক প্রকার ব্যাখ্যা দিতে প্রবৃত্ত হইল। ব্যাখ্যা শুনিয়া লাহিড়ী মহাশয় অতিশয় আনন্দিত হইলেন, “এ মানে তুমি কোথায় পেলে?” অমূল্যকালে জ্ঞানিলেন,

তাহার একজন শিক্ষিত আত্মীয় বলিয়া দিয়াছেন। তখন প্রীত হইয়া বলিলেন—“এমন শিক্ষিত উপযুক্ত লোক যার ঘরে তার ভাবনা কি?” আর একটা গল্প ইহা অপেক্ষাও সুন্দর। একবার একটা বালক তাহার প্রদত্ত কোনও ব্যাখ্যার প্রতি সন্দেহ প্রকাশ করিল। তখন তিনি আর এক বার অধিকতর বিশদরূপে বুঝাইবার চেষ্টা করিলেন; যখন কৃতকার্য হইলেন না, তখন অগ্রতম শিক্ষক উমেশচন্দ্র দত্ত মহাশয়কে ডাকিয়া আনিলেন;—“তুমি আমার ক্লাসের ছেলেদিগকে ব্যাখ্যা করিয়া বুঝাইয়া দেও।” তখন ছাত্রমহলে, ছাত্রমহলে কেন দেশের শিক্ষিতদলে, সুপ্রসিদ্ধ উমেশচন্দ্র দত্ত মহাশয়ের ইংরাজী-ভাষাভিজ্ঞ বলিয়া মহা খ্যাতি ছিল। তিনি আসিয়া যখন বিষয়টা ব্যাখ্যা করিয়া দিলেন, লাহিড়ী মহাশয় বলিলেন—“দেখিলে আমি ঠিক ব্যাখ্যাই দিয়াছিলাম, তবে ওঁর মত আমার ইংরাজীতে বিদ্যা নাই, তাই এমন সুন্দর করে বুঝাতে পারি নাই। ওঁর মত কয়টা মাহুষ বাঙ্গালা দেশে ইংরাজী জানে?” বাস্তবিক ইংরাজী বিজ্ঞা বিষয়ে তাহার বন্ধু উমেশচন্দ্র দত্তের প্রতি তাহার প্রগাঢ় শ্রদ্ধা ছিল। বার্ককো ইংরাজী ভাষার কোনও বিষয় লইয়া আমাদের সহিত তর্ক হইলে উমেশচন্দ্র দত্ত মহাশয়কে নজীরের মত উল্লেখ করিয়া বলিতেন, “উমেশের চেয়ে তোমরা ইংরাজী জান কি না!”

তাঁহার এই সময়ের শিক্ষকতা সম্বন্ধে আর একটা কথা। শুনিয়াছি, তাহা বোধ হয় শিক্ষকতা কার্যের প্রারম্ভ হইতেই তাঁহার চরিত্রে ছিল। অনেক শিক্ষক অনেক সময় ছাত্রদিগের সমক্ষে নিজ অজ্ঞতা প্রকাশ করিতে লজ্জিত হন। নিজে যা জানেন না, সেটাও জানেন এইরূপ দেখান, এবং কোনও রূপে ঘোড়াতাড়া দিয়া, গোঁজা মিলন দিয়া, ছাত্রদিগকে বুঝাইবার প্রয়াস পান। বলা বাহুল্যমাত্র যে লাহিড়ী মহাশয় এরূপ আচরণকে অতি মিন্দনীয় মনে করিতেন। ছাত্রগণ কোনও প্রশ্ন করিলে, যদি তাহার সহজতর দেওয়া কঠিন মনে করিতেন, তাহা হইলে তৎক্ষণাৎ বলিতেন—“দেখ এটা আমার জানা নাই, জানিয়া কাল তোমাকে বলিব।” তৎপরে গৃহে গিয়া সে বিষয়ে চিন্তা করিতেন, বা বিশ্রামগৃহে উমেশচন্দ্র দত্ত মহাশয়ের নিকট জানিয়া লইতেন। পরে আসিয়া প্রশ্নকর্তাকে জানাইয়া দিতেন।

বতদূর জানা যায়, বরিশালে থাকিবার সময়েই তাঁহার স্বাস্থ্য ভগ্ন হয়, এবং ক্রমশঃগরে আসিয়াই তাঁহাকে কিছু দীর্ঘকালের জন্য ছুটি লইতে হয়। ছুটি লইয়া তিনি কলিকাতার সন্নিকটে বালী উত্তরপাড়াতে ছিলেন। সেখান

হইতে কৃষ্ণনগরেই গমন করেন, এবং সেখান হইতে ১৮৬৫ সালে পেন্সন লইয়া কলিকতা হইতে অবসৃত হন।

এই কয়েক বৎসরের মধ্যে তাঁহার পারিবারিক জীবনে অনেকগুলি ঘটনা ঘটে। ১৮৫৭ সালের চৈত্রমাসে বৃদ্ধ পিতা রামকৃষ্ণ স্বর্গারোহণ করেন। লাহিড়ী মহাশয় উপবীত পরিত্যাগ করার পর তিনি মর্ধ্যাহ্নে হইয়াছিলেন; এবং শেষ দশাতে কেবল ইষ্টদেবতার নাম করিয়াই দিন যাপন করিতেন। তাঁহার অবসান কাল সেইরূপ সাধুর প্রস্থানের উপযুক্তই হইয়াছিল। অপর দুই ঘটনা তাঁহার দুই পুত্রের জন্ম। দ্বিতীয় পুত্র শরৎকুমারের ১৮৫৯, খৃষ্টাব্দে ৩রা ভাদ্র দিবসে কলিকাতা সহরে জন্ম হয়। ১৮৬২ সালের মাঘ মাসে কৃষ্ণনগরে তৃতীয় পুত্র বসন্তকুমার জন্মগ্রহণ করেন।

দশম পরিচ্ছেদ।

ব্রাহ্মসমাজের নবোত্থান।

১৮৬০ সাল হইতে ১৮৭০ সাল পর্য্যন্ত।

এক্ষণে ১৮৬০ সাল হইতে ১৮৭০ পর্য্যন্ত এই কালের মধ্যে বঙ্গ-সমাজে যে যে বিশেষ আন্দোলনের তরঙ্গ উঠিয়াছিল তাহার কিছু কিছু নির্দেশ করিতে প্রবৃত্ত হইতেছি। বলিতে গেলে রামমোহন রায়ের অভ্যুদয়, হিন্দু-কালেজের প্রতিষ্ঠা, ব্রাহ্মসমাজের স্থাপন, ঈশ্বরচন্দ্র বিদ্যাসাগর ও অক্ষয়কুমার দত্তের আবির্ভাব, মধুসূদন দত্তের প্রভাব প্রভৃতি ঘটনা-পরম্পরা দ্বারা বঙ্গসমাজে যে নব আকাঙ্ক্ষার উচ্ছ্বাস হইয়াছিল, তাহা এই কয়েক বৎসর আপনার কাজ করিয়া আসিতেছিল। এই ১৮৬০ সাল হইতে ১৮৭০ সালের মধ্যে তাহা আরও ঘনীভূত আকারে আপনাকে প্রকাশ করিয়াছিল। এই কালের মধ্যে নববঙ্গের কল্লকজন নূতন নেতা দেখা দিয়াছিলেন, এবং বঙ্গবাসীর চিন্তা ও চিন্তাকে নূতন পথে প্রবৃত্ত করিয়াছিলেন। তাহাদের সংক্ষিপ্ত জীবন-চরিত্র পর পরিচ্ছেদে প্রদত্ত হইবে। আপাততঃ তাহাদের কার্যের বিষয়ে কিছু আলোচনা করা যাইতেছে।

এই কালের প্রথম ভাগে কেশবচন্দ্র সেন মহাশয় নবোদীয়মান রবির স্তার

বঙ্গাকাশে উঠিতে লাগিলেন ; এবং তাঁহাকে আবেষ্টন করিয়া ব্রাহ্মসমাজ ও স্বর্ঘ্যমণ্ডলের ছায় মানব-চকুর গোচর হইল । ১৮৫৬ সালে দেবেন্দ্রনাথ ঠাকুর মহাশয় ধান ধারণাতে বিশেষ ভাবে কিছুকাল যাপন করিবার আশয়ে সহর ত্যাগ করিয়া হিমালয় শিখরে গমন করেন । ১৮৫৮ সালের শেষভাগে তিনি সহরে প্রতিনিবৃত্ত হইলেন । তিনি আসিয়া দেখেন যে তাঁহার সहाধারী বন্ধু পার্শ্বমোহন সেনের দ্বিতীয় পুত্র কেশবচন্দ্র সেন ব্রাহ্মসমাজে যোগ দিয়াছেন । ইহাতে তাঁহার হৃদয় আনন্দে নৃত্য করিয়া উঠিল । তিনি কেশবকে আপনার প্রেমালিঙ্গনের মধ্যে গ্রহণ করিলেন । উভয়ের যোগ মণি-কাঞ্চনের যোগের ছায় হইল । উভয়ে মিলিত হইয়া নব নব কার্য্যে হস্তার্পণ করিতে লাগিলেন ।

১৮৫৯ সাল হইতে ব্রাহ্মসমাজে নবশক্তির সঞ্চার দেখা গেল । এক দিকে দেবেন্দ্রনাথ তাঁহার শৈলবাসকালের সাধনার চরম ফল সকল তাঁহার চিরস্মরণীয় উপদেশগুলির মধ্যে ব্যক্ত করিতে লাগিলেন । বাঙ্গালার মানুষ অধ্যাত্মতত্ত্বের একরূপ ব্যাখ্যা পূর্বে কখনও শোনে নাই । সুতরাং সহরে ছরায় এই জনরব ব্যাপ্ত হইয়া পড়িল যে দেবেন্দ্রনাথ ঠাকুর গিরিশৃঙ্গ হইতে নামিয়া ব্রাহ্মসমাজকে জাগাইয়া তুলিয়াছেন । এই সংবাদে নানাপ্রকার লোক ব্রাহ্মসমাজের উপাসনার দিনে ভাঙ্গিয়া পড়িতে লাগিল । একদিনের উপদেশ শুনিয়া আমরা গতদিন মন স্থির রাখিতে পারিতাম না । হৃদয়ে কি নব ভাব আগিত ! চক্ষে কি নূতন জগত আসিত ! এই সকল উপদেশ গ্রন্থাকারে নিবদ্ধ হইয়া বঙ্গ-সাহিত্যের অমূল্য সম্পত্তিরূপে রহিয়াছে । আজ তাহাদের আদর না হউক একদিন হইবেই হইবে । এমন সুন্দর ভাষার একরূপ উচ্চ সত্য সকল যে ব্যক্ত হইতে পারে, ইহাই বঙ্গভাষার অসীম স্থিতিস্থাপকতার নিদর্শন । কিছু না হইলে ভাষার দিক দিয়া এই উপদেশগুলি বঙ্গীয় সাহিত্য-সেবীর পাঠ্য ।

অপরদিকে যুবক কেশবচন্দ্রের উৎসাহাগ্নি সকলের দৃষ্টিগোচর হইল । তিনি একাকী ব্রাহ্মসমাজে প্রবেশ করিলেন না । তাঁহার পদবীর অনুসরণ করিয়া তাহার যৌবন-সুহৃদগণের অনেকে ব্রাহ্মসমাজে আসিয়া প্রতিষ্ঠিত হইলেন । ইহাদের প্রেমোজ্জ্বল হৃদয়ের সংস্পর্শে ব্রাহ্মসমাজে এক প্রকার নবশক্তির সঞ্চার হইল । দেবেন্দ্রনাথ ও কেশবচন্দ্র মিলিত হইয়া এই সময়ে কয়েক প্রকার কার্য্যের আয়োজন করিলেন । প্রথম যুবকগণের ধর্ম্ম শিক্ষার্থ ব্রাহ্মবিদ্যালয় নামে একটা বিদ্যালয় স্থাপিত হইল । প্রতি রবিবার প্রাতে ঐ বিদ্যালয়ের অধিবেশন হইত ; তাঁহাতে মহর্ষি দেবেন্দ্রনাথ বাঙ্গালাতে এবং কেশবচন্দ্র সেন ইংরাজীতে

উপদেশ দিতেন। ঐ সকল উপদেশ দ্বারা অনেক শিক্ষিত যুবক ব্রাহ্মসমাজের দিকে আকৃষ্ট হইল। বিশ্ববিদ্যালয়ের সর্বোচ্চ উপাধিদারী যুবকগণ ব্রাহ্মসমাজের সহিত সংস্পর্শ হওয়ায় গৌরবের বিষয় মনে করিতে লাগিল।

দ্বিতীয় বাঁহারা ব্রাহ্মবিদ্যালয়ের দ্বারা আকৃষ্ট হইতে লাগিলেন, এবং তদগ্রেই বাঁহারা কেশবচন্দ্রের অনুসরণ করিয়াছিলেন, তাঁহাদিগকে লইয়া কেশব এক স্নহদোষ্টি স্থাপন করিলেন; সপ্তাহের মধ্যে একদিন নিজভবনে তাঁহাদের সঙ্গে বিশ্রামাল্যাপের জন্ত বসিতেন। সেখানে সর্বপ্রকার ধর্ম ও সামাজিক বিষয়ে কথাবার্তা হইত। দেবেন্দ্রনাথ পঞ্জাবীদিগের স্নহদোষ্টির সঙ্গত সভা নাম দেখিয়া ইহার নাম সঙ্গত সভা রাখিলেন। এই সঙ্গত সভা ব্রাহ্মসমাজের নবশক্তির অদ্ভুত উৎস্বরূপ হইল। যুবকসভাগণ সর্কাস্তঃকরণের সহিত আত্মোন্নতি প্রার্থী হইয়া সঙ্গতের আলোচনাতে আপনাদিগকে নিরুৎসাহ করিতেন, এবং যাহা কর্তব্য বলিয়া নির্দ্ধারিত হইত, তাহা সর্বতোভাবে আচরণ করিবার জন্ত দৃঢ়প্রতিজ্ঞ হইয়া সভাস্থল পরিত্যাগ করিতেন। এক এক দিন ষড়ার পর ষটা অতিবাহিত হইয়া যাইত; তাঁহাদের জ্ঞান থাকিত না; রাত্রি ৯টার সময়ে বসিয়া হয়ত ২টার সময়ে সভাস্তম্ভ হইত; কোথা দিয়া যে সময় যাইত কেহই বুঝিতে পারিত না। এরূপ আত্মোন্নতির জন্ত ব্যাকুলতা, এরূপ কর্তব্যসাধনে দৃঢ়নিষ্ঠা, এরূপ সত্যানুসরণে চিন্তার একাগ্রতা, এরূপ হৃদয়স্থ বিশ্বাসে আত্মসমর্পণ, এরূপ ঈশ্বরে বিশ্বাস ও নির্ভর সচরাচর দেখা যায় না। অল্পদিনের মধ্যেই কেশবকে বেঠন করিয়া এক ঘন-নিবিষ্ট মণ্ডলী সৃষ্ট হইল। ১৮৬১ সালে কেশবচন্দ্র বিষয়কর্ম হইতে অবসৃত হইয়া ব্রাহ্মধর্ম প্রচারে নিযুক্ত হইলে ইঁহাদের অনেকে তাঁহার অনুসরণ করিয়া চিরদারিদ্র্য ঝাঁপ দিয়াছিলেন, এবং এখনও ইঁহাদের অনেকে ব্রাহ্মধর্মপ্রচার কার্যে নিযুক্ত থাকিয়া ব্রাহ্মসমাজের শক্তির উৎস স্বরূপ হইয়া রহিয়াছেন।

সঙ্গত সভার সভাগণ যে নবভাবে দীক্ষিত হইলেন তাহা এই যে হৃদয়ের বিশ্বাসকে কার্যে পরিণত করিতে হইবে, তদ্ব্যতীত ধর্ম হয় না। এই ভাব অন্তরে প্রবল হওয়াতে ১৮৬১ সাল হইতে ব্রাহ্মধর্মকে অহুষ্ঠানে পরিণত করিবার জন্ত ব্যগ্রতা দৃষ্ট হইতে লাগিল। ঐ সালে দেবেন্দ্রনাথ তাঁহার দ্বিতীয় কন্যার বিবাহ ব্রাহ্মধর্মের পদ্ধতি অনুসারে দিলেন। এদিকে যুবক ব্রাহ্মধর্মে অনেক ব্রাহ্মণের সম্মান জাতিভেদের চিত্তস্বরূপ উপবীত পরিত্যাগ করিয়া

নানা প্রকার সামাজিক নিগ্রহ ও নির্যাতন সহ করিতে লাগিলেন । দেশমধ্যে মহা আন্দোলন উপস্থিত হইল ।

নবীন ব্রাহ্মগণ তাঁহাদের কার্যক্ষেত্র দিন দিন বিস্তৃত করিয়া তুলিতে লাগিলেন । প্রধানতঃ মনোমোহন ঘোষ ও কেশবচন্দ্র সেনের উৎসাহে ও দেবেন্দ্রনাথের অর্থসাহায্যে “ইণ্ডিয়ান মিরর” নামে এক সংবাদপত্র প্রকাশিত হইল ; কলিকাতা কলেজ নামে এক উচ্চশ্রেণীর বিদ্যালয় স্থাপিত হইল ; তাহা নবীন ব্রাহ্মদের এক প্রধান আড্ডা হইয়া দাঁড়াইল ; এবং সর্ববিধ সমালোচনার জন্য ব্রাহ্মবন্ধু সভা নামে এক সভা স্থাপিত হইল । এই সময়ে অগ্রসর ব্রাহ্মদল জ্ঞানবিস্তারের জন্য যাহা করিয়াছিলেন, তাহা বিশেষভাবে উল্লেখযোগ্য । সমাজ সংস্কার বিষয়ে আলোচনা আরম্ভ হইলেই নারীজাতির উন্নতির প্রতি তাঁহাদের দৃষ্টি পড়ে । সংস্কৃতির অবলম্বিত প্রতিজ্ঞাগুলির মধ্যে নারীজাতির উন্নতিসাধনের চেষ্টা একটা প্রতিজ্ঞারূপে অবলম্বিত হয় । তদনুসারে নবীন ব্রাহ্মগণ স্বীয় স্বীয় ভবনে, স্বীয় স্বীয় পত্নী, ভগিনী, কন্যা প্রভৃতির শিক্ষাবিধানে মনোযোগী হন । অনেকে সমস্ত দিন আফিসে গুরুতর শ্রম করিয়া আসিয়া সায়ংকালে স্বীয় স্বীয় পত্নী বা ভগিনীর শিক্ষকতা কার্যে নিযুক্ত হইতেন । তদ্বিত্ত ব্রাহ্মবন্ধু সভার সংশ্রবে একটা জ্ঞানবিস্তার বিভাগ স্থাপন করিয়া অন্তঃপুরে জ্ঞানবিস্তারের নানা উপায় অবলম্বন করেন ; এবং তাঁহাদের কয়েকজনে মিলিত হইয়া “বামাবোধিনী পত্রিকা” নামে জ্ঞানবিস্তার একখানি মাসিক পত্রিকা বাহির করিতে আরম্ভ করেন । সে পত্রিকা অद्याপি রহিয়াছে । প্রথম সম্পাদকের পরিবারগণ এখনও তাহাকে রক্ষা করিতেছেন ।

১৮৬৪ সালে ব্রাহ্মিকা-সমাজ নামে নারীগণের জন্য একটা স্বতন্ত্র উপাসনা-সমাজ প্রতিষ্ঠিত হয় ; এবং কেশবচন্দ্র তাহার আচার্য্যের কার্য্য করিতে থাকেন । ক্রমে নবীন ব্রাহ্মদের মধ্যে এক অত্যগ্রসর দল দেখা দিলেন ; তাঁহারা নারী-জাতির উন্নতির জন্য পূৰ্ব্বোক্ত উপায় সকল অবলম্বন করিয়া সন্তুষ্ট রহিলেন না ; কিন্তু আপনাপন পত্নীকে নববেশে সজ্জিত করিয়া প্রকাণ্ডস্থানে গতায়ত করিতে আরম্ভ করিলেন ; তাহা লইয়া চারিদিকে মহা সমালোচনা আরম্ভ হইল । এই কালের শেষভাগে দেবেন্দ্রনাথের মধ্যম পুত্র সত্যেন্দ্রনাথ ঠাকুর মহাশয় আপনার পত্নীকে লইয়া গবর্ণর জেনেরালের বাড়ীতে বন্ধু-সম্মিলনে যান, তাহাতেও জ্ঞানবিস্তার বিষয়ক আন্দোলনকে দেশমধ্যে প্রবল করিয়া তুলিয়াছিল ।

যাহাহউক প্রাচীন দলের নেতা মহর্ষি দেবেন্দ্রনাথ ও যুবকদের নেতা কেশবচন্দ্র সেন, ইহাদের মধ্যে পরামর্শ ও কার্যের একতা বহুদিন রহিল না। নবীন ব্রাহ্মগণ অধিক দিন মুখে জাতিভেদের নিন্দা করিয়া এবং কার্যতঃ উপবীত ত্যাগ করিয়া এবং সকল জাতি মিলিয়া একত্র পান ভোজন করিয়াও সন্তুষ্ট থাকিতে পারিলেন না। ১৮৬৪ সাল হইতেই তাঁহারা বিভিন্ন জাতীয় নরনারীর মধ্যে বিবাহসম্বন্ধ স্থাপন করিতে প্রবৃত্ত হইলেন এবং এই ধূয়া ধরিলেন যে, উপবীতধারী ব্রাহ্মণ আচার্য্যগণ বেদীতে বসিলে তাঁহারা উপাসনাতে যোগ দিতে পারেন না। দেবেন্দ্রনাথ এতদূর যাইতে প্রস্তুত ছিলেন না। তিনি প্রথম প্রথম উপবীতত্যাগী উপাচার্য্য নিযুক্ত করিতে অগ্রসর হইয়াছিলেন ; কিন্তু নবীন ব্রাহ্মগণ যখন বিভিন্ন জাতীয় ব্যক্তিগণের মধ্যে বিবাহ সম্বন্ধ স্থাপন করিতে অগ্রসর হইলেন, তখন এ পথে ইহারা কতদূর যাইতে পারে ভাবিয়া চমকিয়া গেলেন। তাঁহার রক্ষণশীল প্রকৃতি আর অগ্রসর হইতে চাহিল না। এই স্থলে প্রাচীন ও নবীন ব্রাহ্মদলে বিচ্ছেদ ঘটিল। অগ্রসর ব্রাহ্মদল স্বতন্ত্র কার্য্যক্ষেত্র করিলেন ; “ধর্ম্মতত্ত্ব” নামে মাসিক পত্রিকা বাহির করিলেন এবং ১৮৬৬ সালের নবেম্বর মাসে দেবেন্দ্রনাথের সমাজ ত্যাগ করিয়া ভারতবর্ষীয় ব্রাহ্মসমাজ নামে স্বতন্ত্র সমাজ স্থাপন করিলেন। তদবধি দেবেন্দ্রনাথের সমাজের নাম ‘আদি ব্রাহ্মসমাজ’ হইল।

১৮৬৬ হইতে ১৮৭০ পর্য্যন্ত কালের মধ্যে অগ্রসর ব্রাহ্মদল মহোৎসাহে ব্রাহ্মধর্ম্মের বার্তা ভারতের নানা প্রদেশে প্রচার করিতে লাগিলেন। দেখিতে দেখিতে পঞ্জাব, সিন্ধু, বোম্বাই, মাদ্রাজ, সর্বত্র ব্রাহ্মসমাজ স্থাপিত হইল। কেশবচন্দ্র সেন শিক্ষিত ব্যক্তিগণের চিন্তার ও চর্চার অনেক অংশ অধিকার করিয়া ফেলিলেন।

এইরূপে ব্রাহ্মসমাজের নবোত্থান দ্বারা বঙ্গসমাজে যখন আন্দোলনের তরঙ্গ উঠিয়াছিল, তখন সাহিত্যক্ষেত্রে নবশক্তির আবির্ভাব দেখা গেল। ইহার কিছু পূর্বে নীলের হাঙ্গামা, নীলকরের অভ্যুত্থান, প্রজাদের কষ্ট প্রভৃতি হিন্দুপেট্রিয়ার্ট ও অপরাপর পত্রের দ্বারা আমাদের কর্ণগোচর হইয়াছিল। সে হাঙ্গামার বিবরণ অগ্রেই দিয়াছি। আমাদের মন যখন অল্পাধিক পরিমাণে উত্তেজিত, তখন ১৮৬০ সালের শেষভাগে “নীলদর্পণ” নাটক প্রকাশিত হইল। হঠাৎ যেন বঙ্গসমাজ ক্ষেত্রে উজ্জাপাত হইল ; এ নাটক কোথা হইতে কে প্রকাশ করিল, কিছুই জানা গেল না। এ নাটক প্রাচীন নাটকের চিরাবলম্বিত রীতি রক্ষা করিল কি না, সে বিচার করিবার সময় রহিল না ;

ঘটনা সকল সত্য কি না অহুসস্থান করিবার সময় পাওয়া গেল না ; নীলদর্পণ আমাদের কাছে ব্যাপ্ত করিয়া ফেলিল ; তোরাপ আমাদের ভালবাসা কাড়িয়া লইল ; ক্ষেত্রমণির হৃৎথে আমাদের রক্ত গরম হইয়া গেল ; মনে হইতে লাগিল রোগ সাহেবকে যদি একবার পাই অস্ত্র অস্ত্র না পাইলে যেন দাঁত দিয়া ছিড়িয়া খণ্ড খণ্ড করিতে পারি। এই নীলদর্পণকে অবলম্বন করিয়া লংএর কারাগার প্রভৃতির বিবরণ অগ্রেই দিয়াছি।

মাইকেল মধুসূদন দত্ত, তাঁহার নাটক সকলে চিরন্তন রীতি ভাগ করিয়া যে নূতন পথ অবলম্বন করিয়াছিলেন, দীনবন্ধু সেই পথে আরও অগ্রসর হইলেন। এই নূতন রীতি ইংরাজী শিক্ষিত ব্যক্তিগণের পক্ষে অতীব স্পৃহণীয় হইল। পর পরিচ্ছেদে মিত্র মহাশয়ের জীবন-চরিতে পাঠকগণ দেখিতে পাইবেন যে তিনি কর্মসূত্রে নানা দেশে, নানা জেলাতে ভ্রমণ করিয়াছিলেন। শিক্ষিত ব্যক্তিদিগের মধ্যে আর কেহ তাঁহার ছায় নানা স্থানে নানা শ্রেণীর মানুষের সঙ্গে মিশিয়াছিলেন কি না সন্দেহ। তাঁহার এই ভ্রমোদর্শন তাঁহার অঙ্কিত চরিত্র সকল সৃষ্টি করিতে সমর্থ হইয়াছিল। ইহার পরে দীনবন্ধু আরও যে সকল গ্রন্থ প্রণয়ন করেন তাহার বিবরণ তাঁহার জীবন-চরিতে দেওয়া গেল।

দীনবন্ধু যেমন তাঁহার নাটকগুলির দ্বারা বঙ্গ সাহিত্যে নবভাব ও বাঙ্গালির মনে নবশক্তির সঞ্চার করিলেন, তেমনি এইকালের মধ্যে বঙ্গীয় সাহিত্য জগতে আর এক প্রতিভাশালী পুরুষ দেখা দিলেন ;—তিনি বঙ্কিমচন্দ্র চট্টোপাধ্যায়। বঙ্গের অমরকবি মধুসূদন যেমন চিরাগত রীতি-পাশ ছিন্ন করতঃ বঙ্গীয় পদ্য সাহিত্যকে স্বাধীনতা মস্ত্রে দীক্ষিত করিয়া এক নব স্বাধীনতা, নব চিন্তা, নব আকাজ্ঞা ও নব শক্তির অবতারণা করিলেন, গল্প সাহিত্যে সেই কার্য্য করিবার জন্ত বঙ্কিম চন্দ্রের অভ্যাস হইল। তৎপূর্বে বিজ্ঞাসাগর মহাশয় ও অক্ষয় কুমার দত্ত মহাশয়ের নেতৃত্বাধীনে বাঙ্গালা গল্প সংস্কৃত-বহুল ও সংস্কৃত ব্যাকরণের রীত্যাহুসারী হইয়া ধনীগৃহের রমণীগণের ছায় অলঙ্কারভাবে প্রপীড়িতা হইয়াছিল। বঙ্কিমচন্দ্রের অভ্যাসের পূর্বেও একদল ইংরাজী শিক্ষিত কাব্যাহুরাগী লোক এই সংস্কৃত ভাষাভারে পীড়িত বঙ্গভাষাকে কিরূপে উদ্ধার করিবার প্রয়াস পাইতেছিলেন, এবং কিরূপে তাঁহারা আলালী ভাষা নামে একপ্রকার ভাষা ভালা বাঙ্গালা ভাষার সৃষ্টি করিয়াছিলেন, তাহা অগ্রেই বলিয়াছি। সুপ্রসিদ্ধ প্যারীচাঁদ মিত্র ও রাধানাথ শিকদার যে এই নব ভাষার জন্মদাতা ছিলেন ; এবং তাঁহাদের প্রকাশিত “দাসিক পত্রিকা” যে এই ভাষার

ভেরীনিবাদ ছিল, তাহাও অগ্রে নির্দেশ করিয়াছি। কিন্তু ঐ “আলালী” ভাষা গ্রাম্যতা দোষে কিছু অতিরিক্ত মাত্রায় দূষিত ছিল। যথা “টক্ টক্ পটাস্ পটাস্ মিয়াজান গাডোয়ান এক এক বার গান করিতেছে—টিট্কারি দিতেছে, হাঃ শালার গরু বলিয়া লেজ মুচ্ড়াইয়া সপাং সপাং মারিতেছে।” ইত্যাদি ভাষা যে গ্রন্থে বা পত্রিকাতে মুদ্রিত হইলে গ্রাম্যতা দোষ ঘটে তাহা সকলেই অনুভব করিতে পারেন। সুতরাং এই আলালী ভাষা বঙ্গীয় পাঠক বৃন্দের সম্পূর্ণ ভাল লাগিত না।

ইহার পরে ছতোমের নক্সা প্রকাশিত হয়। তাহাও প্রায় এই আলালী ভাষাতে লিখিত। কালীপ্রসন্ন সিংহ ছতোমের নক্সা লিখিয়া অমর হইয়াছেন। তাহার জীবন্ত হৃদয়গ্রাহী বাঙ্গালা আমাদিগকে বড়ই প্রীত করিয়াছিল। কিন্তু তাহাও গ্রাম্যতা দোষের উপরে উঠিতে পারে নাই।

সন্ধিস্থলে বঙ্গিমচন্দ্র আবির্ভূত হইলেন। তিনি যৌবনের প্রারম্ভে ঈশ্বরচন্দ্র গুপ্ত মহাশয়ের শিষ্যত্ব গ্রহণ করিয়া পণ্ডরচনাতে সিজ্জহস্ততা লাভ করিবার চেষ্টা করিয়াছিলেন; কিন্তু মধুসূদনের দীপ্ত প্রভাতে আপনাকে পরীক্ষা করিয়া জানিতে পারিলেন যে সে পথ তাঁহাকে পরিত্যাগ করিতে হইবে। কিন্তু তিনি শুভক্ষণে গণ্ডরচনাতে লেখনী নিয়োগ করিলেন। অচিরকালের মধ্যে বঙ্গের সাহিত্যাকাশে উজ্জল তারকার ন্যায় বঙ্গিম দীপ্তি পাইতে লাগিলেন। বঙ্গবাসীর চিন্তা ও চিন্তের উন্মেষ পক্ষে যত লোক সহায়তা করিয়াছেন তন্মধ্যে ইনি একজন অগ্রগণ্য ব্যক্তি।

এই কালের মধ্যে নাটক ও উপন্যাস রচনা দ্বারা বঙ্গসমাজে যে পরিবর্তন ঘটাইয়াছিল তাহা কথঞ্চিৎ প্রদর্শন করিয়া আর এক সূত্রহৎ বিপ্লবের বিষয় উল্লেখ করিতে যাইতেছি। তাহা বঙ্গীয় সাহিত্যজগতে “সোমপ্রকাশের” অভ্যুদয়। ইংরাজ রাজ্যের প্রতিষ্ঠার পর হইতেই কিরূপে সংবাদপত্রের আবির্ভাব হইয়া, তাহা কত প্রকার অবস্থার মধ্য দিয়া চলিয়া আসিয়াছে তাহার বিবরণ অগ্রেই দিয়াছি। সংবাদপত্র প্রথমে ইংরাজদিগের দ্বারা সম্পাদিত হইতে আরম্ভ হয়। তৎপরে ত্রীরামপুরের মিশনারিগণ তাঁহাদের দর্পণ নামক পত্রের সৃষ্টি করিয়া বাঙ্গালা সংবাদ পত্রের পথ খুলিয়া দেন। কিন্তু “দর্পণ” ইংরাজদিগের দ্বারাই সম্পাদিত হইত এবং তাহার ভাষা ইংরাজ-লিখিত বাঙ্গালা হইত। প্রকৃত পক্ষে রাজা রামমোহন রায় এ দেশীয় দ্বারা লিখিত বাঙ্গালা সংবাদপত্রের পথ প্রদর্শক। তিনিই ১৮২১ সালে “সংবাদ কৌমুদী” নামে সাপ্তাহিক পত্র প্রকাশ

করেন। ঐ “কৌমুদীতে” জ্ঞাতব্য বিষয় অনেক থাকিত। ইহা লোক-শিক্ষার একটা প্রধান উপায় স্বরূপ ছিল। তৎপরে সতীদাহ নিবারণ লইয়া হিন্দু সমাজের সহিত যখন রাজার বিবাদ উপস্থিত হয়, তখন হিন্দু ধর্মের পক্ষগণ “চন্দ্রিকা” নামক প্রত্নিকা প্রকাশ করিয়া স্বধর্ম রক্ষাতে ও সংস্কারার্থীদিগের সহিত বাক্যুদ্ধে প্রবৃত্ত হন। কৌমুদী রামমোহন রায়ের মৃত্যুর পরেও কিছুদিন ছিল। চন্দ্রিকা তৎপরেও বহুকাল জীবিত ছিল। চন্দ্রিকার আবির্ভাবের অল্পকালঃ পরেই দ্বৈতরচিত্র গুপ্তের “প্রভাকর” প্রকাশিত হয়। প্রভাকরের রাজত্ব যখন মধ্যাহ্ন সূর্য্যের স্নায় দীপ্তিমান, তখন ১৮৪৩ সালে ব্রাহ্মসমাজ কর্তৃক “তত্ত্ববোধিনী” পত্রিকা প্রকাশিত হয়।

তত্ত্ববোধিনী বঙ্গীয় পাঠকগণকে গভীর জ্ঞানের বিষয় সকলের আলোচনাতে প্রবৃত্ত করে; এবং তদ্বারা বঙ্গসমাজে এক মহৎ পরিবর্তন আনয়ন করে। কিন্তু তত্ত্ববোধিনী ঠিক সংবাদ পত্র ছিল না। ধর্মতত্ত্বের আলোচনাই তাহার মুখ্য কার্য্য ছিল। দৈনিক সংবাদ যোগাইবার ভার “প্রভাকর,” “ভাস্কর” প্রভৃতি পত্র সকল গ্রহণ করিয়াছিল। ‘ভাস্কর’ গুড় গুড়ে ভট্টাচার্য্য বা গৌরীশঙ্কর ভট্টাচার্য্য কর্তৃক সম্পাদিত হইত। এতদ্ব্যতীত সেই সময়ে আরও অনেকগুলি সংবাদ পত্র বাহির হইয়াছিল। ১৮৫০ সালে মুদ্রিত এক তালিকা হইতে নিম্নলিখিত নামগুলি পাওয়া যায়;—যথা, মহাজন দর্পণ, চন্দ্রোদয়, রসরাজ, জ্ঞান দর্পণ, বঙ্গদূত, সাধুরঞ্জন, জ্ঞানসঞ্চারিণী, রস-সাগর, রঙ্গপুর বার্তাবহ, রসমুদ্রণ, নিত্যধর্ম্মানুরঞ্জিকা, ও দুর্জুন দমন মহা-নবমী।

ইহাদের অধিকাংশ পরস্পরের প্রতি অভদ্র গালাগালিতে পূর্ণ হইত। প্রভাকরে ও ভাস্করে এরূপ অভদ্র কটুক্তি চলিত যে তাহা শুনিলে কাণে হাত দিতে হয়। প্রভাকর ও ভাস্করের পদবীর অহংসরণ করিয়া “রসরাজ” ও “যেমন কর্ম্ম তেমন ফল” প্রভৃতি কতিপয় পত্রে এরূপ কবির লড়াই আরম্ভ করিল যে তাহার বর্ণনা অসাধ্য। সূত্রে বিষয় অতিরিক্ত কালের মধ্যে দেশের লোকের মিস্ত্রার বাণী উথিত হইল। চারিদিকে ছি ছি রব উঠিয়া গেল। কবির লড়াইও থামিয়া গেল।

বোধ হয় এই ছি ছি রবটা হৃদয়ে থাকাতেই এসময়ে শিক্ষিত ব্যক্তিগণ বাঙ্গালা সংবাদ পত্র পড়িতে বা বাঙ্গালা লিখিতে দৃঢ়তা বোধ করিতেন। তাহাদের মধ্যে যে কেহ সংবাদ পত্র প্রকাশ করিতে চাহিতেন, তিনি ইংরাজীতেই করিতেন। এই সকল ইংরাজী পত্রের মধ্যে হরিশের Hindoo

Patriot, রামমোপাল ঘোষের Bengal Spectator, কানীপ্রসাদ ঘোষের Hindoo Intelligencer, কিশোরীচাঁদ মিত্রের Indian Field সমধিক প্রসিদ্ধি লাভ করিয়াছিল ।

১৮৫৮ সালে সোমপ্রকাশের অভ্যুদয়ের সময়েও এই ছি ছি রবটী প্রবল ছিল । আমার বোধ হয় এই ছি ছি রবটী নিবারণ করাই সোমপ্রকাশের জন্মের অন্ততম কারণ ছিল । ১৮৫০ হইতে ১৮৫৮ সালের মধ্যে এই ছি ছি রব নিবারণের আরও চেষ্টা হইয়াছিল । কয়েকখানি উৎকৃষ্ট শ্রেণীর বাঙ্গালা সাময়িক পত্র প্রকাশ পাইয়াছিল । তন্মধ্যে সুবিখ্যাত ডাক্তার রাজেন্দ্রলাল মিত্রের সম্পাদিত “বিবিধার্থ সংগ্রহ” ও তৎপরে পরিবর্তিত আকারে প্রকাশিত “রহস্য-সন্দর্ভ” বিশেষ রূপে উল্লেখ যোগ্য । তাহা যদিও ঠিক সংবাদ পত্র ছিল না বটে, তথাপি মিত্রজ মহাশয় উক্তপত্রে গম্ভীর ভাষায় যে সকল মহামূল্য জ্ঞাতব্য বিষয় পাঠকগণের গোচর করিতেন, তাহা পাঠ করিয়া আমরা বিশেষ উপকৃত হইতাম । সে প্রবন্ধগুলি চিরদিন আমাদের স্মৃতিতে রহিয়াছে ।

সোমপ্রকাশের অভ্যুদয়ের প্রাক্কালেই প্যারীচাঁদ মিত্র ও রাধানাথ শিকদারের “মাসিক পত্রিকা” প্রকাশিত হয় । তাহাতে অনেক জ্ঞাতব্য বিষয় থাকিত বটে, কিন্তু তাহা “আলালী ভাষাতে” লিখিত হইত, ইহা অগ্রেই বলিয়াছি । এই ক্ষেত্রে সোমপ্রকাশের আবির্ভাব । সে দিনের কথা আমাদের বেশ স্মরণ আছে । এ কাগজ কে বাহির করিল, এ কাগজ কে বাহির করিল, বলিয়া একটা রব উঠিয়া গেল । যেমন ভাষার লালিত্য, তেমনি বিষয়ের গাভীরা । সংবাদ পত্রের এক নূতন পথ, বঙ্গসাহিত্যের এক নূতন যুগ প্রকাশ পাইল । বিজ্ঞানভূষণ জানিতেন তাঁহার উক্তির মূল্য কত । কাগজ সাপ্তাহিক হইল, কিন্তু মূল্য হইল বার্ষিক দশ টাকা ; তাহাও অগ্রিম দেয় । ইহাতেও সোমপ্রকাশ দেখিতে দেখিতে উঠিয়া গেল । ১৮৫৮ সালে প্রকাশিত হইলেও ১৮৬০ হইতে ১৮৭০ সালের মধ্যে সোমপ্রকাশের প্রভাব মাধ্যম্নিন রেখাকে অতিক্রম করিয়াছিল । সেই কারণেই এই কালের মধ্যে তাহার উল্লেখ করিলাম ।

সোমপ্রকাশের পর আরও অনেক বাঙ্গালা সাপ্তাহিক পত্র প্রকাশিত হইয়াছে ; ভাষার চটক ও রচনায় নিপুণতা আরও বাড়িয়াছে ; রাজনীতির চর্চা বহুগুণ বাড়িয়াছে ; কিন্তু তদানীন্তন সোমপ্রকাশের স্থান কেহই অধিকার করিতে পারেন নাই । ভিতরকার কথাটা এই, লিখিবার শক্তির উপর সংবাদ পত্রের

প্রভাব নির্ভর করে না, পশ্চাতে যে মানুষটা থাকে তাহারই উপরে অধিকাংশতঃ নির্ভর করে। সোমপ্রকাশের প্রভাবের মূল ছিলেন দ্বারকানাথ বিদ্যাভূষণ। সেই তেজস্বিতা, সেই মনুষ্যত্ব, সেই ঐকান্তিকতা, সেই কর্তব্য-পরায়ণতা, সেই সত্য-নিষ্ঠা পশ্চাতে ছিল বলিয়াই সোমপ্রকাশের প্রভাব দেশমধ্যে ব্যাপ্ত হইয়াছিল।

তৎপরে উল্লেখ যোগ্য সামাজিক ঘটনা হোমিওপেথি রাজ্যে ডাঃ মহেন্দ্রলাল সরকারের পদার্পণ ও তজ্জনিত আন্দোলন। কলিকাতা সহরে হোমিওপ্যাথির আবির্ভাব ও তৎসম্বন্ধে ওয়েলিংটন কোয়ার্টারের দত্ত পরিবারের প্রসিদ্ধ রাজা বাবুর কার্য বিষয়ে অগ্রেই কিঞ্চিৎ বিবরণ দিয়াছি। ডাক্তার বেরিগি সাহেবকে অবলম্বন করিয়া রাজাবাবু কার্যক্ষেত্রে প্রায় একাকী দণ্ডায়মান রহিয়াছিলেন। তাঁহারই সংশ্রবে আসিয়া অনেকগুলি যুবক হোমিওপ্যাথি চিকিৎসা প্রণালী অবলম্বন করিতেছিলেন। ইহাদের অনেকে পরে যশস্বী হইয়াছেন। তাঁহাদের মধ্যে অনেকে দেশ বিদেশে হোমিওপ্যাথির বার্তা লইয়া যাইতেছিলেন। ইতিমধ্যে এক ঘটনা ঘটিল যাহাতে কলিকাতার শিক্ষিত সমাজকে প্রবলরূপে আলোড়িত করিল; এবং তৎ সঙ্গে সঙ্গে হোমিওপ্যাথির পতাকাকে সর্বজননের চক্ষের সমক্ষে উড্ডীন করিল। তাহা ডাক্তার মহেন্দ্রলাল সরকারের হোমিওপ্যাথি প্রণালী অবলম্বন। এলোপ্যাথির সহিত তুলনায় হোমিওপ্যাথি উৎকৃষ্টতর লোকের এ সংস্কার যে জন্মিল তাহা নহে, কিন্তু মত পরিবর্তনের সময় ডাক্তার সরকারের যে তেজ, যে সত্যনিষ্ঠা, যে মনুষ্যত্ব লোকে দেখিল, তাহাই সকলের চিত্তকে বিশেষরূপে উত্তেজিত করিয়াছিল; এবং বহু-বাসীর মনে এক নব ভাব আনিয়া দিয়াছিল। এই সাহসী, সত্যপ্রিয় ও ধর্ম্মাহুয়াগী পুরুষের জীবন-চরিত পর পরিচ্ছেদে প্রদত্ত হইল।

তিনি ১৮৬৩ সালে কলিকাতা মেডিকেল কলেজ হইতে এম্, ডি, পরীক্ষাতে উত্তীর্ণ হইয়া সহরের অগ্রগণ্য চিকিৎসকদিগের মধ্যে স্থান প্রাপ্ত হন। ঐ সালেই প্রধানতঃ প্রসিদ্ধ ডাক্তার শুভীত চক্রবর্তীর প্রযত্নে, ব্রিটিশ মেডিকেল এসোসিয়েশনের বঙ্গদেশীয় শাখা নামে একটা শাখা সভা স্থাপিত হয়। ঐ সভার প্রতিষ্ঠার দিনে মহেন্দ্রলাল একটা বক্তৃতা করেন, তাহাতে হোমিওপ্যাথির নিন্দা করেন। ঐ নিন্দাবাদ রাজা বাবুর চক্ষে পড়িলে, তিনি মহেন্দ্রলালের সহিত বিচার করিতে আরম্ভ করেন। ইতিমধ্যে একজন বন্ধু ইণ্ডিয়ান ফীল্ড নামক কাগজের জন্ত মহেন্দ্রলালকে (Morgan) মর্গান সাহেবের লিখিত

হোমিওপেথি বিষয়ক গ্রন্থের সমালোচনা লিখিতে অনুরোধ করেন। সমালোচনার্থ ঐ গ্রন্থ পাঠ করিতে গিয়াই মহেন্দ্রলালের মনে হয় যে কার্য্যতঃ হোমিওপেথি চিকিৎসা কিরূপ তাহা না দেখিয়া সমালোচনা করা তাঁহার পক্ষে কর্তব্য নহে। অতএব তিনি রাজা বাবুর সহিত তাঁহার-কতকগুলি রোগীর চিকিৎসা দেখিতে আরম্ভ করেন। গ্রন্থ পাঠ করিতে করিতে এবং চিকিৎসা দেখিতে দেখিতে সরকার মহাশয়ের মত পরিবর্তিত হইয়া গেল। হোমিওপেথিক চিকিৎসা প্রণালীই উৎকৃষ্টতর প্রণালী বলিয়া মনে হইল। ১৮৬৬ সালের মধ্যে এই পরিবর্তন ঘটিল। যখন তিনি মত পরিবর্তনের বিশিষ্ট কারণ পাইলেন তখন সহরের এলোপেথিক চিকিৎসকদলে তাহার বার্তা প্রকাশ করিতে ক্রটি করিলেন না। ১৮৬৭ সালের ১৬ই ফেব্রুয়ারি দিবসে ব্রিটিশ মেডিক্যাল এসোসিয়েশনের চতুর্থ সাপ্তাহিক সভার অধিবেশন হইল। তাহাতে ডাক্তার সরকার এক বক্তৃতা পাঠ করিলেন, তাহাতে প্রচলিত চিকিৎসা প্রণালীর অনির্দিষ্টতা দোষ প্রদর্শন করিয়া হানিম্যান প্রদর্শিত প্রণালী উৎকৃষ্টতর বলিয়া ঘোষণা করিলেন। আর কোথায় যায়! সাপের লেজে যেন পা পড়িল! ডাক্তার ওয়ালার নামে একজন ইংরাজ ডাক্তার বলিলেন, “ডাক্তার সরকার থাম থাম, আর একটা কথা বলিলে তোমাকে এ ঘর হতে বাহির করে দেব।” তৎপরে সহরের এলোপেথি দল ডাক্তার সরকারকে একঘরে করিল; তিনি চিকিৎসক সভা কর্তৃক বর্জিত হইলেন, তিনি তাহা গ্রাহ্য করিলেন না। কলিকাতা তোলপাড় হইয়া যাইতে লাগিল। কিন্তু বঙ্গভূমি যেন এই বীরের পদভরে কাঁপিতে লাগিল। বাস্তবিক তাঁহার সত্যপ্রিয়তা ও মহুয্যত্ব তখন আমাদের ননকে অনেক উচ্চে তুলিয়াছিল। বিশ্বাস কর, বাঙ্গালি যে ভারতের সকল প্রদেশের মানুষের শ্রদ্ধার পাত্র হইয়াছে, তাহা এই সকল সত্যপ্রিয় তেজীমান্ বীরপ্রকৃতিবিশিষ্ট মানুষের গুণে।

মহেন্দ্রলাল সরকার স্বীয় চরিত্রের প্রভাবে হোমিওপেথিকে কিরূপ উঁচু করিয়া উঠাইলেন, তাহা সুপ্রসিদ্ধ বেরিগি সাহেবের একটা কথাতেই প্রকাশ। তিনি যখন এদেশ পরিত্যাগ করেন তখন তাঁহার হোমিওপাথ বন্ধগণ তাঁহার অভ্যর্থনার জন্ত এক সভা করিয়াছিলেন। উক্ত সভাতে ডাক্তার বেরিগি, অপরাপর কথা বলিয়া শেষে বলিলেন, “আমার আর এখানে থাকিবার প্রয়োজন নাই। হৃদ্য যখন উদ্ভিত হয় তখন চন্দ্রের অন্তগমনই শোভা পায়। মহেন্দ্র বঙ্গাকাশে উদ্ভিত হইয়াছেন, এখন আমার অন্তগমনের সময়!” অতএব

অপরূপ নৈতাঙ্গিণের ছায় মহেন্দ্রলাল সরকার ও সে সময়ে কলিকাতাবাসীর ও সেই সঙ্গে সমগ্র বঙ্গবাসীর চিত্তকে প্রবলরূপে আন্দোলিত করিয়াছিলেন ।

কেশবচন্দ্রের বক্তৃতা, দীনবন্ধুর নাটক, বঙ্কিমচন্দ্রের উপজ্ঞাস, বিজ্ঞানভূষণ মহাশয়ের সৌমপ্রকাশ, মহেন্দ্রলাল সরকারের হোমিওপেথি, এই সকলে এই কালের মধ্যে শিক্ষিত দলের মনে যেমন নবভাব আনিয়া দিতেছিল, তেমনি আর এক কার্যের আয়োজন হইয়া নব আকাঙ্ক্ষার উদয় করিয়াছিল । তাহা “ছাত্রাঙ্গাল পেপার” নামক সাপ্তাহিক পত্রের সম্পাদক নবগোপাল মিত্র মহাশয়ের প্রতিষ্ঠিত, ‘জাতীয় মেলা’ নামক মেলা ও প্রদর্শনীর প্রতিষ্ঠা এবং দেশের সকল বিভাগের ও সকল শ্রেণীর নেতৃবৃন্দের তাহার সহিত যোগ । বঙ্গসমাজের ইতিবৃত্তে ইহা একটা প্রধান ঘটনা ; কারণ সেই যে বাঙ্গালির মনে জাতীয় উন্নতির স্পৃহা জাগিয়াছে তাহা আর নিদ্রিত হয় নাই ।

নবগোপাল মিত্র মহাশয়ের হৃদয় স্বদেশ-প্রেমে পূর্ণ ছিল । তিনি বহুদিন হইতে অল্পভব করিয়া আসিতেছিলেন যে, দেশের লোকের দৃষ্টিকে বিদেশীয় রাজাদিগের প্রসাদ লাভের দিক হইতে ফিরাইয়া জাতীয় স্বাবলম্বনের দিকে আনা কর্তব্য । লোকে কথায় কথায় গবর্ণমেন্টের দ্বারস্থ হয়, ইহা তাঁহার সহ্য হইত না । এজন্য তিনি নিজ প্রচারিত সংবাদ পত্রে হুঃখ প্রকাশ করিতেন ; বন্ধু বান্ধবের নিকটে ক্ষোভ করিতেন ; এবং কি উপায়ে দেশের লোকের মনে জাতীয় স্বাবলম্বন প্রবৃত্তি প্রবল হয় সেই চিন্তা করিতেন । এই চিন্তার ফলস্বরূপ ১৭৮৮ শকের (১৮৬৭ খ্রীষ্টাব্দের) চৈত্র সংক্রান্তিতে হিন্দুমেলায় অধিবেশন হইল । গণেন্দ্রনাথ ঠাকুর মহাশয় সম্পাদক ও নবগোপাল মিত্র মহাশয় সহকারী সম্পাদক হইলেন । মেলার অধ্যক্ষগণ স্বদেশীয় উন্নতি, স্বদেশীয় সাহিত্যের বিকাশ, স্বদেশীয় সংগীতাদির চুর্কা, স্বদেশীয় কুন্তী প্রভৃতির পুনর্বিকাশ, প্রভৃতির উৎসাহ দান করিবার জন্য প্রতিজ্ঞাবদ্ধ হইলেন । বর্ষে বর্ষে চৈত্র সংক্রান্তিতে একটা মেলা খোলা হি়র হইল । দেশের অনেক মান্য গণ্য ব্যক্তি এইজন্য অর্থ সাহায্য করিতে অগ্রসর হইলেন । উৎসাহদাতাদিগের মধ্যে রাজা কমলকৃষ্ণ বাহাদর, বাবু রমানাথ ঠাকুর, বাবু কানীধর মিত্র, বাবু চুর্গাচরণ লাহা, বাবু পান্নাচরণ সরকার, বাবু গিরিশচন্দ্র ঘোষ, বাবু কৃষ্ণদাস পাল, বাবু রাজনারায়ণ বসু, বাবু বিজেন্দ্রনাথ ঠাকুর, পণ্ডিত জয়নারায়ণ তর্কপঞ্চানন, পণ্ডিত ভারতচন্দ্র শিরোমণি, পণ্ডিত তারানাথ তর্কবাচস্পতি, প্রভৃতির নামের উল্লেখ দেখা যায় ।

অতএব উদ্যোগকর্তৃগণ সকল বিভাগের মাহুষকে সম্মিলিত করিতে ক্রটি করেন নাই ।

১৮৬৮ সালে বেঙ্গলাছয়ার সাতপুকুরের বাগানে মহাসমারোহে মেলার দ্বিতীয় অধিবেশন হয় । সেই দিন সত্যেন্দ্রনাথ ঠাকুর মহাশয়ের প্রণীত সুপ্রসিদ্ধ জাতীয় সংগীত “গাও ভারতের জয়” সুগায়কদিগের দ্বারা গীত হয় ; আমরা কয়েকজন জাতীয় ভাবের উদ্দীপক কবিতা পাঠ করি ; গণেন্দ্রনাথ ঠাকুর ও নবগোপাল মিত্র মহাশয় মেলার উদ্দেশ্য সকলকে বুঝাইয়া দেন ; এবং স্বজাতি-প্রেমিক সাহিত্যজগতে সুপরিচিত মনোমোহন বসু মহাশয় একটা হৃদয়গ্রাহী বক্তৃতা পাঠ করেন । মেলার প্রথম সম্পাদক গণেন্দ্রনাথ ঠাকুর মহাশয় মেলার উদ্দেশ্য এই ভাবে বর্ণন করেন—“ভারতবর্ষের এই একটা প্রধান অভাব যে, আমাদের সকল কার্যেই আমরা রাজপুরুষগণের সাহায্য যাক্রা করি, ইহা কি সাধারণ লজ্জার বিষয় ! কেন, আমরা কি মনুষ্য নহি ? * * * অতএব যাহাতে এই আত্মনির্ভর ভারতবর্ষে স্থাপিত হয়, ভারতবর্ষে বঙ্গমূল হয়, তাহা এই মেলার দ্বিতীয় উদ্দেশ্য ।” সংক্ষেপে বলিতে গেলে জাতীয় স্বাবলম্বন প্রবৃত্তিকে জাতীয় চিন্তে উদ্দীপ্ত করাই হিন্দুমেলায় উদ্দেশ্য ছিল । সুখের বিষয় এই মেলার আয়োজনের দ্বারা সে উদ্দেশ্য বহুল পরিমাণে সাধিত হইয়াছে । ইহার পরে মনোমোহন বসু প্রভৃতি জাতীয় সংগীত রচনা করিতে লাগিলেন ; আমরা জাতীয় ভাবোদ্দীপক কবিতা রচনা করিতে লাগিলাম ; বিক্রমপুর হইতে দ্বারকানাথ গঙ্গোপাধ্যায় আসিয়া আমাদের জাতীয় ভাবে যোগ দিলেন ; এবং আগ্রার আনন্দচন্দ্র রায়, সংগীত রচনা করিয়া হুঃখ করিলেন ;—

কত কাল পরে বল ভারত রে !

হৃৎসাগর সাঁতারি পার হবে ; ইত্যাদি ।

দেখিতে দেখিতে স্বদেশপ্রেম সর্বত্র ব্যাপ্ত হইয়া পড়িল । ১৮৬৮ সালের পরেও হিন্দুমেলায় কাজ অনেক দিন চলিয়াছিল । নবগোপাল বাবু ইহাকে জীবিত রাখিবার চেষ্টা করিয়াছিলেন । ক্রমে তাহা উঠিয়া যায় ।

এই ১৮৬০ হইতে ১৮৭০ সালের মধ্যে কেবল যে কলিকাতা সমাজ নানা তরঙ্গে আন্দোলিত হইতেছিল তাহা নহে । বঙ্গদেশের অপরাপর প্রধান প্রধান স্থানেও আন্দোলন চলিতেছিল । তন্মধ্যে পূর্ববঙ্গের প্রধান স্থান ঢাকা

সর্বপ্রথমে উল্লেখযোগ্য । বলিতে গেলে পূর্ববঙ্গের সামাজিক আন্দোলন বহু পূর্ব হইতেই আরম্ভ হইয়াছিল । কলিকাতাতে হিন্দুকালেজের প্রতিষ্ঠা ও ডিরোজিওর শিষ্যদলের অভ্যাস দ্বারা সমাজক্ষেত্রে যেমন একদল প্রাচীন-বিদ্যেবী শিক্ষিত যুবককে আবির্ভূত করিয়াছিল সেইরূপ ঢাকাতেও শিক্ষিত যুবকদের মধ্যে এক সংস্কারার্থী দল দেখা দিয়াছিল । কলিকাতাতে যেমন প্রথম শিক্ষিত দলের অগ্রগীর্ণ কে মুসলমানের দোকানে প্রবেশ করিয়া রুটী আনিতে ও খাইতে পারে তাহা দেখিবার চেষ্টা করিতেন, তেমনি ঢাকাতেও প্রথম শিক্ষিত ব্যক্তিদিগের অগ্রগীর্ণ এই পরীক্ষা করিতেন যে কে মুসলমানের রুটী খাইতে পারে বা কে চন্দ্রপাট্টকার উপরে সন্দেশ রাখিয়া সর্বাগ্রে তুলিয়া খাইতে পারে ।

ক্রমে ঢাকা কলেজ স্থাপিত হইয়া শিক্ষিতদের সংখ্যা যতই বাড়িতে লাগিল, এবং কলিকাতার আন্দোলনের তরঙ্গ সকল যতই পূর্ব বঙ্গে ব্যাপ্ত হইতে লাগিল, ততই ঢাকা সহরে নব নব কার্যের স্রোত হইতে লাগিল । ব্রাহ্মসমাজ স্থাপন, বালিকা বিদ্যালয় স্থাপন, বিধবা বিবাহের আন্দোলন প্রভৃতি সকল আন্দোলনই ক্রমে ক্রমে দেখা দিল ।

এই প্রথম শিক্ষিত উৎসাহী যুবকবৃন্দের মধ্যে পরলোকগত সুপ্রসিদ্ধ ডেপুটী মাজিষ্ট্রেট রামশঙ্কর সেন, ভগবানচন্দ্র বসু, অভয়াচরণ দাস, ঈশ্বর চন্দ্র সেন, অভয়াকুমার দত্ত, জুল সমুহের ইনস্পেক্টর দীননাথ সেন, ও পরবর্তী সময়ের কালীপ্রসন্ন ঘোষ প্রভৃতি অনেকে প্রসিদ্ধি লাভ করিয়াছেন । কিন্তু পূর্ববঙ্গে ধর্ম ও সমাজ সংস্কার বিষয়ে সর্বাপেক্ষা একাগ্রতা দেখাইয়া ছিলেন, দুই ব্যক্তি । প্রথম ব্রাহ্মসমাজের প্রতিষ্ঠা কর্তা ব্রজসুন্দর মিত্র, দ্বিতীয় কোলীন্দ্ৰ প্রথার সংস্কার প্রয়াসী রাসবিহারী মুখোপাধ্যায় । ব্রজসুন্দর মিত্র মহাশয় ১৮৪৭ সালে নিজে ব্রাহ্মধর্মে দীক্ষিত হইয়া নিজ ভবনে ব্রাহ্মসমাজ স্থাপন করেন ; এবং অপরেরা অগ্রসর হইয়া তাহার ভার আপনাদের হস্তে গ্রহণ না করা পর্যন্ত নিজেই তাহার ভার বহন করেন । এই কালের মধ্যে ঢাকাতেও ব্রাহ্মসমাজের নবোত্থান ও তৎসঙ্গে সঙ্গে সর্ববিধ সামাজিক উন্নতি বিষয়ক বিষয়ের আন্দোলন দৃষ্ট হইয়াছিল ; এবং অভয়াচরণ দাস, দীননাথ সেন, কালীপ্রসন্ন ঘোষ প্রভৃতি স্বদেশের উন্নতি সাধনে দেহ মন নিয়োগ করিয়া-ছিলেন । ইহারা সকলেই সে সময়ে ব্রাহ্মসমাজের সহিত সংশ্লিষ্ট ছিলেন । ব্রাহ্মসমাজই সে সময়ে প্রবল সামাজিক শক্তির উৎস স্বরূপ হইয়াছিল । সেই

ব্রাহ্মসমাজের প্রতিষ্ঠা-কর্তা ব্রজসুন্দর মিত্র মহাশয়ের সংক্ষিপ্ত জীবনবৃত্ত দেওয়া যাইতেছে:—

ব্রজসুন্দর মিত্র।

এই সাধু পুরুষ বাঙ্গালা ১২২৭ সালে জন্মগ্রহণ করেন। পিতৃহীন হইয়া তাঁহাকে বাল্যকাল পরাশ্রয়ে ও পরগৃহে যাপন করিতে হয়। তৎপরে ইংরাজী শিক্ষার মানসে কলিকাতায় আসিয়া ঘোর দারিদ্র্যে ও কঠোর সংগ্রামে কাল যাপন করেন। শিক্ষা সাধ্য করিবার পূর্বেই সামান্য বেতনে কার্য্য আরম্ভ করেন। কিন্তু তাঁহাতে এক্রূপ স্বাভাবিক ধর্মভীরুতা ও কর্তব্যপরায়ণতা ছিল যে অচিরকালের মধ্যে উত্তরোত্তর পদোন্নতি হইয়া তিনি উচ্চপদে আরোহণ করেন। পদের উন্নতির সঙ্গে সঙ্গে স্বদেশের উন্নতির বাসনা তাঁহার মনে প্রবল হইতে থাকে। তাঁহার দৃষ্টি প্রথম ব্রাহ্মসমাজের দিকে আকৃষ্ট হয়। ১২৫৩ বা ১৮৪৭ সালে, তিনি কতিপয় বন্ধুকে উৎসাহিত করিয়া ঢাকা নগরে একটি ব্রাহ্মসমাজ স্থাপন করিলেন; এবং আত্মীয় স্বজনের নিবারণ ও ভয় প্রদর্শনের মধ্যে তাহার কার্য্য নির্বাহ করিতে লাগিলেন। কলিকাতা হইতে দেবেন্দ্রনাথ ঠাকুর মহাশয় বিবিধ প্রকারে সহায়তা করিতে প্রবৃত্ত হইলেন।

ইহার পরে মিত্রজ মহাশয় সার্ভে ডেপুটি কালেকটরের পদে উন্নীত হইয়া কুমিল্লা প্রভৃতি স্থানে গমন করেন। তাহাতে কিছু দিনের জন্ত ব্রাহ্মসমাজের অবনাদ উপস্থিত হয়। ইহা দেখিয়া তিনি নিজ বাসের জন্ত ঢাকাতে একটি বাড়ী ভাড়া করেন এবং তাহার একাংশ ব্রাহ্মসমাজের কার্য্যের জন্ত রাখেন। সেই সময়ে তাঁহারই উৎসাহে এবং দীননাথ সেন মহাশয়ের চেষ্টায় ঢাকা ব্রাহ্মসমাজের অধীনে একটি স্কুল স্থাপিত হয়; এবং কলিকাতা সমাজ হইতে প্রচারক অবদারনাথ গুপ্ত ঐ স্কুলের একজন শিক্ষক রূপে এবং বিজয়কৃষ্ণ গোস্বামী তাঁহার সহকারী রূপে প্রেরিত হন। ইহা বোধ হয় ১৮৬১ কি ১৮৬২ সালে ঘটিয়া থাকিবে। এই প্রচারক দ্বয়ের আবির্ভাব পূর্ববঙ্গের যুবকদলে নবভাবের উদ্বীপনা করিল। তাহার দলে দলে ব্রাহ্মসমাজের দিকে আকৃষ্ট হইতে লাগিল। ঢাকাতে মহা আন্দোলন উপস্থিত হইল।

এই আন্দোলন দেখিয়া প্রাচীনদলের ব্রাহ্মদিগের মধ্যে অনেকে সমাজের কার্য্যে নিরুৎসাহ হইলেন; কিন্তু ব্রজসুন্দর বাবু পশ্চাৎপদ হইলেন না। তিনি সমান ভাবে যোগ দিয়া রহিলেন। কলিকাতাতে বিধবাবিবাহের

আন্দোলন উপস্থিত হইলে তিনি বিদ্যাশাগর মহাশয়ের প্রণীত পুস্তক সকল নিজ ব্যয়ে মুদ্রিত করিয়া পূর্ববঙ্গে বিতরণ করিয়াছিলেন। তাহার ফলস্বরূপ এই কালের কিঞ্চিৎ পূর্বে পূর্ববঙ্গের শিক্ষিতদের মধ্যে একটি বিধবাবিবাহের দল দেখা দেয়। তাঁহারা কতিপয় ব্যক্তি স্বীয় স্বীয় নাম স্বাক্ষর করিয়া এই সংস্কারকার্যের জন্য প্রতিজ্ঞাবদ্ধ হইয়াছিলেন; এবং তাঁহাদের মধ্যে যিনি যেখানে গিয়াছেন, এই সংস্কারের পক্ষপাতিত্ব করিয়াছেন।

১৮৬২ সালে ব্রজসুন্দর বাবু স্বীয় বিধবা কন্যার বিবাহ দিবসে জন্ম সকল আয়োজন করেন, কেবল তাঁহার জননী উদ্বুদ্ধনে প্রাণত্যাগ করিতে উদ্বৃত্ত হওয়াতেই সে কার্য্য হইতে নিবৃত্ত হইতে হয়। এস্থলে ইহা উল্লেখযোগ্য যে উক্তকালে জননী পরলোকগতা হইলে তিনি স্বীয় কন্যাগণকে সুশিক্ষিতা করিয়া ব্রাহ্মধর্মের পদ্ধতি অনুসারে বিবাহ দিয়াছিলেন।

বোধ হয় এই সময়েই ব্রজসুন্দর বাবুর উৎসাহেও তাঁহার বন্ধুগণের সাহায্যে ঢাকাতে একটি বালিকাবিদ্যালয় স্থাপিত হয়, যাহা পরে ১৮৭৫ সাল হইতে ‘ইডেন ফিমেল স্কুল’ নামে পরিচিত হইয়াছে। ঢাকাতে স্ত্রীশিক্ষা বিষয়ে কিরূপ আন্দোলন উঠিয়াছিল তাহার প্রমাণ কালীপ্রসন্ন ঘোষ মহাশয়ের প্রণীত “নারীজাতি-বিষয়ক প্রস্তাব” নামক গ্রন্থ। ঐ গ্রন্থ পাঠ করিয়া নারীজাতির উন্নতি-প্রয়াসী ব্যক্তিগণ এক সময়ে প্রভূত বল লাভ করিয়াছিলেন। ১৮৬৪ সালে ব্রজসুন্দর বাবু স্বীয় গ্রামে একটি বালিকা-বিদ্যালয় স্থাপন করেন; এবং অপরাপর প্রকারে কুমিল্লা প্রভৃতি স্থানে স্ত্রীশিক্ষা বিস্তারে প্রবৃত্ত থাকেন। এই রূপে নানা সংকার্য্যে রত থাকিতে থাকিতে তিনি ১২৮২ সালে স্বর্গারোহণ করেন।

অঘোরনাথ গুপ্ত ও বিজয়কৃষ্ণ গোস্বামী ঢাকাতে যে তরঙ্গ তুলিয়া দিয়াছিলেন তাহা আর থামিল না। কলিকাতার অহুকরণে ঢাকাতেও যুবকদের জন্ম একটি সঙ্গত সভা স্থাপিত হইল; এবং সেই সঙ্গতে বসিয়া যুবকগণ নব মস্ত্রে দীক্ষিত হইতে লাগিলেন।

এই ক্ষেত্রে কেশবচন্দ্র সেন মহাশয়ের আবির্ভাব হইল। ১৮৬৫ সালে তিনি ঢাকাতে পদার্পণ করিলেন। যে উন্মাদিনী বক্তৃতাশক্তি কলিকাতার যুবকদলকে ফেপাইয়া তুলিয়াছিল তাহা ঢাকা ও ময়মনসিংহের যুবকগণকে মাতাইয়া তুলিল। দলে দলে যুবক ব্রাহ্মসমাজের দিকে ধাবিত হইল। ইহার মধ্যে একটি মুসলমান যুবককে লইয়া তুসুল আন্দোলন উপস্থিত হইল। ঢাকা সঙ্গতের অগ্রসর সভাগণ তাঁহাকে লইয়া পান ভোজন করিতে প্রবৃত্ত হইলেন।

তাহা লইয়া ঘরে ঘরে বিবাদ বাধিয়া গেল । ব্রাহ্মদের ধোপা নাপিত বন্ধ হইল । এমন কি মাঝি মাঝারাও অনেক স্থলে তাহাদিগকে নৌকাতে তুলিতে ভয় পাইতে লাগিল । কিন্তু কিছুতেই ব্রাহ্মসমাজের শক্তিকে থর্ব করিতে পারিল না । এই সকল আন্দোলনের মধ্যে ঢাকায় নূতন উপাসনা মন্দির নির্মিত হইল, এবং ১৮৬৯ সালের শেষভাগে কেশবচন্দ্র সেন মহাশয় গিয়া সেই মন্দির প্রতিষ্ঠা করিলেন ।

১৮৬০ হইতে ১৮৬৯ সালের মধ্যে ঢাকাতে যেমন এক দিকে ব্রাহ্মসমাজের অভ্যুদয় হইয়া ধর্মোন্দোলন উপস্থিত হইল, তেমনি সর্ববিধ সমাজ-সংস্কার কার্যো উৎসাহ দৃষ্ট হইতে লাগিল । কলিকাতার সোমপ্রকাশের ন্যায় “ঢাকা প্রকাশ” নামক সাপ্তাহিক পত্র প্রকাশিত হইয়া গোবিন্দপ্রসাদ রায় নামক একজন উদারচেতা ব্যক্তির হস্তে গুপ্ত হইল । তিনি উন্নতি-শীল দলের মুখপাত্র স্বরূপ হইয়া ইহাতে সর্ববিধ অগ্রসর মত প্রকাশ করিতে লাগিলেন ।

কেশবচন্দ্রের আবির্ভাব, ব্রাহ্মসমাজের সঙ্গত, ব্রাহ্ম যুবকদিগের সাহসিকতা, এই সকলে প্রাচীন হিন্দুসমাজকে জাগাইয়া তুলিল । হিন্দুধর্মের রক্ষার জন্ত হিন্দুধর্ম রক্ষণী সভা, ও “হিন্দু হিতৈষিনী” নামক সাপ্তাহিক কাগজ বাহির হইল । একদিকে “ঢাকা প্রকাশ” অপর দিকে ‘হিন্দু হিতৈষিনী’ এই উভয় পত্রে পূর্ববঙ্গবাসীদিগকে সজাগ করিয়া তুলিল ।

এই কালের মধ্যে আর এক ব্যক্তি পূর্ব-বঙ্গসমাজকে বিশেষরূপে আন্দোলিত করিতে আরম্ভ করিয়াছিলেন । তাঁহার নাম রাসবিহারী মুখোপাধ্যায় । ইনি কোলীজ ও বহুবিবাহপ্রথার উন্মূলনের জন্ত বদ্ধপরিকর হইয়া মহা সংগ্রাম করিয়াছিলেন । ইহার জীবনের সংক্ষিপ্ত বিবরণ এই ;—

রাসবিহারী মুখোপাধ্যায় ।

১২৩২ বঙ্গাব্দে বিক্রমপুরের অন্তর্গত তারপাশা গ্রামে রাসবিহারী মুখোপাধ্যায়ের জন্ম হয় । অতি শৈশবেই ইনি পিতৃহীন হইয়া স্বীয় পিতৃব্যের আশ্রয়ে বর্দ্ধিত হন । বিজ্ঞা শিক্ষার ভাল বন্দোবস্ত না হওয়াতে ইংরাজী শিক্ষা দূরে থাকুক, বাঙ্গালা শিক্ষাও ভাল হয় নাই । ইহার পিতৃব্যও বোধ হয় সম্পন্ন অবস্থার লোক ছিলেন না ; তিনি দারিদ্র্যের তাড়নায়, স্বীয় কোলীজের সাহায্যে ভ্রাতৃপুত্রকে ৮টা কুলীন কন্ডার সহিত পরিণীত করেন । কিম্বৎকাল পরে কিঞ্চিৎ ঋণভার মত্তকে গইয়া রাসবিহারীকে স্বীয় পিতৃব্য

হইতে পৃথক হইতে হয়। এই অবস্থাতে ঘোর দারিদ্র্যে পড়িয়া রাসবিহারী আরও ছয়টা কুলীন কন্ঠার পাণিগ্রহণ করেন; এবং অর্থোপার্জনের আশয়ে ময়মনসিংহের কোনও জমিদারের অধীনে তহসিলদারী কর্ষে নিযুক্ত হন।

ঐ কাজ করিতে করিতে তাঁহার হৃদয় মনের পরিবর্তন উপস্থিত হয়। শুনিতে পাওয়া যায় বাণ্যাকাল হইতেই তাঁহার কবিতা রচনা করিবার ও গান বাধিবার বাতিক ছিল। তাহা দ্বারা প্রেরিত হইয়া তিনি বাঙ্গালা ভাষার চর্চা করিতে এবং কবিতাদি প্রণয়ন করিতে আরম্ভ করেন। উপস্থাপিত কয়েকখানি কবিতাগ্রন্থও প্রণয়ন করেন, এবং তাহার কয়েকখানি শিক্ষাবিভাগেও জ্ঞাদৃত হয়। অবশেষে বিদ্যাসাগর মহাশয়ের ‘সীতার বনবাস’ পাঠ করিয়া তাঁহার হৃদয় নারীজাতির হৃৎথে কাঁদিয়া উঠে; এবং শুনিতে পাওয়া যায় তিনি তাহার সারাংশ বাঙ্গালা কবিতাতে গ্রথিত করেন। এই সময় হইতে কুলীন কন্ঠাদিগের হৃৎথের প্রতি তাঁহার দৃষ্টি পড়ে এবং তিনি তাহাদের হৃৎথ বর্ণনা করিয়া সংগীত রচনা পূর্বক গ্রামে গ্রামে, কুলীনদিগের প্রধান প্রধান স্থানে, ভ্রমণ করিতে আরম্ভ করেন।

১২১৫ বঙ্গাব্দে তিনি আপনার হৃদয় ভাব “বঙ্গালী-সংশোধিনী” নামে একটা বক্তৃতাতে প্রকাশ করিয়া তাহা মুদ্রিত করিলেন! চারিদিকে আন্দোলন উঠিয়া গেল। এই নেশা তাঁহাকে দিন দিন এতই ঘিরিয়া লইতে লাগিল যে, তিনি আপনার তহসিলদারী কর্ষ আর রাখিতে পারিলেন না; সামান্য গ্রন্থাদির আয়ের উপর নির্ভর করিয়া দ্বারে দ্বারে সভা সমিতিতে ঐ একই কথা বলিয়া ফিরিতে লাগিলেন। প্রথম প্রথম ব্রাহ্মণ সমাজে তিনি সর্বত্রই নির্বাতন ভোগ করিতে লাগিলেন; কিন্তু পরিণামে তাঁহার বিপ্লবচিন্তা ও চিন্তের একাগ্রতা দেখিয়া শিক্ষিত ব্যক্তিগণ তাঁহার পৃষ্ঠপোষক হইয়া উঠিলেন। “ঢাকা প্রকাশ” “হিন্দুইতিষিণী” প্রভৃতি, এবং কলিকাতা হইতে পণ্ডিতবর ঈশ্বরচন্দ্র বিদ্যাসাগর ও “সনাতনধর্ম্মরক্ষিণী সভা” প্রভৃতি তাঁহার সপক্ষতা করিতে প্রবৃত্ত হইলেন। বিদ্যাসাগর মহাশয়ের উৎসাহে ও সাহায্যে বহুবিবাহ নিষেধ করিবার জন্য গবর্ণমেন্টের নিকট এক আবেদন প্রেরিত হয়, হৃৎথের বিষয় তাহা কার্য্যে পরিণত হয় নাই।

রাসবিহারী মুখোপাধ্যায় মহাশয় কেবল মুখে সমাজ সংস্কারের উপদেশ দিয়া নিরস্ত হন নাই। ১২৮২ সালে কুলের পর্য্যায় ভঙ্গ করিয়া নিজ কন্ঠার বিবাহ দেন। তৎপরে ১২৮৪ সালে আবার মেল ভঙ্গ করিয়া স্বীয় পুত্র ও

কন্যার বিবাহ দেন। সন্দেহান্ত বৃথা যায় না। শুনিতে পাওয়া যায় ইহার অল্প পরেই ১২ জন নৈকম্য কুলীন, ও ৮ জন শ্রোত্রীয় তাঁহার পদবীর অঙ্গসরণ করেন। এই সকল সংস্কার কার্যে ত্রতী থাকিতে থাকিতে ১৩০১ সালে মুখোপাধ্যায় মহাশয় স্বর্গারোহণ করেন। ভয় হয় তাঁহার সঙ্গে সঙ্গে উক্ত সংস্কার কার্য বা বিলীন হইয়া গেল। এ সকল ঘটনা পরবর্তী সময়ে ঘটিলেও এখানে উল্লেখ করিলাম।

এই কালের মধ্যে পূর্ববঙ্গের অপরাপর স্থানেও ধর্ম ও সমাজ সংস্কারের আন্দোলন দৃষ্ট হইয়াছিল। তন্মধ্যে বরিশাল সর্বপ্রধানরূপে উল্লেখযোগ্য। পরবর্তীকালের হাইকোর্টের প্রসিদ্ধ উকীল দুর্গামোহন দাস মহাশয় এই সময়ে বরিশালে ওকালতি করিতেন। তিনি সর্ববিধ ধর্ম ও সমাজ সংস্কারের অমুরাগী লোক ছিলেন। তাঁহার প্রকৃতিতে এই একটা গুণ ছিল যে, তিনি আধাআধি কোনও কাজ করিতে পারিতেন না। বাহা ভাল বলিয়া বুঝিতেন তাহা প্রাণ দিয়া করিতেন, ক্ষতিলাভ গণনা করিতেন না। ব্রাহ্মধর্মের প্রতি যখন তাঁহার অমুরাগ জন্মিল তখন তিনি বরিশালে ব্রাহ্মধর্মের প্রতিষ্ঠার জন্ত দৃঢ়সংকল্প হইলেন। স্বীয় ব্যয়ে কলিকাতা হইতে কতিপয় ব্রাহ্মপ্রচারককে সপরিবারে বরিশালে লইয়া গেলেন; এবং তাঁহাদিগের দ্বারা ব্রাহ্মধর্ম প্রচার ও ব্রাহ্মপরিবারের নারীগণের শিক্ষার উন্নতি বিধান করিবার চেষ্টা করিতে লাগিলেন। নবব্রাহ্মপ্রচারকদিগের সমাগমে, ব্রাহ্মসমাজ প্রতিষ্ঠিত হইয়া বরিশালে আশুপদ জলিয়া উঠিল। অগ্রসর সংস্কারকগণ বিধবাবিবাহ, অসবর্ণ বিবাহ, জীজ্ঞাতিকে সামাজিক স্বাধীনতা দান, প্রভৃতি সর্ববিধ সংস্কার কার্যে হস্তার্পণ করিতে লাগিলেন। অনেক বিধবার বিবাহ কার্য সমাধা হইল; তন্মধ্যে দুর্গামোহন দাস মহাশয়ের বিমাতার বিবাহ সর্বপ্রধানরূপে উল্লেখযোগ্য। নিজে উদ্ভোগী হইয়া বিমাতার বিবাহ দেওয়া ইহার পূর্বে ঘটে নাই, হয় ত পূর্বে কেহ স্বপ্নেও দেখে নাই। এই কার্যে শুধু বরিশাল কেন সমগ্র বঙ্গদেশ আন্দোলিত হইয়া বাইতে লাগিল। তৎপরে লাখুটিয়ার জমিদার পরিবারের একজন যুবক স্বীয় সহধর্মিণীকে লইয়া জেলার কমিশনের সাহেবের বাড়ীতে আহার করিতে গেলেন। তাহা লইয়াও সংবাদপত্রে মহা আন্দোলন চলিল। বলিতে কি সেই যে বরিশাল পূর্ববঙ্গের মধ্যে প্রধান স্থান অধিকার করিয়াছে, এখনও সে স্থান হইতে ভ্রষ্ট হয় নাই। এই সমুদয় চেষ্টা ও আন্দোলন প্রধানতঃ ১৮৬০ হইতে ১৮৭০ পর্যন্ত, এই কালের মধ্যে ঘটিয়াছিল।

এই কালের মধ্যে উত্তরবঙ্গের রঙ্গপুর বিভাগে যে জাতীয় জীবনের সঞ্চার দেখা গিয়াছিল তাহাও বিস্মৃত হওয়া কর্তব্য নহে। পূর্বেই উক্ত হইয়াছে যে মহাত্মা রাজা রামমোহন রায় বিষয় কৰ্ম হইতে অবসৃত হইয়া কলিকাতাতে বসিবার পূর্বে রঙ্গপুরকেই নিজ কার্যক্ষেত্র করিয়াছিলেন। তখন রঙ্গপুর মাথা তুলিয়া উঠিতেছিল। মধ্যে কেন যে রঙ্গপুর কিছুদিন পশ্চাতে পড়িয়াছিল তাহা বলিতে পারি না। যাহা হউক রঙ্গপুর বিভাগে জাতীয় উন্নতির চেষ্টা কখনই বিরত হয় নাই। ১৮৩২ খ্রীষ্টাব্দে লর্ড উইলিয়াম বেটিক বাহাদুর রঙ্গপুরে গমন করেন। সেই সুযোগ পাইয়া রঙ্গপুরের মাজিষ্ট্রেট মিষ্টার জাথানিয়েল জমিদারগণকে উৎসাহিত করিয়া “রঙ্গপুর জমিদার দিগের স্কুল” নামে একটা স্কুল স্থাপন করেন। কলিকাতাতে বিশ্ববিদ্যালয় স্থাপিত হওয়ার পরে কয়েক বৎসর ধরিয়া ঐ জমিদারস্কুলের ছাত্রগণ বিশ্ব-বিদ্যালয়ের পরীক্ষায় উত্তীর্ণ হইতে অসমর্থ হওয়াতে, এই কালের প্রথম ভাগে, গবর্ণমেন্ট নিজে ঐ স্কুলের ভার লইয়া তাহাকে রঙ্গপুর জেলা স্কুলে পরিণত করেন। তৎপরে পরবর্তী সময়ে ঐ স্কুলকে হাই স্কুলে পরিণত করা হইয়াছিল, পরে কালেজ ক্লাস আবার উঠাইয়া দেওয়া হইয়াছে।


রঙ্গপুরে ইংরাজী শিক্ষা বিস্তারের সঙ্গে সঙ্গে অপরাপর দিকেও উন্নতির স্পৃহা দৃষ্ট হইতে থাকে। ১৮৪৬ খ্রীষ্টাব্দে সত্যপুকুরিগীর জমিদার রাজমোহন রায় চৌধুরী মহাশয় প্রথম মুদ্রাবল্লী স্থাপন করেন, এবং “রঙ্গপুর বার্তাবহ” নামে এক সাপ্তাহিক সংবাদপত্র প্রকাশ করিতে আরম্ভ করেন। এই রঙ্গপুর বার্তাবহ পয়ে কাকিনার জমিদার শম্ভুচন্দ্র রায় চৌধুরী মহাশয়ের হস্তে যায় এবং তিনি ইহাকে “রঙ্গপুর দিক্ প্রকাশ” নামে প্রকাশ করিতে আরম্ভ করেন। যে কালের আলোচনা করিতেছি সে সময়ে কাকিনাই রঙ্গপুরের মধ্যে জানালোচনা ও সদলুষ্ঠানাদির জন্ত প্রধান স্থান হইয়া উঠে। প্রথমে শম্ভুচন্দ্র, তৎপরে তাঁহার পুত্র রাজা মহিমারঞ্জন, ঐ স্থাতি অৰ্জনের প্রধান কারণ হইয়া উঠেন। শম্ভুচন্দ্রের সমুদয় কীর্তির উল্লেখ নিম্নয়োজন। বাঙ্গালা ১২৭০ সালে মহিমারঞ্জন কাকিনাতে এক বালিকা-বিদ্যালয় স্থাপন করেন। ১২৭৫ বঙ্গাব্দে কাকিনা ব্রাহ্মসমাজ স্থাপিত হয়। ব্রাহ্মসমাজ রঙ্গপুরেও ব্যাপ্ত হইয়া ইহাকে উজ্জীবিত করে। ক্রমে রঙ্গপুর সহরেও একটা ব্রাহ্মসমাজ স্থাপিত এবং ব্রহ্মমন্দির নির্মিত হয়। মধ্যে রঙ্গপুরে জাতীয় জীবনের কিঞ্চিৎ স্নানতা হইয়াছিল। আবার রঙ্গপুর মাথা তুলিয়া উঠিতেছে।

একাদশ পরিচ্ছেদ ।

লাহিড়ী মহাশয় যখন রূপাঙ্গনা হইতে বরিশাল ও বরিশাল হইতে কৃষ্ণনগরে বদলী হইয়া শারীরিক অসুস্থতা বশতঃ শিক্ষকতা কার্য্য হইতে অবসর গ্রহণের জন্ত অপেক্ষা করিতে লাগিলেন, সেই কালের মধ্যে বঙ্গ-সমাজে পাঁচটা প্রবল শক্তি দেখা দিল। ইহার আভাস পূর্ব্ব পরিচ্ছেদে কিঞ্চিৎ দিয়াছি। প্রথম শক্তি কেশবচন্দ্র সেনের অভ্যুদয়, দ্বিতীয় শক্তি দীনবন্ধু মিত্রের নাট্যকাব্যের অভ্যুদয়; তৃতীয় শক্তি বঙ্গসাহিত্যে বঙ্কিমচন্দ্রের আবির্ভাব; চতুর্থ শক্তি সোমপ্রকাশের অভ্যুদয়; পঞ্চম শক্তি চিকিৎসা-জগতে ডাক্তার মহেন্দ্রলাল সরকারের অভ্যুদয়। পাঁচটা মানুষ, কেশবচন্দ্র সেন, দীনবন্ধু মিত্র, বঙ্কিমচন্দ্র চট্টোপাধ্যায়, দ্বারকানাথ বিদ্যাভূষণ ও মহেন্দ্রলাল সরকার এই কালের মধ্যে বঙ্গবাসীর চিত্তকে বিশেষরূপে অধিকার করিয়াছিলেন। এই পরিচ্ছেদে ইহাদের সংক্ষিপ্ত জীবন-চরিত দেওয়া যাইতেছে;—

কেশবচন্দ্র সেন ।

কেশবচন্দ্র সেন হুগলী জেলাহু গঙ্গাতীরবর্ত্তী গোবীন্দ-নিবাসী ও কলিকাতার কলুটোলা-প্রবাসী সুপ্রসিদ্ধ রামকমল সেন মহাশয়ের পৌত্র ও তাঁহার দ্বিতীয় পুত্র প্যারীমোহন সেনের দ্বিতীয় পুত্র। ১৮৩৮ সালের ৫ই অগ্রহায়ণ দিবসে কলুটোলাহু ভবনে ইহার জন্ম হয়। ষাঁহার প্যারীমোহন সেনকে দেখিয়াছেন, তাঁহার বাল্যে যে তিনি দেখিতে অতি সুপুরুষ ও পরম ভক্ত বৈষ্ণব ছিলেন। সর্ব্বদা হরিনামের ছাপ, শাস্ত্র, শিষ্ট, প্রসন্নমুর্ত্তি। কেশবচন্দ্র পিতার ভক্তির-ভাব প্রাপ্ত হইয়াছিলেন। ইহার জননীদেবীও সদা-শয়ন ও ধর্ম্মপরায়ণতার জন্ত সুপ্রসিদ্ধ ছিলেন। কেশবচন্দ্র এই পিতা মাতার ক্রোড়ে জন্মগ্রহণ করিয়া বাল্যাবধি শাস্ত্র, শিষ্ট, সাধুতাবুয়োগী, হীমান বালক ছিলেন। ইহার বয়ঃক্রম যখন অল্পমান ছয় বৎসর তখন ইহার পিতামহের মৃত্যু হয়। ইহার পাঁচ বৎসরের মধ্যে পিতা প্যারীমোহন সেনও এলোক হইতে অবস্থত হন। কেশবচন্দ্রের বয়স তখন একাদশ বৎসর মাত্র ছিল। পিতৃবিয়োগের পর, জ্যেষ্ঠতাত হরিমোহন সেন ইহাদের অভিভাবক হন। তাঁহারই তত্ত্বাবধানের অধীনে কেশবচন্দ্র বর্দ্ধিত হন।



স্বর্গীয় কেশবচন্দ্র সেন ।

(২৬৬ পৃষ্ঠা)

১৮৪৫ সালে সাত বৎসর বয়সে কেশবচন্দ্র হিন্দুকলেজে ভর্তি হন। পূর্বেই বলিয়াছি ১৮৫২ সালে হিন্দুকলেজে বিবাদ উপস্থিত হয়, যে বিবাদের ফলস্বরূপ খাতনামা রাজেন্দ্র দত্ত মহাশয় ১৮৫৩ সালে মেট্রপলিটান কলেজ স্থাপন করেন। কেশবচন্দ্রের জ্যেষ্ঠতাত হরিমোহন সেন মহাশয় এই বিবাদে “রাজা বাবুর” পৃষ্ঠপোষক ছিলেন; সুতরাং তিনি কেশবচন্দ্রকে হিন্দুকলেজ হইতে তুলিয়া লইয়া উক্ত কলেজে দিলেন। ১৮৫৪ সালে মেট্রপলিটান কলেজ উঠিয়া গেলে কেশবচন্দ্র আবার হিন্দুকলেজে আসিলেন।

ইহার কিছুকাল পরে একবার বার্ষিক পরীক্ষার সময় কোনও অপরাধে লিপ্ত হওয়াতে তাঁহাকে শাস্তি ভোগ করিতে হয়। শাস্ত, স্বধীর, সর্বজন-প্রিয় কেশবচন্দ্রের মনে ইহাতে গুরুতর আঘাত লাগে। চিরদিন তাঁহার আত্ম-মর্যাদা-জ্ঞান অতিশয় প্রবল ছিল। সুতরাং এই অপমান তাঁহার প্রাণে শেল-সম বাজিল; তিনি সমবয়স্কদিগের সঙ্গ পরিত্যাগ করিলেন; ঘোর বিবাদের মধ্যে পতিত হইলেন; এবং অহুতগু হৃদয়ে আত্মোন্নতির জন্ত দৈব-চরণে প্রার্থনা করিতে আরম্ভ করিলেন। অনুমান করি ইহাই তাঁহার জীবন পরিবর্তনের প্রধান কারণ হইয়াছিল।

এই সময়ে অর্থাৎ অনুমান ১৮৫৬ সালে তিনি আমেরিকান ইউনিটেরিয়ান মিশনারি ডাল সাহেব ও সুবিধাত পাদরী লং সাহেবের সহিত সম্মিলিত হইয়া ব্রিটিশ ইণ্ডিয়া সোসাইটি নামে এক সভা স্থাপন করেন। ঐ সভার অপরাপর কার্যের মধ্যে কেশবচন্দ্রের কলুটোলাস্থ বাস ভবনে বালকদিগের বিদ্যাশিক্ষার সাহায্যার্থ একটা সায়ংকালীন বিদ্যালয় স্থাপিত হয়। কেশবচন্দ্র কতিপয় বয়স্কের সহিত সেখানে প্রতিদিন বালকদিগকে পড়াইতেন। আমার সমবয়স্ক ও সহাধ্যায়ী কেহ কেহ এই ১৮৫৬ সালে, ঐ স্থলে সন্ধ্যার সময় পড়া করিতে যাইত। আমি তাহাদের মুখে তখন কেশবচন্দ্রের প্রশংসা শুনিতাম।

১৮৫৬ সালে বালীগামের কুলীন বৈষ্ণবপরিবারস্থ চন্দ্রকুমার মজুমদারের জ্যেষ্ঠা কন্যার সহিত তাঁহার বিবাহ হয়।

১৮৫৭ সাল হইতে কেশবচন্দ্রের ধর্মভাব ও কর্মোৎসাহ বিশেষরূপে প্রকাশ পাইতে লাগিল। ঐ সালে তিনি পুরোক্ত যৌবন-সুহৃদগণের সহিত সম্মিলিত হইয়া আপনার ভবনে Good Will Fraternity নামে এক সভা

স্থাপন করিলেন। ঐ সভাতে তিনি প্রসিদ্ধ পাশ্চাত্য ধর্ম্মাচার্যাদিগের গ্রন্থ হইতে অংশ সকল উদ্ধৃত করিয়া পাঠ করিতেন; এবং নিজেও প্রবন্ধ লিখিয়া পড়িতেন বা মৌখিক বক্তৃতা দিতেন। এই সভাতে তাঁহার ভাবী বাগ্মিতার সূত্রপাত হইল; এবং এখন হইতেই একদল যুবক তাঁহার পদাঙ্ক অনুসরণ করিতে লাগিলেন। এই সভার সম্বন্ধ-হুজ্রে ব্রাহ্মসমাজের তদানীন্তন নেতা দেবেন্দ্রনাথ ঠাকুর মহাশয়ের সহিত তাঁহার পরিচয় হয়। দেবেন্দ্রনাথের মধ্যম পুত্র সত্যেন্দ্রনাথ কেশবচন্দ্রের সমাধায়ী ও বন্ধু ছিলেন। সত্যেন্দ্র বাবুর দ্বারা অনুরুদ্ধ হইয়া দেবেন্দ্রনাথ একবার উক্ত সভার অধিবেশনে সভাপতির কাজ করেন; এবং যুবক কেশবের ধর্ম্মানুরাগ ও ভাবী অসাধারণ বাগ্মিতার প্রমাণ প্রাপ্ত হন।

ইহার পর দেবেন্দ্রনাথ ঠাকুর মহাশয় কিছুদিন একান্ত ধ্যানধারণাতে যাপন করিবার উদ্দেশে সিমলা পাহাড়ে গমন করেন। তাঁহার অল্পপস্থিতিকালে কেশবচন্দ্র ব্রাহ্মসমাজের প্রতিজ্ঞাপত্র স্বাক্ষর করিয়া ব্রাহ্মসমাজের সভ্যশ্রেণী-ভুক্ত হন। দেবেন্দ্রনাথ ১৮৫৮ সালে সহরে প্রতিনিবৃত্ত হইয়া এই সংবাদে পুলকিত হইলেন; এবং তাঁহার ঘোবন-সুহৃদ প্যারীমোহন সেনের পুত্রকে সাদরে স্বীয় শিষ্যদলের মধ্যে গ্রহণ করিলেন।

একদিকে কেশবচন্দ্রের ব্রাহ্মসমাজে প্রবেশ, অপরদিকে দেবেন্দ্রনাথের আধ্যাত্মিক জীবনের নব উদ্দীপনা—এই উভয়ে ব্রাহ্মসমাজ মধ্যে এক নব শক্তির সঞ্চার করিল; এবং ইহার পর হইতে ব্রাহ্মসমাজ নব নব কার্যক্ষেত্রে প্রবেশ করিতে লাগিলেন। কেশবচন্দ্র ঐ সকল কার্যের উদ্ভাবনকর্তা ও দেবেন্দ্রনাথ পৃষ্ঠপোষক হইতে লাগিলেন। ১৮৫৯ সালে “ব্রহ্মবিদ্যালয়” নামে একটা বিদ্যালয় স্থাপিত হইল। তাহাতে দেবেন্দ্রনাথ ও কেশবচন্দ্র কালেক্সের ছাত্রদিগকে বাঙ্গালা ও ইংরাজীতে উপদেশ দিতে লাগিলেন। তদ্বারা বিশ্ববিদ্যালয়ের অনেক সম্মানিত ছাত্র ব্রাহ্মসমাজের দিকে আকৃষ্ট হইলেন।

এই সময়ে মহাসমারোহে সিন্দুরীয়া পটীর গোপাল মল্লিকের বাটীতে উমেশচন্দ্র মিত্র প্রণীত “বিধবা বিবাহ” নাটকের অভিনয় হয়। কেশবচন্দ্র তাহার প্রধান উদ্যোগী ও কার্যনির্বাহক ছিলেন। এই অভিনয়ের বাতিকটা তাঁর বাল্যকাল হইতেই ছিল। তিনি বাল্যকালে বয়স্কদিগকে লইয়া নান বিষয়ে অভিনয় করিতেন।

অগুমান ১৮৫৯ সালে সম্বৎসভা নামে ধর্ম্মালোচনা সভা স্থাপিত হয়

কেশবচন্দ্র ও তাঁহার বয়স্কগণ এই সভাতে সম্ভাষে একবার সমবেত হইয়া নিজ নিজ ধর্মজীবনের অবস্থা ও তাহার উন্নতির উপায় সম্বন্ধে বিশ্রুতলাপে কথোপকথন করিতেন । তাঁহার নিজের ভবনে এই সভার অধিবেশন হইত ।

১৮৫৯ সালের সেপ্টেম্বর মাসে দেবেন্দ্রনাথ কেশবচন্দ্র ও সত্যেন্দ্রনাথকে সঙ্গে করিয়া সিংহল যাত্রা করেন ; এবং নানাহান পরিদর্শনে কয়েক মাস যাপন করিয়া আসেন । এই বিদেশযাত্রা ও একত্র বাস হই নেতাকে সুদৃঢ় প্রীতি-স্বজ্ঞে বদ্ধ করিয়া দিল ।

কেশবচন্দ্র দেশে ফিরিলে তাঁহার অভিভাবকগণ তাঁহাকে বেঙ্গল ব্যাঙ্কে একটা ৩০ টাকার চাকুরী লইয়া কর্ম কাজে বসিতে বাধ্য করিলেন । কিন্তু তখন তাঁহাকে বিষয় কর্মে রত করিবার চেষ্টা করা বুধা । তখন তাঁহার প্রাণে অগ্নি জলিয়াছে, তাঁহার জীবনের কাজ তাঁহার সম্মুখে আসিয়াছে ! কেশবচন্দ্র বিষয় কর্মে বসিলেন বটে, কিন্তু অবসর কাল ব্রাহ্মধর্ম প্রচারোদ্দেশে নিয়োগ করিতে লাগিলেন । Young Bengal, this is for you, নামক তাঁহার সুপ্রসিদ্ধ পুস্তিকা সকল ইহার পর বৎসরেই প্রকাশ পাইতে লাগিল ।

ইহার পর বৎসর তিনি স্বাস্থ্যের জন্ত কৃষ্ণনগরে গিয়া উৎসাহের সহিত ব্রাহ্মধর্ম প্রচার করিয়া আসিলেন । তৎপরে ক্রমে ক্রমে Indian Mirror নামে পাক্ষিক পত্রিকা প্রকাশিত হইল ; এবং “কলিকাতা কালোজ” নামে একটা বিদ্যালয় স্থাপিত হইল । সেই স্কুলগৃহ এই যুবকমণ্ডলীর একটা প্রধান আড্ডা হইয়া দাঁড়াইল ।

১৮৬১ সালে কেশবচন্দ্র বিষয় কর্ম ত্যাগ করিয়া ব্রাহ্মধর্ম প্রচারে আত্মসমর্পণ করিলেন । ঐ সালেই ব্রাহ্মধর্মের পদ্ধতি অনুসারে প্রথম বিবাহ অনুষ্ঠিত হইল । ঐ সালের শ্রাবণ মাসে দেবেন্দ্রনাথের কন্যা স্নেহমারীর নব-প্রণীত ব্রাহ্মপদ্ধতি অনুসারে বিবাহ হয় । বোধ হয় ইহার কিছুকাল পরে দেবেন্দ্রনাথের পিতা স্বর্গীয় দ্বারকানাথ ঠাকুর মহাশয়ের বার্ষিক শ্রাদ্ধও ব্রাহ্মপদ্ধতি অনুসারে সম্পন্ন হয় । এই সকল ব্রাহ্ম অনুষ্ঠান যুবকদের মধ্যে এক নূতন দ্বার খুলিয়া দিল । কলিকাতার বাহিরে ও অনেক স্থানে ব্রাহ্মপদ্ধতি অনুসারে শ্রাদ্ধাদি ও তদ্রিবন্ধন যুবকদিগের প্রীতি নির্ধাতন ও উৎসাহিত আরম্ভ হইল ।

স্বয়ং সম্ভ্রত-সভার সভ্যদিগের মধ্যে এক নব ভাবের আবির্ভাব হইল । তাঁহারা ব্রাহ্মধর্মের উদার সত্যসকলকে মুখে রাখিয়া সন্তুষ্ট না হইয়া কার্য্যে পরিণত করিবার জন্ত বদ্ধপরিকর হইলেন । তাঁহাদের মধ্যে যাহারা ব্রাহ্মণ

ছিলেন, তাঁহাদের অনেকে উপবীত পরিত্যাগ করিলেন ; এবং তন্নিবন্ধন গৃহত্যাগিত হইয়া নানা অশ্লুবিধা ভোগ করিতে লাগিলেন। ঘরে ঘরে ব্রাহ্ম-স্বকগণ পৌত্তলিকতার সংশ্রব ত্যাগ করিবার জন্ত ক্রতসংকল্প হওয়াতে আত্মীয় স্বজনের সহিত বিরোধ উপস্থিত হইতে লাগিল।

১৮৬২ সালের ১লা বৈশাখ দিবসে কেশবচন্দ্র দেবেন্দ্রনাথ ঠাকুর কর্তৃক কলিকাতা সমাজের আচার্যের পদে বৃত্ত হন ; এবং ব্রহ্মানন্দ উপাধি প্রাপ্ত হন। উক্ত দিবস তিনি স্বীয় পত্নীকে ঠাকুরবাড়ীতে লইয়া যান। তাঁহার অভিভাবকগণ এ কার্যের বিরোধী ছিলেন। কিন্তু তিনি নিজে যে আলোক প্রাপ্ত হইয়াছিলেন, তাহা পত্নীকে দিবার জন্ত এতই ব্যগ্র হইয়াছিলেন যে অপরের অহুরাগ বিরাগের প্রতি দৃষ্টিপাত করিবার সময় হইল না। তিনি আপনার অভীষ্ট সাধন করিলেন বটে, কিন্তু কিছুদিনের জন্ত গৃহ হইতে ত্যাগিত হইতে হইল। এই অবস্থাতে তাঁহাকে ও তাঁহার পত্নীকে অনেক দিন দেবেন্দ্রনাথের ভবনে তাঁহার পুত্র ও পুত্রবধূদিগের মধ্যে বাস করিতে হইল। তাহাতে উভয়ের প্রীতিবন্ধন আরও দৃঢ় হইল। তৎপরে স্বীয় অভিভাবকদিগের হস্ত হইতে আপনার প্রাপ্য সম্পত্তি উদ্ধার করিতে ও পৈতৃকভবনে পুনঃপ্রবেশাধিকার লাভ করিতে কয়েক মাস গেল।

নিজভবনে প্রবেশাধিকার লাভের পরেই তাঁহার পরিবারে প্রথম ব্রাহ্ম অর্চনায় অবসর উপস্থিত হইল। তাঁহার প্রথম পুত্র করুণাচন্দ্রের নাম-করণ নবপ্রণীত ব্রাহ্মপদ্ধতি অনুসারে সম্পন্ন হইল।

ইহার পরে তিনি উৎসাহ সহকারে ব্রাহ্মধর্মপ্রচারে প্রবৃত্ত হইলেন। খ্রীষ্টীয় মিশনারিগণের সঙ্গে তুমুল সংগ্রাম বাধিয়া গেল, কয়েক বৎসর পূর্বে কলকাতায় গিয়া তিনি যে বক্তৃতা দিলেন, তাহাতেই তত্তৎ পাদরী ডাইন্স সাহেবের সহিত বিবাদ বাধিয়াছিল। সে বিবাদ আর মেটে নাই। খ্রীষ্টীয় সংবাদপত্র ও সভাসমিতিতে ব্রাহ্মদিগের প্রতি গালাগালি চলিতেছিল। ১৭৬৩ সালের প্রারম্ভে প্রসিদ্ধ খ্রীষ্টীয় প্রচারক লালবিহারী দে কর্তৃক সম্পাদিত এক পত্রিকাতে ব্রাহ্মদিগের প্রতি অনেক উপহাস বিদ্রূপ প্রকাশ পায়। তদুত্তরে কেশবচন্দ্র Brahmo Samaj Vindicated (“ব্রাহ্মসমাজের পক্ষসমর্থন”) বলিয়া এক বক্তৃতা প্রদান করেন। সেই বক্তৃতাতে তাঁহার যে বাগ্মিতা প্রকাশ পাইয়াছিল, তাহা দেখিয়া শ্রোতৃবৃন্দ চমৎকৃত হইয়া যান। সুপ্রসিদ্ধ পাদরী ডফ সাহেব উক্ত বক্তৃতাতে উপস্থিত ছিলেন। তিনি পরে বলেন ব্রাহ্মসমাজ

যে শক্তি লইয়া উঠিতেছে তাহা সামান্য শক্তি নহে। বলিতে গেলে এই বক্তৃত্তা হইতেই কেশবচন্দ্রের প্রতিষ্ঠা বঙ্গসমাজে স্থাপিত হইয়া যায়।

এই বৎসরে তিনি “ব্রাহ্মবন্ধু সভা” নামে একটি সভা স্থাপন করেন। অল্পঃপূরে স্ত্রীশিক্ষা বিস্তার তাহার অন্যতম উদ্দেশ্য ছিল। এই সভার সভ্যগণ উৎসাহের সহিত নানা হিতকর বিষয়ের আলোচনাতে প্রবৃত্ত হন।

১৮৬৪ সালে কেশবচন্দ্র একজন বয়স্ক সহ মাল্লাজ ও বোম্বাই প্রদেশে প্রচারার্থ গমন করেন। তদবধি সে সকল প্রদেশে ব্রাহ্মধর্মের বীজ উণ্ড হইয়া বৃক্ষে পরিণত হইয়াছে।

বোম্বাই হইতে প্রতিনিবৃত্ত হইয়া কেশবচন্দ্র দেবেন্দ্রনাথকে একটি প্রধান সংস্কার কার্যে প্রবৃত্ত করিলেন। তৎপূর্বে উপবীতধারী উপাচার্য্যগণ ব্রাহ্ম-সমাজের বেদীতে আসীন হইয়া উপাসনাদি কার্য্য নিষ্পন্ন করিতেন। কেশব-চন্দ্রের প্ররোচনায় মহর্ষি তাঁহাদিগকে কণ্ঠ্যুত করিয়া ছইজন উপবীততাগী উপাচার্য্যকে সেই পদে নিয়োগ করিলেন। এতদ্বারা সমাজের প্রাচীন সভ্যগণের মনে বিরাগ জন্মিল। তাঁহারা মহর্ষির নিকট মনের জুখ প্রকাশ করিতে লাগিলেন। ওদিকে যুবকদল আর একটি অসমসাহসিক কার্য্যে অগসর হইলেন। তাঁহারা অসমবর্ণের ছই ব্যক্তিকে বিবাহ সম্বন্ধে আবদ্ধ করিলেন। দেবেন্দ্রনাথ কেশবচন্দ্রের প্রতি হাজার অম্বরক্ত হইলেও, নিজে তৎপূর্বে উপবীত পরিত্যাগ করিলেও, এবং যুবকদলকে বিধিমতে উৎসাহদানে ইচ্ছুক থাকিলেও, এরূপ সমাজবিপ্লবহুচক কার্য্যের জন্ত প্রস্তুত ছিলেন না। তখন ‘তত্ত্ববোধিনী’ পত্রিকা যুবকদলের হস্তেছিল। তাহাতে এই বিবাহের সংবাদ প্রকাশিত হইলে তিনি বিপ্লবের সূচনা দেখিয়া ভীত হইলেন ; এবং যুবকদলকে সমাজ-সম্বন্ধীয় সর্ব্ববিধ কর্ত্ত্ব হইতে অন্তরিত করিবার জন্ত প্রতিজ্ঞারূঢ় হইলেন। কেশবচন্দ্র দেখিলেন ঘোর ঝটিকা আসিতেছে, তিনি তাহার জন্ত প্রস্তুত হইতে লাগিলেন। কলিকাতা সমাজের কত্বভার তাঁহার হস্তের বাহিরে যায় দেখিয়া, তিনি ব্রাহ্মধর্ম প্রচার বিভাগকে স্বতন্ত্র করিয়া নিজ হস্তে রাখিবার জন্ত “ব্রাহ্মপ্রতিনিধি সভা” নামে এক সভা গঠন করিতে প্রবৃত্ত হইলেন ; ব্রাহ্মধর্ম প্রচারার্থ “ধর্ম্মতত্ত্ব” নামক এক মাসিক পত্রিকা বাহির করিলেন ; এবং তাঁহার দৃষ্টান্তের অনুসরণ করিয়া যে কতিপয় যুবা বিষয় কর্ম্ম ত্যাগ পূর্ব্বক ব্রাহ্মধর্ম প্রচারে আত্ম-সমর্পণ করিয়াছিলেন, তাঁহা-দিগকে লইয়া মহোৎসাহে প্রচার বিভাগ গঠনে প্রবৃত্ত হইলেন।

এই গোলমালের মধ্যে আর এক ঘটনা ঘটিল। ১৮৬৪ সালের সুপ্রসিদ্ধ ঝড়ে কলিকাতা ব্রাহ্মসমাজের বাড়ী ভাঙিয়া যাওয়াতে তাহার জীর্ণ সংস্কারের প্রয়োজন হইল। তখন কিছুদিনের জন্ত সমাজের উপাসনা দেবেন্দ্রনাথের গৃহে উঠিয়া গেল। সেখানে যে দিন প্রথম উপাসনা আরম্ভ হইল, সে দিন উপবীত-ত্যাগী উপাচার্য্যদ্বয় গিয়া দেখেন যে তাঁহাদের উপস্থিত হইবার পূর্বেই পূর্ব্বেকার উপবীতধারী উপাচার্য্যগণ উপাসনা কার্য্য আরম্ভ করিয়াছেন। ইহা যুবক ব্রাহ্মদের পক্ষে অসহনীয় বোধ হইল। তাঁহাদের অনেক সেই মুহূর্ত্তেই সে স্থান ত্যাগ করিয়া অন্ত্র স্থানে গিয়া উপাসনা করিলেন। বলিতে গেলে এই সময় হইতেই প্রকাশ্যে গৃহবিচ্ছেদ আরম্ভ হইল। ইহার পর কেশবচন্দ্র অনেক দিন কোনও প্রকারে সম্মিলিত ভাবে থাকিবার চেষ্টা করিয়াছিলেন বটে, কিন্তু চরমে শান্তি স্থাপিত হওয়া অসম্ভাবিত হইল।

দ্বারায় তিনি কলিকাতা সমাজের সম্পাদকের পদ ত্যাগ করিতে বাধ্য হইলেন। সেই পদে দেবেন্দ্রনাথের জ্যেষ্ঠপুত্র দ্বিজেন্দ্রনাথ ঠাকুর নিযুক্ত হইলেন। কেশবচন্দ্র কলিকাতা সমাজের অধ্যক্ষতা হইতে বিচ্যুত হইয়া প্রতি-নিধিসভাকে প্রধান বস্তুরূপে আশ্রয় করিলেন। তাহার সাহায্যে একটা ব্রাহ্মমণ্ডলী গঠন ও ব্রাহ্মধর্ম্ম প্রচার করিবার চেষ্টা করিতে লাগিলেন। দেবেন্দ্রনাথ এ বিষয়ে প্রথমে তাঁহার সাহায্য করিয়াছিলেন, কিন্তু পরে যুবক-দের অভিসন্ধির প্রতি সন্দেহান হইয়া পশ্চাৎপদ হইলেন। কিন্তু সর্ববিধ উন্নতিকর প্রস্তাবে সহায়তা করিতে বিরত হইলেন না। যুবকদল আন্দোলনের নিমিত্ত কোনও প্রস্তাব করিলেই তিনি তাহাতে যোগ দিতেন ও বিধি-মতে সাহায্য করিতেন। এমন কি যুবকদের প্রতিষ্ঠিত ব্রাহ্মবন্ধু সভাতে একবার তিনি “ব্রাহ্মসমাজের পঞ্চবিংশতি বৎসরের পরীক্ষিত বৃত্তান্ত” বিষয়ে বক্তৃতা করিয়াছিলেন।

১৮৬৫ সালের আষাঢ় মাসে যুবকদের অগ্রগীর্ণ কলিকাতা সমাজের অধ্যক্ষদিগের নিকট এই প্রার্থনা জানাইলেন যে সমাজের বেদীতে উপবীত-ধারী উপাচার্য্যগণকে বসিতে না দেওয়া হয়; এবং যদি এ প্রার্থনা অগ্রাহ্য হয়, তাহা হইলে তাঁহাদিগকে স্বতন্ত্র দিনে সমাজগৃহে উপাসনা করিতে দেওয়া হয়। উত্তরে দেবেন্দ্রনাথ বলিলেন যে যাঁহারা বহুকাল সমাজের সহিত যোগ দিয়া অহুরাগের সহিত কাজ করিয়া আসিতেছেন, তাঁহাদিগকে এক্ষণে স্বাধিকার-চ্যুত করা তিনি পক্ষপাতের কার্য্য বলিয়া মনে করেন। তৎপরে

সমাজের একটা সাধারণ উপাসনার দিন থাকিতে, প্রতিবাদকারী কয়েকজনকে আর এক দিন সমাজগৃহ দেওয়া ভাল মনে করিলেন না। বস্তুতঃ দেবেন্দ্রনাথ এ সময়ে বাহা কিছু করিয়াছিলেন, কর্তব্য বোধে এবং তাঁহার অবলম্বিত আদর্শ স্বাকার জন্ত। ব্রাহ্মধর্মকে হিন্দুভাবে হিন্দুসমাজের মধ্যে প্রচার করা তাঁহার চিরদিনের আদর্শ। তিনি মনে করিতেন রামমোহন রায় তাঁহাকে সেই ভার দিয়া গিয়াছিলেন। তাহার ব্যাঘাতের আশঙ্কাতেই তিনি কেশবচন্দ্রের দলের হস্ত হইতে কার্যভার লইলেন। তাঁহাদিগকে ভালবাসিতে ও সাহায্য করিতে বিরত হইলেন না। সকল ভাল বিষয়ে তাঁহাদের উৎসাহ-দাতা রহিলেন।

১৮৬৫ সালের কার্তিক মাসে কেশবচন্দ্র, অঘোঃনাথ গুপ্ত ও বিজয়কৃষ্ণ গোস্বামী এই ছই প্রচারক সঙ্গে পূর্ববঙ্গে ব্রাহ্মধর্ম-প্রচারে বহির্গত হন। তত্পলক্ষে ফরিদপুর, ঢাকা, ময়মনসিংহ প্রভৃতি স্থান পরিদর্শন করেন।

কলিকাতায় ফিরিয়া কেশবচন্দ্র যুবকদের নেতা হইয়া সমাজ-সংস্কারে আপনাকে নিয়োগ করিলেন। বোধ হয় ১৮৬৪ সালেই স্বীয় বয়স্কগণের পত্নী-দিগের আধ্যাত্মিক উন্নতি সাধনের জন্ত “ব্রাহ্মিকা-সমাজ” নামে এক নারী-সমাজ স্থাপন করিয়াছিলেন। সেখানে তিনি উপদেশ দিতেন। ব্রাহ্মগণ স্বীয় স্বীয় পরিবারস্থ নারীগণের মধ্যে শিক্ষা বিস্তারের জন্ত প্রাণপণে চেষ্টা করিতে লাগিলেন।

১৮৬৬ সালের জ্যৈষ্ঠ মাসে শেষে যে মাঘোৎসব হইল, তাহাতে কেশবের ব্রাহ্মিকা-সমাজের মহিলাসভাগণ উপস্থিত থাকিবার ইচ্ছা প্রকাশ করিলেন। তদনুসারে তিনি দেবেন্দ্রনাথকে অনুরোধ করিয়া কলিকাতা সমাজে বেদীর পূর্বপার্শ্বে পরদার আড়ালে মহিলাদিগের বসিবার আসন করিলেন। ব্রাহ্ম-সমাজের ইতিহাসে সর্বপ্রথমে নারীগণ এই প্রকাশ উপাসনা-মন্দিরে পুরুষ-দিগের সহিত বসিলেন। মহিলাদিগের উৎসাহ আরও বাড়িয়া গেল। পরবর্তী ফেব্রুয়ারী মাসে কেশবচন্দ্র মহিলাদিগকে লইয়া ডাক্তার রবসন নামক খ্রীষ্টীয় পাদরীর ভবনে প্রকাশ্য সান্ধ্য-সমিতিতে গেলেন। সহরে খুব আলোচনা উঠিল।

ইহার পরে কলিকাতা সমাজের সহিত বিচ্ছেদ দিন দিন বাড়িতে লাগিল। ঐ সালের এপ্রেল বা মে মাসে কেশবচন্দ্র Jesus Christ, Asia and Europe নামে সুপ্রসিদ্ধ বক্তৃতা করিলেন। এই বক্তৃতাতে যেমন একদিকে অসাধারণ ব্যথিতা, অপরদিকে তেমনি আশ্চর্য্য ধর্মভাবের উদারতা প্রকাশ পাইল।

তাহার নাম সুবক্তা ও বঙ্গসমাজের নেতাদিগের শীর্ষস্থানে উঠিয়া গেল। কিন্তু ইহাতে যীশুখ্রীষ্টের প্রতি যে প্রগাঢ় ভক্তি প্রদর্শন করিয়াছিলেন, তাহাতে ছইদিকে ছই প্রকার চর্চা উঠিল। গবর্ণর জেনারেল লর্ড লয়েন্স হইতে আরম্ভ করিয়া সামান্য কেটেকিষ্ট পর্য্যন্ত খ্রীষ্টানগণ কেশবচন্দ্র দ্বারায় খ্রীষ্টীয় ধর্ম অবলম্বন করিবেন বলিয়া বগল বাজাইতে লাগিলেন। অপরদিকে দেশীয় স্বধর্ম্মানুরাগিগণ কেশবচন্দ্রকে ও নবোদিত ব্রাহ্মদলকে খ্রীষ্টীয়ান বলিয়া গালি দিতে লাগিলেন। কলিকাতা ব্রাহ্মসমাজের সভাগণ এই আন্দোলনে যোগ দিলেন। এত অতিরিক্ত খ্রীষ্টভক্তি তাহাদের চক্ষে ব্রাহ্মধর্ম্মের বিকার বলিয়া প্রতীতি হইল। ব্রাহ্মদিগের সেই যে খ্রীষ্টীয়ান অপবাদ উঠিয়াছে, তাহা আজও যায় নাই। যদিও তৎপরবর্ত্তী সেপ্টেম্বর মাসে কেশবচন্দ্র Great Men নামক আর একটা বক্তৃতা করিয়া নিজের খ্রীষ্টীয়ান অপবাদ কতকটা দূর করিবার প্রয়াস পাইলেন বটে, তথাপি সে অপবাদ সম্পূর্ণ গেল না। এ অপবাদের আর একটু কারণ আছে। এই ১৮৬৬ সাল হইতে, চৈতন্যের প্রভাবের আবির্ভাব পর্য্যন্ত, কয়েক বৎসর কেশবচন্দ্রের দলভুক্ত ব্রাহ্মগণ যিশুখ্রীষ্টকে লইয়া কিছু বাড়াবাড়ি করিয়াছিলেন। বড়দিনের দিন যিশুর ধ্যানে দিনযাপন করা, যিশুর নামে সঙ্গীত রচনা করা, উঠিতে বসিতে যিশু কীর্ত্তন করা, অগ্ন্যস্ত্র ধর্ম্মশাস্ত্র অপেক্ষা খ্রীষ্টীয় শাস্ত্র অধিক অনুশীলন করা প্রভৃতি চলিয়াছিল। সুতরাং লোকের ও প্রকার সংস্কার স্বাভাবিক।

এদিকে যুবক ব্রাহ্মদলের কার্য্যক্ষেত্র দিন দিন বিস্তৃত হইলে লাগিল। তাহাদের প্রচারকগণ তখন উৎসাহের সহিত মফঃস্বলের নানা স্থানে ভ্রমণ করিয়া নব নব সমাজ প্রতিষ্ঠিত করিতে লাগিলেন। ক্রমে এই সকল সমাজকে একতানুত্রে আবদ্ধ করা প্রয়োজন হইতে লাগিল। চারিদিক হইতে অনেক ব্রাহ্ম ও ব্রাহ্মিকা একটা স্বতন্ত্র সমাজ প্রতিষ্ঠার জন্ত অনুরোধ করিতে লাগিলেন। অবশেষে এই সালের ১১ই নবেম্বর দিবসে উন্নতিশীল ব্রাহ্মদলের এক সভাতে “ভারতবর্ষীয় ব্রাহ্মসমাজ” নামক এক সমাজ প্রতিষ্ঠিত হইল।

উন্নতিশীল ব্রাহ্মদল মহর্ষি দেবেন্দ্রনাথকে আপনাদের ভক্তি ও কৃতজ্ঞতা-সূচক এক অভিনন্দন পত্র দিয়া এবং তাহার আশীর্বাদ গ্রহণ করিয়া, নবপ্রতিষ্ঠিত সমাজের কার্য্যক্ষেত্রে প্রবেশ করিলেন। এই সময় হইতে কলিকাতা ব্রাহ্মসমাজের নাম পরিবর্তিত করিয়া আদি ব্রাহ্মসমাজ রাখা হইল।

১৮৬৭ সাল হইতে যুবকদলের প্রচারোৎসাহ আশ্বিনের ন্যায় জলিয়া উঠিল।

অনেকে কল্যাকার চিন্তা পরিত্যাগ করিয়া প্রচার ব্রত গ্রহণ করিলেন ; এবং স্বর্দ্ধাশনে ও অনশনে দিন কাটাইতে ও পাছকাবিহীন পদে কলিকাতা সহরে ভ্রমণ করিতে লাগিলেন । এই প্রচারোৎসাহের ফলস্বরূপ দেশের নানাস্থানে ব্রাহ্মসমাজ স্থাপিত হইতে লাগিল ; এবং ব্রাহ্মবিবাহের সংখ্যা বাড়িতে লাগিল ।

এই সাল হইতে কেশবচন্দ্রের নিজের ভবনে তাঁহার বয়স্কদিগকে লইয়া দৈনিক উপাসনা আরম্ভ হইল । এই দৈনিক উপাসনা হইতে নবব্যাকুলতা ও নবভক্তির সঞ্চার হইল । তাহার ফলস্বরূপ ইহার মহাত্মা চৈতন্যের ভক্তিতত্ত্ব আলোচনা করিতে লাগিলেন ; এবং আপনাদের মধ্যে খোল করতাল সহ সংকীৰ্ত্তনের প্রথা প্রবর্তিত করিলেন । অমনি সংবাদ পত্রে ব্রাহ্মেরা নেড়া-নেড়ীর দল হইল বলিয়া চর্চা উঠিল ।

১৮৬৮ সালের প্রারম্ভে ভারতবর্ষীয় ব্রাহ্মসমাজের উপাসনা-মন্দির নির্মাণের জন্ত একত্ৰ ভূমি ক্রয় করিয়া উক্ত মন্দিরের ভিত্তি স্থাপন করা হইল । তদুপলক্ষে কেশবচন্দ্র সদলে নগরকীৰ্ত্তন করিয়া ভিত্তিস্থাপন করিতে গেলেন । এই ব্রাহ্মদিগের প্রথম নগর-কীৰ্ত্তন । সেই কীৰ্ত্তনের মধ্যে উন্নতিশীল ব্রাহ্মগণ জগতের নিকট এই বোষণা করিলেন ;—

“নর নারী সাধারণের সমান অধিকার,

যার আছে ভক্তি, পাবে মুক্তি, নাহি জাত বিচার ।”

ইহাই অত্ৰাপি উন্নতিশীল ব্রাহ্মদলের মূলমন্ত্রস্বরূপ রহিয়াছে ।

এই ১৮৬৮ সালে ব্রাহ্মসমাজ মধ্যে এক মহা আন্দোলন উপস্থিত হয় । নবভক্তির আবির্ভাবে ব্রাহ্মদিগের অন্তরে আশ্চর্য্য বিনয়ের আবির্ভাব হয় । তাহার ফলস্বরূপ তাঁহাদের অনেকে পরস্পরের এবং বিশেষতঃ কেশবচন্দ্রের পদে ধরিয়া, পদধূলিগ্রহণ, পাদপ্রক্ষালন, সবিনয়ে ক্রন্দন প্রভৃতি আরম্ভ করেন । তাহা ভক্তি প্রকাশের আতিশয্য মাত্র । এই সময়ে কিছুদিনের জন্ত কেশবচন্দ্র সপরিবারে মুন্সের সহরে বাস করিতেছিলেন । সেখানেই ঐ ভক্তির উচ্ছ্বাস প্রধানরূপে প্রকাশ পায় । ইহাতে তাঁহার দলের দুইজন প্রচারক ব্রাহ্মসমাজ মধ্যে নরপূজার আবির্ভাব বলিয়া প্রকাশ্য পত্রে আন্দোলন করিতে প্রবৃত্ত হন । এই আন্দোলনে অনেক ব্রাহ্ম ব্রাহ্মসমাজ পরিত্যাগ করেন ।

অল্পদিনের মধ্যে এই আন্দোলন নিরস্ত হইলে, ১৮৬৯ সালে কেশবচন্দ্র ভারতবর্ষীয় ব্রাহ্মমন্দিরে উপাসনা প্রতিষ্ঠা করিতে সমর্থ হন ।

১৮৭০ সালে তিনি ইংলণ্ডে গমন করেন ; এবং প্রায় ছয় সাত মাস কাল

সেখানে বাস করিয়া নানা স্থানে ব্রাহ্মধর্ম প্রচার করেন। ভারতেশ্বরী মহারাণী ভিক্টোরিয়া হইতে সামান্য ধর্মোচাৰ্য্য পর্য্যন্ত সকলে তাঁহার প্রতি সম্মান প্রদর্শন করিতে ক্রটি করেন নাই।

স্বদেশে ফিরিয়াই তিনি দেশের সর্ববিধ সংস্কার-কার্য্যে নিযুক্ত হন ; এবং “ভারত সংস্কার সভা” নামে, একটি সভা স্থাপন করিয়া, তাহার অধীনে সুলভ-সাহিত্য, নৈশবিজ্ঞান, ক্রীড়াশিক্ষা, শিক্ষাবিস্তার, স্বরাপান নিবারণ প্রভৃতি বহুবিধ দেশহিতকর কার্য্যের সূত্রপাত করেন। কয়েক বৎসরের মধ্যে এই সভা, ও ইহার অন্তর্গত সমুদয় কার্য্য উঠিয়া গিয়াছে। এখন এলবার্ট কলেজ ভিন্ন অন্য কোনও স্থতি-চিহ্ন নাই।

১৮৭১ সালে ব্রাহ্মবিবাহ বিধিবদ্ধ করিবার আন্দোলন প্রবলরূপে উপস্থিত হয়। ব্রাহ্মদিগের নামে বিবাহ সধকীয় কোনও রাজবিধি প্রণীত হয়, আদি-সমাজ ইহার বিরোধী হওয়াতে, ব্রাহ্মবিবাহবিধি এই নাম ত্যাগ করিয়া, ১৮৭২ সালের তিন আইন নাম দিয়া একটি সিভিল বিবাহ বিধি প্রচারিত হয়। তদবধি তদনুসারেই উন্নতিশীল ব্রাহ্মদিগের বিবাহাদি হইয়া আসিতেছে।

এই সময়েই কেশবচন্দ্র কতকগুলি ব্রাহ্মপরিবারকে একসঙ্গে রাখিয়া, দৈনিক উপাসনা, পাঠ, সংপ্রসঙ্গ, সময়ে আহার, সময়ে বিশ্রাম প্রভৃতির নিয়ম শিক্ষা দিয়া, ব্রাহ্মপরিবারের আদর্শ প্রদর্শনের উদ্দেশ্যে “ভারতপ্রশ্ন” নামে একটি আশ্রম প্রতিষ্ঠিত করেন। প্রচারকদিগের অনেকে এবং অপর ব্রাহ্মদিগেরও কেহ কেহ সপরিবারে সেই আশ্রমে বাস করিতেন। কেশবচন্দ্র প্রতিদিন উপাসনাকার্য্য সম্পাদন করিতেন ; এবং সকলে নিজ নিজ ব্যয় দিয়া, একত্র আহারাদি করিয়া, এক পরিবারভুক্ত হইয়া থাকিতেন।

আশ্রম ভবনেই বয়স্ক মহিলাদের জন্য একটি বিজ্ঞানালয় ছিল। সেখানে আমরা কয়েকজন শিক্ষকতা করিতাম ; এবং আশ্রমবাসীদের ও বাহিরের ব্রাহ্মদিগের পত্নী, ভগিনী ও কন্যাগণ পাঠ করিতেন।

১৮৭২ সালে উন্নতিশীল ব্রাহ্মদলে স্বাধীনতার আন্দোলন উপস্থিত হইল। এ আন্দোলন কালে থামিল বটে, কিন্তু ত্বরায় আর এক প্রতিবাদের রোল উঠিল। আশ্রমের অধ্যক্ষের সহিত আশ্রমবাসী কোনও ব্রাহ্মের বিবাদ উপস্থিত হইয়া, সেই বিবাদের প্রতিধ্বনি বাহিরের সংবাদ পত্রে বাহির হইয়া, তাহা হইতে হাইকোর্টে এক মোকদমা উঠিল। কেশবচন্দ্র স্বয়ং বাদী হইয়া ঐ মোকদমা উপস্থিত করিলেন। প্রতিবাদিগণ ক্ষমা প্রার্থনা করিতে মোকদমা

উঠিয়া গেল বটে, কিন্তু ইহা হইতে পরোক্ষভাবে ব্রহ্মমন্দিরের উপাসকমণ্ডলীর সভ্যগণের মধ্যে আর এক আন্দোলন উঠিল। উপাসকমণ্ডলীর কার্যে উপাসকগণের অধিকার স্থাপনের চেষ্টা আরম্ভ হইল এবং কেশবচন্দ্রের অবলম্বিত কতকগুলি মত লইয়া বিশেষ আলোচনা চলিল। এই বিরোধিদল “সমদর্শী” নামে এক মাসিকপত্র বাহির করিলেন; এবং প্রকাশ্য বক্তৃতাাদি করিতে প্রবৃত্ত হইলেন।

ওদিকে কেশবচন্দ্র তাঁহার অল্পগত সাধকদলকে যোগী, ভক্ত প্রভৃতি কয়েক শ্রেণীতে বিভক্ত করিয়া বিশেষ উপদেশ দিতে প্রবৃত্ত হইলেন; এবং কলিকাতার অনতিদূরে একটা উগ্গান-বাটিকা ক্রয় করিয়া, তাহার “সাধন-কানন” নাম রাখিয়া, মধ্যে মধ্যে সেখানে গিয়া প্রচারকদের সহিত বাস করিতে লাগিলেন। এই সময়ে তিনি বিশেষভাবে বৈরাগ্যের উপদেশ দিতে প্রবৃত্ত হন; এবং তাঁহার নিদর্শন স্বরূপ নিজে স্বপাকে আহার করিতে আরম্ভ করেন। তাঁহার অহু করণে তাঁহার প্রচারকগণের অনেকেও স্বপাকে আহার করিতে থাকেন। ইহা লইয়াও ব্রাহ্মদিগের মধ্যে মতভেদ ও বাদানুবাদ আরম্ভ হয়।

১৮৭৭ সালের প্রারম্ভে সমাজের কার্যে নিয়মতন্ত্র প্রণালী স্থাপনের উদ্দেশ্যে “সমদর্শী” দল একটা ব্রাহ্মপ্রতিনিধি সভা গঠনের জন্ত ব্যগ্র হন। কেশবচন্দ্র তাঁহাদের চেষ্টাতে বাধা দেন নাই; বরং সাহায্য করিতে সম্মত হইয়াছিলেন। কিন্তু এই চেষ্টা সম্পূর্ণ কার্যে পরিণত হইতে না হইতে কুচ-বিহারের বিবাহ আসিয়া পড়িল; এবং ঐ বিবাহে ব্রাহ্মদের অবলম্বিত কতকগুলি নিয়ম লঙ্ঘন হওয়াতে উন্নতিশীল ব্রাহ্মদল ভাঙ্গিয়া দুই ভাগ হইয়া যায়।

বিবাহান্তে কেশববাবুকে আচার্য্যের পদ হইতে ও ভারতবর্ষীয় ব্রাহ্মসমাজের সম্পাদকের পদ হইতে অবসৃত করিবার জন্ত চেষ্টা আরম্ভ হইল। কেশববাবু তাহা হইতে দিলেন না; সুতরাং ব্রাহ্মদিগের অধিকাংশ তাঁহাকে পরিত্যাগ করিয়া “সাধারণ ব্রাহ্মসমাজ” নামে একটা স্বতন্ত্র সমাজ স্থাপন করিলেন।

ইহার কিছুদিন পরে কেশবচন্দ্র তাঁহার নিজের বিভাগীয় সমাজের “নব-বিধান” নাম দিয়া, তাহার নূতন বিধি, নূতন সাধন, নূতন লক্ষণ, নূতন প্রণালী প্রভৃতি সৃষ্টি করিতে প্রবৃত্ত হইলেন; মহত্মদের অহু করণে বিরোধিগণকে কাকের শ্রেণী গণ্য করিয়া তাহাদের প্রতি কটুক্তি বর্ষণ করিতে লাগিলেন; এবং আপনার দলের শ্রেষ্ঠতা প্রতিপাদনের জন্ত বিবিধমতে প্রয়াসী হইলেন।

ফলতঃ, এই বিবাদে পর ১৮৭৮ সাল হইতে ১৮৮৪ সাল পর্য্যন্ত এই পাঁচ বৎসরে তিনি ভগ্নগৃহের পুনর্গঠনের জন্ত যেরূপ গুরুতর শ্রম করিয়াছিলেন তৎপূর্বে বিশ বৎসরে তাহা করিয়াছিলেন কি না সন্দেহ। সেই শ্রমে তাঁহার শরীর ভগ্ন হইয়া গেল। ১৮৮৩ হইতেই দারুণ বহুমাত্র রোগ ধরা পড়িল; এবং ১৮৮৪ সালের ৮ই জানুয়ারি দিবসের প্রাতে প্রাণবায়ু তাহার শ্রান্ত ক্লান্ত দেহকে পরিত্যাগ করিয়া গেল।

দীনবন্ধু মিত্র ।

মাইকেল মধুসূদন দত্ত যে কেবল মাত্র গুপ্ত কবি কর্তৃক দৃঢ়ীকৃত মিত্রাক্ষর নিগড় হইতে বঙ্গ-কবিতাকে উদ্ধার করিবার প্রয়াস পাইয়াছিলেন তাহা নহে; “নাটুকে” রামনারায়ণের অবলম্বিত নাট্যকাব্যের রীতি হইতেও বঙ্গীয় নাট্য-কাব্যকে উদ্ধার করিবার প্রয়াস পাইয়াছিলেন। ইহা অগ্রেই প্রদর্শন করিয়াছি। তাঁহার প্রণীত শশিষ্ঠা ও কৃষ্ণকুমারী নাট্যকাব্যের নূতন পথ প্রদর্শন করিয়া যায়। এই নূতন পথে অগ্রসর হইয়া অনেকে নাটক রচনা করিবার জন্ত প্রয়াসী হন। তন্মধ্যে দীনবন্ধু মিত্রই সমধিক প্রসিদ্ধি লাভ করিয়াছেন। ইঁহার প্রণীত নাটক সকল সে সময়ে বঙ্গীয় পাঠক সমাজে প্রচুর সমাদর পাইয়াছিল। আমাদের সাহিত্য জগতের উজ্জল নক্ষত্রদিগের মধ্যে ইনিও একজন। যে সময়ে কেশবচন্দ্র সেন বাঙ্গালি জাতির নব শক্তি ও নব আকাঙ্ক্ষার উন্মেষের মুখপাত্র স্বরূপ হইয়া দাঁড়াইয়াছিলেন, যে সময়ে বঙ্কিমচন্দ্র ও “বঙ্গদর্শন” আমাদের চিন্তার এতটা স্থান অধিকার করিয়াছিলেন, সেই সময়ে দীনবন্ধু আর এক দিক দিয়া সেই উন্মেষে সহায়তা করিয়াছিলেন তাহাতে সন্দেহ নাই। সেইজন্য এ কালের প্রধান পুরুষদিগের মধ্যে তাঁহারও জীবনের সংক্ষিপ্ত ইতিবৃত্ত দিতে অগ্রসর হইতেছি।

দীনবন্ধু বাঙ্গালা ১২৩৬ বা ইংরাজী ১৮২৯ সালে কলিকাতার অদূরবর্তী চৌবেড়িয়া নামক গ্রামে জন্মগ্রহণ করেন। তাঁহার পিতার নাম কালাচাঁদ মিত্র। কালাচাঁদ মিত্র সামান্য বিষয় কর্ম করিয়া অতি কষ্টে সংসার যাত্রা নির্বাহ করিতেন। তাঁহার এরূপ সামর্থ্য ছিল না যে নিজ পুত্রের উচ্চ শিক্ষার ব্যয় নির্বাহ করেন; সুতরাং তিনি বাধ্য দীনবন্ধুকে গ্রাম্য পাঠশালাতে সামান্য-রূপ জমিদারি হিসাব শিখাইয়া অল্প বয়সেই তাঁহাকে বিষয় কর্মে নিযুক্ত



Devo Bandho Miller

(296 951)

করিয়া দেন। ঐ কৰ্মের আর অতি অল্প ছিল, কিন্তু তাহাতেই তিনি নিজ আয়ের অনেক সাহায্য হইত বলিয়া মনে করিতেন। কিন্তু এই কাজ করিয়া দীনবন্ধু চিত্তে সন্তোষ লাভ করিতেন না। তাঁহার মন অধিক জ্ঞান লাভের জন্য, বিশেষতঃ ইংরাজী শিক্ষা করিবার জন্য, পিঞ্জরাবদ্ধ বিহঙ্গের ছায় সর্বদা আপনাকে অস্বথী বোধ করিত।

অবশেষে একদিন দীনবন্ধু কৰ্ম ছাড়িয়া স্বীয় পিতাকে কিছু না বলিয়া গোপনে কলিকাতায় পলাইয়া আসিলেন; এবং একজন আত্মীয়ের আশ্রয়ে থাকিয়া ইংরাজী শিক্ষা আরম্ভ করিলেন। এই সময়ে তাঁহাকে বিজ্ঞা শিক্ষার জন্য নানা প্রকার ক্লেশ সহ্য করিতে হইয়াছিল। স্বয়ং রন্ধন করিয়া খাওয়াইয়া অপরের বাসাতে থাকিতে হইত। কিন্তু কোনও ক্লেশেই তাঁহাকে স্বীয় অভীষ্ট পথ হইতে বিরত করিতে পারিত না।

দীনবন্ধুর কলিকাতায় আসা ও বিজ্ঞাশিক্ষা আরম্ভ করা বিষয়ে একটা কৌতুকজনক ঘটনা আছে। শৈশবে তাঁহার পিতা তাঁহার নাম রাখিয়াছিলেন “গুরুদেব নারায়ণ”; লোকের মুখে এই নাম দাঁড়াইল “গুরু”, সময় সময় বালকদিগের মুখে হইয়া পড়িল “থু থু গুরু, গুরু”! এই রূপে পিতৃদত্ত নামটা বালকের অশাস্তির একটা কারণ হইয়া উঠিয়াছিল। যদিও তাঁহার জননী বিদ্রূপকারী বালকদিগকে ভিন্নস্বার করিয়া বলিতেন “তোরা একদিন দেখবি ওর গুরু দেশ আমোদিত হবে” তথাপি সমবয়স্কদিগের বিদ্রূপে শিশু গুরুদেব নারায়ণ নিশ্চয় উত্তাক্ত হইতেন। বোধ হয় এই কারণেই তিনি কলিকাতাতে আসিয়া নিজে দীনবন্ধু নাম লইলেন এবং সেই নামেই স্কুলে ভর্তি হইলেন। তাঁহার ছুঃখ-সন্তপ্ত হৃদয় হইতে ‘নীলদর্পণ’ বাহির হইয়াছিল, তিনি যে নিজে দীনবন্ধু নাম পছন্দ করিয়া লইয়াছিলেন এটা একটা বিশেষ স্মরণীয় ঘটনা বলিতে হইবে। যাহা হউক তিনি স্কুলে ভর্তি হইয়া একরূপ আগ্রহের সহিত আত্মোন্নতি সাধনে নিযুক্ত হইলেন যে, সকল শ্রেণীতে প্রশংসা ও নির্দিষ্ট পারিতোষিক লাভ করিতে লাগিলেন। দীনবন্ধু শিক্ষা বিষয়ে একটু আগ্রহসর হইয়াই গুপ্ত কবির প্রভাবের মধ্যে পড়িয়া গেলেন; প্রভাকরে লিখিতে আরম্ভ করিলেন। এই সময়ে তিনি “মানব-চরিত্র” নামে একখানি পঞ্চগ্রন্থ রচনা করেন। তাহাতে তাঁহার কবিত্ব ব্যাতি তদানীন্তন সমাজে ব্যাপ্ত হয়। প্রভাকরে লিখিত কবিতাগুলির মধ্যে কতকগুলি কবিতা লোকের দৃষ্টিকে বিশেষরূপে আকৃষ্ট করিয়াছিল। কিন্তু তিনিও চরমে বঙ্কিমের ছায় পড় রচনা

পরিচয় করিয়া নাটক রচনাকে আপনার প্রতিভা বিকাশের উপায়রূপে অবলম্বন করেন।

১৮৫৬ সালে দীনবন্ধু কলেজ হইতে বাহির হইয়া গবর্ণমেন্টের অধীনে ডাক বিভাগে কর্ম করিতে প্রবৃত্ত হন। এতৎ সূত্রে তিনি উড়িষ্যা, নদীয়া, ঢাকা, কুমিল্লা, লুশাই পাহাড়, প্রভৃতি নানাস্থানে ভ্রমণ করেন। তিনি রাজকার্য্য বিষয়ে বৈরূপ দক্ষতা প্রদর্শন করিয়াছিলেন, তাহার জগ্গই প্রধান প্রধান কাজের ভার তাঁহার উপরে জ্ঞাত হইত। ১৮৭১ সালে লুশাই যুদ্ধ বাধিলে, ডাকের বন্দোবস্ত করিবার ভার তাঁহার উপরেই অর্পিত হইয়াছিল। এই সকল কার্য্য সমুচিত রূপে নির্বাহ করিয়া তিনি গবর্ণমেন্টের নিকট হইতে ‘রায় বাহাদুর’ উপাধি প্রাপ্ত হইয়াছিলেন।

গবর্ণমেন্টের কার্য্যোপলক্ষে যে তিনি নানা স্থানে ভ্রমণ ও নানা শ্রেণীর লোকের সহিত পরিচয় ও আত্মীয়তা করিতে পারিয়াছিলেন, তাহাই তাঁহার নাটক রচনার পক্ষে বিশেষ সাহায্য করিয়াছিল। একরূপ অভিজ্ঞতা, একরূপ মানব-চরিত্র দর্শন, ও একরূপ বিবিধ-সামাজিক অবস্থার জ্ঞান আর কাহারও হয় নাই। তাঁহার রচিত নাটক সকলে আমরা এই সকলের যথেষ্ট পরিচয় প্রাপ্ত হই।

১৮৫৯ সালে যখন নদীয়া ও যশোহর প্রভৃতি জেলার প্রজাগণের সহিত নীল-করদিগের বোর বিবাদ উপস্থিত হইয়া প্রজাদিগের ধ্বংস ঘট চলিতেছিল, তখন দীনবন্ধু ঢাকাতে ছিলেন। তিনি তৎপূর্বে নিজে অনেক নীল-প্রসীড়িত স্থানে ভ্রমণ করিয়া প্রজাদের দুঃখ স্বচক্ষে দর্শন করিয়াছিলেন। সে সময়ে হিন্দু-পেট্রিয়ারের পৃষ্ঠায় হরিশ্চন্দ্র তাঁহার ওজস্বিনী ভাষাতে প্রজাদের দুঃখের যে সকল চিত্র অঙ্কিত করিতেছিলেন, সে সকল চিত্রের অধিকাংশ দীনবন্ধুর নিজের পরীক্ষিত ছিল। স্মৃত্যু প্রজাদের দুঃখ স্মরণ করিয়া দেশহিতৈষী মাত্রেয়ই হৃদয় যে আগুন তখন জলিয়াছিল, তাহা তাঁহারও হৃদয়ে জলিতেছিল। হৃদয়ের সেই অগ্নি লইয়াই তিনি “নীল-দর্পণ” লিখিবার জন্ত লেখনী ধারণ করিয়াছিলেন। অগ্রেই বলিয়াছি, ১৮৬০ সালের শেষভাগে ঢাকা হইতে নীল-দর্পণ প্রকাশিত হয়। বঙ্গদেশীয় গবর্ণমেন্টের প্রধান কর্মচারীদের অহুমতিক্রমে মাইকেল মধুসূদন দত্ত, ইহা ইংরাজীতে অনুবাদ করেন, এবং রেভারেণ্ড জেমস লং সাহেব তাহা নিজের নামে মুদ্রিত করেন। তাহা লইয়া যে যোকদ্দমা উপস্থিত হয়, এবং সদাশয় লং সাহেবের যে এক হাজার টাকা জরিমানা ও

একমাস কারাদণ্ড হয় সে সকল বিবরণ অগ্রেই দিয়াছি। মহাত্মার্তের অহুবাদক সুপ্রসিদ্ধ কালীপ্রসন্ন সিংহ মহোদয় ঐ এক হাজার টাকা জরিমানা নিজে প্রদান করেন।

প্রতিহিংসোত্তম নীলকরগণ তখন দীনবন্ধুকে ধরিতে না পারিয়া লংকে কারাগারে দিয়া এবং হিন্দু পেট্রিয়টের সম্পাদক হরিশকে ধনে প্রাণে সারা করিয়া নিবৃত্ত হইল। এদিকে দীনবন্ধু স্বীয় নির্দিষ্ট পথে অবাধে অগ্রসর হইলেন। “নবীন তপস্বিনী,” “বিয়ে পাগলা বুড়ো,” “সধবার একাদশী,” “লীলাবতী,” “জামাইবারিক” প্রভৃতি অদ্ভুত হাস্য-রসাত্মক নাটক সকল পরে পরে প্রকাশ পাইতে লাগিল।

শেষদশায় তিনি “সুরধুনী-কাব্য” ও “দ্বাদশ কবিতা” নামে দুইখানি পদ্য-গ্রন্থ প্রকাশ করেন। ইহার পরে তিনি দুরারোগ্য বহুমূত্র রোগে আক্রান্ত হন এবং তাহার চরম ফল দারুণ বিচ্ছেদকে তাঁহাকে শয্যাস্থ করে। সেই রোগেই ১৮৭৩ সালের নবেম্বর মাসে গতাস্থ হন। তিনি যখন মৃত্যুশয্যাতে শয়ান, তখন তাঁহার শেষ গ্রন্থ, “কমল কামিনী” নাটক যন্ত্রহ। এই তাঁর শেষ সাহিত্য রচনা। তিনি সর্বজন-প্রিয় ছিলেন। তাঁহার চিরদিনের বন্ধু বঙ্কিমচন্দ্র বলিয়াছেন—“তাঁহার স্বভাব তাদৃশ তেজস্বী ছিল না বটে, বন্ধুর অহুরোধে বা সংসর্গ দোষে নিন্দনীয় কার্যের সংস্পর্শ তিনি সব সময়ে এড়াইতে পারিতেন না ; কিন্তু যাহা অসৎ, যাহাতে পরের অনিষ্ট আছে, যাহা পাপের কার্য, এমন কার্য দীনবন্ধু কখনও করেন নাই।”

বিষয় কঠোপলক্ষে তিনি যত স্থানে গিয়াছিলেন, তন্মধ্যে কৃষ্ণনগরে অনেক কাল বাস করেন। এখানে তিনি স্থায়ীরূপে থাকিবার মানসে একটা বাসভবন নির্মাণ করিয়াছিলেন। সেই কৃষ্ণনগরে বাস কালেই লাহিড়ী মহাশয়ের সহিত তাঁহার আলাপ পরিচয় ও আত্মীয়তা জন্মে। লাহিড়ী মহাশয়কে তিনি কি ভাবে দেখিতেন, তাহা তাঁহার প্রণীত “সুরধুনী কাব্য” হইতে উদ্ধৃত নিম্নলিখিত কয়েক পংক্তি হইতে বিশেষরূপে বৃত্তিতে পারা যাইবে।

“পরম ধার্মিকবর এক মহাশয়,

সত্য-বিমণ্ডিত তাঁর কোমল-হৃদয়।

সারল্যের পুত্তলিকা, পরহিতে রত,

স্বপ্ন ছঃপ্ণ সম জ্ঞান প্রাণীদের মত।

জিতেন্দ্রিয়, বিজ্ঞতম, বিশুদ্ধ বিশেষ,


রসনার বিরাজিত ধর্ম উপদেশ ।
 একদিন তাঁর কাছে করিলে যাপন,
 দশদিন থাকে ভাল হুর্কিণীত মন ।
 বিদ্যা বিতরণে তিনি সদা হরষিত,
 তাঁর নাম রামতনু সকলে বিদিত ।

“একদিন তাঁর কাছে করিলে যাপন, দশদিন থাকে ভাল হুর্কিণীত মন।” এই বাক্যগুলি লাহিড়ী মহাশয়ের কি অকৃত্রিম সাধুতারই পরিচয় দিতেছে! সাধুতার কত প্রকার লক্ষণ শুনিয়াছি তন্মধ্যে একটি প্রধান এই যে “তিনিই সাধু যার সঙ্গে বসিলে হৃদয়ের অসাধু ভাব সকল লজ্জা পায়, ও সাধু ভাব সকল জাগিয়া উঠে”। প্রকৃত সাধুর নিকটে বসিয়া উঠিয়া আসিবার সময় অনুভব করিতে হয়, বেরূপ মানুষটা গিয়াছিলোম, তাহা অপেক্ষা উৎকৃষ্ট মানুষ হইয়া ফিরিতেছি। দীনবন্ধু সাক্ষ্য দিতেছেন যে লাহিড়ী মহাশয়ের এরূপ সাধুতা ছিল, যে তাঁহার সহবাসে একদিন যাপন করিয়া আসিলে দশদিন হৃদয় মনের উন্নত অবস্থা থাকিত। এটা স্মরণ করিয়া রাখিবার মত কথা।

বঙ্কিমচন্দ্র চট্টোপাধ্যায় ।

১৮৩৮ খ্রীষ্টাব্দে নৈহাটীর সন্নিক্ত কাঁঠালপাড়া নামক গ্রামে বঙ্কিমচন্দ্রের জন্ম হয়। তাঁহার পিতা যাদবচন্দ্র চট্টোপাধ্যায় বহুদিন ইংরাজ গবর্ণমেন্টের অধীনে ডেপুটী কালেক্টরের কাজ করিতেন।

বাল্যকালে বঙ্কিমচন্দ্র হুগলী-কালেজে পাঠ করেন। সেখানে পাঠ করিবার সময়েই তাঁহার বঙ্গ-সাহিত্যের প্রতি দৃষ্টি পড়ে। সে সময়ে কবিবর ঈশ্বরচন্দ্র গুপ্তের প্রাচুর্ভাবের কাল। তখন প্রতিভাশালী ব্যক্তি মাজেই সাহিত্যজগতে কিছু করিতে ইচ্ছুক হইলে ঈশ্বরচন্দ্র গুপ্তের শিষ্যত্ব স্বীকার করিতেন। গুপ্ত কবিও তখন প্রতিভার উৎসাহদাতা ছিলেন। অগ্রেই বলিয়াছি, তিনি অক্ষয় কুমার দত্তের উৎসাহদাতাদিগের মধ্যে একজন ছিলেন। কিন্তু কাব্যজগতে তাঁহার শিষ্যবর্গের মধ্যে, রঙ্গলাল বন্দ্যোপাধ্যায়, মনোমোহন বসু, দ্বারকানাথ অধিকারী, বঙ্কিমচন্দ্র চট্টোপাধ্যায়, দীনবন্ধু মিত্র প্রভৃতি সমধিক প্রতিষ্ঠা লাভ করিয়াছেন। তৎকালপ্রচলিত রীতি অনুসারে বঙ্কিম প্রথমে “প্রভাকরে”



রায় বক্ষিমচন্দ্র চট্টোপাধ্যায় বাহাদুর ।

(২৮২ পৃষ্ঠা)

লিখিয়া কাব্যরচনার অভ্যাস আরম্ভ করেন। তখন প্রভাকরে উত্তর প্রভাত্তরে কবিতা লেখা যুবক লেখকদিগের একটা মহা উৎসাহের ব্যাপার ছিল। এই সকল বাক্যধ্বজ “কালেক্সীয় কবিতাধ্বজ” নামে প্রথিত হইয়াছে। একরূপ শোনা যায় বঙ্কিমচন্দ্র যৌবনের প্রারম্ভে “ললিতা-মানস” নামে একখানি পুথ্য-গ্রন্থ প্রচার করিয়াছিলেন।

তিনি হুগলী-কালেজ হইতে কলিকাতা প্রেসিডেন্সি কালেজে গমন করেন; এবং সেখান হইতে বিশ্ববিদ্যালয়ের প্রদত্ত বি, এ, উপাধি সর্বপ্রথমে প্রাপ্ত হইয়া ডেপুটি মাজিষ্ট্রেটী কর্ম প্রাপ্ত হন।

১৮৬৪ সালে তাঁহার প্রণীত “হর্গেশ-নন্দিনী” নামক উপন্যাস মুদ্রিত ও প্রচারিত হয়। আমরা সে দিনের কথা ভুলিব না। হর্গেশ-নন্দিনী বঙ্গ-সমাজে পদার্পণ করিবারাত্র সকলের দৃষ্টিকে আকর্ষণ করিল। এ জাতীয় উপন্যাস বাঙ্গালাতে কেহ অগ্রে দেখে নাই। আমরা তৎপূর্বে “বিজয় বসন্ত” “কামিনী কুমার” প্রভৃতি কতিপয় সেকেলে কাব্যধ্বজী ধরণের উপন্যাস, গার্হস্থ্য পুস্তক প্রচার সভার প্রকাশিত, “হংসরূপী রাজপুত্র”, “চক্ৰবর্তী রাজ” প্রভৃতি কয়েকটা ছোট গল্প, এবং “আরব্য উপন্যাস” প্রভৃতি কয়েকখানি উপকথা গ্রন্থ আগ্রহের সহিত পড়িয়া আসিতেছিলাম। “আলালের ঘরের দুলাল” তাহার মধ্যে একটু নূতন ভাব আনিয়াছিল। কিন্তু হর্গেশ-নন্দিনীতে আমরা যাহা দেখিলাম তাহা অগ্রে কখনও দেখি নাই। একরূপ অদ্ভুত চিত্রণ শক্তি বাঙ্গালাতে কেহ অগ্রে দেখে নাই। দেখিয়া সকলে চমকিয়া উঠিল। কি বর্ণনার রীতি, কি ভাষার নবীনতা, সকল বিষয়ে বোধ হইল, যেন বঙ্কিমবাবু দেশের লোকের রুচি ও প্রবৃত্তির শ্রোত পরিবর্তিত করিবার জন্ত প্রতিজ্ঞাকৃত হইয়া লেখনী ধারণ করিয়াছেন।

অল্পদিন পরে “কপালকুণ্ডলা” দেখা দিল। যে তুলিকা হর্গেশ-নন্দিনীর নয়নানন্দকর কমনীয়তা চিত্রিত করিয়াছিল, তাহা কপালকুণ্ডলার পান্ডুর্য্য-রস-পূর্ণ ভাব সৃষ্টি করিল! লোকে বিশ্বাসবিষ্ট হইয়া বাইতে লাগিল।

ক্রমে মৃণালিনী, চন্দ্রশেখর, বিষবৃক্ষ, কৃষ্ণকান্তের উইল, আনন্দমঠ, দেবী-চৌধুরাণী, কমলাকান্তের দপ্তর, সীতারাম, রাজসিংহ প্রভৃতি আরও অনেক-গুলি উপন্যাস প্রকাশিত হইয়া বঙ্কিমচন্দ্রকে বঙ্গীয় ঔপন্যাসিকদিগের শীর্ষ-স্থানে স্থাপন করিল।

বঙ্কিমবাবু স্বপ্রণীত গ্রন্থ সকলে এক নূতন বাঙ্গালা গদ্য লিখিবার পদ্ধতি

অবলম্বন করিলেন। তাহা একদিকে বিদ্যাসাগরী বা অক্ষয়ী ভাষা ও অপর-
দিকে আলালী ভাষার মধ্যগা। ইহাতে অসম্ভব হইয়া আমার পূজ্যপাদ মাতুল
দ্বারকানাথ বিদ্যাবূষণ মহাশয় তাঁহার সম্পাদিত সোমপ্রকাশে বঙ্কিমবাবু ও
তাঁহার অনুকরণকারীদিগের নাম “শব-পোড়া মড়াদাহের দল” রাখিলেন।
অভিপ্রায় এই, যাহারা “শব” বলে তাহারা “দাহ” বলে, যাহারা “মড়া” বলে
তাহারা তৎসঙ্গে “পোড়া” বলে, কেহই “শবপোড়া” বা “মড়াদাহ” বলে না।
তাঁহার মতে বঙ্কিমী দল ঐরূপ ভাষা ব্যবহার দোষে দোষী। আমরা, সংস্কৃত
কলেজের ছাত্রদল, সোমপ্রকাশের পক্ষাবলম্বন করিলাম এবং বঙ্কিমী দলকে
“শব পোড়া মড়াদাহের দল” বলিয়া বিজ্ঞপ করিতে আরম্ভ করিলাম। বঙ্কিমের
দল ছাড়িবেন কেন? তাঁহার সোমপ্রকাশের ভাষাকে “ভট্টাচার্য্যের চানা”
নাম দিয়া বিজ্ঞপ করিতে লাগিলেন।

১৮৭২ সালে “বঙ্গদর্শন” প্রকাশিত হইল। বঙ্কিমের প্রতিভা আর এক
আকারে দেখা দিল। প্রতিভা এমনি জ্বলিত, ইহা বাহা কিছু স্পর্শ কয়ে
তাহাকেই সজীব করে। বঙ্কিমের প্রতিভা সেইরূপ ছিল। তিনি মাসিক
পত্রিকায় সম্পাদক হইতে গিয়া একরূপ মাসিক পত্রিকা সৃষ্টি করিলেন, যাহা
প্রকাশ মাত্র বাঙ্গালির ঘরে ঘরে স্থান পাইল। তাহার সকলি যেন চিত্তা-
কর্ষক, সকলি যেন মিষ্ট। বঙ্গদর্শন দেখিতে দেখিতে উদীয়মান সূর্য্যের স্তায়
লোক চক্ষুর সমক্ষে উঠিয়া গেল। বঙ্কিমচন্দ্র যখন বঙ্গদর্শনের সম্পাদক তখন
তিনি রুশোর সাম্যভাবের পক্ষ, উদার নৈতিকের অগ্রগণ্য, এবং বেহাম ও
মিলের হিতবাদের পক্ষপাতী। তিনি তাঁহার অনুতন্নয়ী ভাষাতে সাম্য নীতি
এরূপ করিয়া ব্যাখ্যা করিতেন যে দেখিয়া যুবকদের মন মুগ্ধ হইয়া যাইত।
কিন্তু হুঃখের বিষয় বঙ্গদর্শন বহুদিন থাকিল না। বঙ্কিমবাবু বিষয়াস্তরে ব্যাপ্ত
হওয়াতে তাহা হস্তান্তরে গেল, ও সেই সঙ্গে তাহার আকর্ষণও গেল এবং
ক্রমে তিরোভাব হইল।

আমাদের দেশের প্রতিভাশালী ব্যক্তিদিগের সাধারণ নিয়মামুসারে বঙ্কিমের
প্রতিভার শক্তি পয়তাল্লিশ বৎসরের পর মন্দীভূত হইয়া আসিল। তৎপরে
তিনি যে কয়েক খানি গ্রন্থ রচনা করিয়াছেন, তাহার ভাষা ও চিত্রণশক্তির
সেই পূর্ব্বকার উদ্ভাদিনী শক্তি নাই, সে সজীবতা নাই। তাঁহার দৃষ্টি ও
সমুখ হইতে পশ্চাৎদিকে পড়িতে লাগিল।

শেষ কয় বৎসর তিনি ধর্ম্মতত্ত্বের ব্যাখ্যাতে আপনাকে অর্পণ করিয়াছিলেন।

জ্ঞানিতে পাওয়া যায়, এই অবস্থাতে তিনি আপনার প্রকাশিত “সাম্য” নামক গ্রন্থের প্রচার বন্ধ করিতে ইচ্ছুক হইয়াছিলেন। যাহা হউক, তাঁহার শেষ প্রচারিত এই নবধর্মের প্রধান লক্ষণ ছিল বৃত্তি-নিচয়ের সামঞ্জস্য এবং শ্রীকৃষ্ণই তাঁহার আদর্শ পুরুষ। এই নবভাব ব্যক্ত করিবার জন্য তিনি কৃষ্ণচরিত ও ধর্মতত্ত্ব বিষয়ে গ্রন্থ রচনা করেন।

এদিকে তিনি গবর্ণমেন্টের ডেপুটি ম্যাজিস্ট্রেট দলের মধ্যে সর্ব-প্রথম শ্রেণীতে উঠিয়া, রাজ-প্রসাদের চিহ্ন স্বরূপ “রায় বাহাদুর” ও সি, আই, ই, উপাধি প্রাপ্ত হন। বঙ্কিম বাবু চরিত্রাংশে কেশবচন্দ্র সেন বা মহেন্দ্রলাল সরকার বা দ্বারকানাথ বিদ্যাভূষণের সমকক্ষ লোক ছিলেন না; কিন্তু প্রতিভার জ্যোতিতে দেশ উজ্জ্বল করিয়া গিয়াছেন।

ঘরে পরে এইরূপে সম্মানিত হইয়া ১৮৯৪ সালের ৮ই এপ্রেল দিবসে ভবধাম পরিত্যাগ করেন।

দ্বারকানাথ বিদ্যাভূষণ ।

এইকালের মধ্যে উপজ্ঞাস ও নাটক রচনা দ্বারা বঙ্গসমাজে যে পরিবর্তন ঘটয়াছিল, তাহা কথঞ্চিৎ প্রদর্শন করিয়া আর এক স্মৃহৎ বিপ্লবের বিষয় উল্লেখ করিতে যাইতেছি, তাহা বঙ্গীয় সাহিত্য জগতে “সোমপ্রকাশের” অভ্যুদয়।

কলিকাতার দক্ষিণ পূর্ব পাঁচ কোশ ব্যবধানে, চাপড়িপোতা গ্রামে, দাক্ষিণাত্য বৈদিক ব্রাহ্মণ কুলে দ্বারকানাথের জন্ম হয়। তাঁহার জন্মকাল বৈশাখ মাস, ১৮২০ সাল। তাঁহার পিতার নাম হরচন্দ্র ভায়রত্ন। ভায়রত্ন মহাশয় কলিকাতা হাতিবাগানের সুপ্রসিদ্ধ কাশীনাথ তর্কালঙ্কারের ছাত্র। তিনি সংস্কৃত বিদ্যাতে পারদর্শী হইয়া কলিকাতাতেই টোল চতুষ্পাঠী করিয়া অধ্যাপনা কার্যে নিযুক্ত হন। এতদ্বির তাঁহার অতিরিক্ত ছাত্রও থাকিত। অতিরিক্ত ছাত্রের মধ্যে ঈশ্বরচন্দ্র গুপ্ত ও রামতনু লাহিড়ী মহাশয়ের নাম উল্লেখ যোগ্য। ঈশ্বরচন্দ্র গুপ্তের অহুরোধেই ভায়রত্ন মহাশয় প্রভাকর পত্রিকার সম্পাদন বিষয়ে তাঁহার সহায়তা করিতেন।

দ্বারকানাথ তদানীন্তন প্রথানুসারে গুরুমহাশয়ের পাঠশালাে কিছুদিন পাঠ করিয়াই স্বগ্রামস্থ একজন আত্মীয়ের চতুষ্পাঠীতে সংস্কৃত পড়িতে

আরম্ভ করেন। ১৮৩২ সালের প্রারম্ভে তাঁহার পিতা তাঁহাকে টোল চতুষ্পাঠী হইতে লইয়া কলিকাতা সংস্কৃত কলেজে ভর্তি করিয়া দেন। ১৮৩২ সাল হইতে ১৮৪৫ সাল পর্য্যন্ত তিনি প্রশংসিত ও পুরস্কৃত হইয়া সংস্কৃত কলেজে ধাপন করেন। কলেজ হইতে উত্তীর্ণ হইয়া ঐ কলেজের লাইব্রেরিয়ানের পদ প্রাপ্ত হন। তৎপরে ১৮৪৫ সালে ব্যাকরণের অধ্যাপকের পদে নিযুক্ত হন। ক্রমে ক্রমে পদোন্নতি ও বেতনের উন্নতি হইয়া ১৮৭৩ সালের জুলাই মাসে কর্ম্ম হইতে অবসৃত হন। ইহার পর তিনি ১৮৮৭ সাল পর্য্যন্ত জীবিত ছিলেন। কিন্তু ১৮৭৩ সাল হইতেই তাঁহার স্বাস্থ্য ভগ্ন হয়। দারুণ বহুন্ম রোগে ধরে। শ্রম করা তাঁহার অভ্যাস ছিল ; নিক্ষেপা বসিয়া থাকিতে পারিতেন না ; বসিয়া থাকাকে ঘৃণা করিতেন ; স্ততরাং খাটিতে খাটিতে শরীর একবারে ভাঙ্গিয়া পড়িল। তদবস্থাতে ১৮৮৬ সালে স্বাস্থ্যলাভের আশায় মধ্য প্রদেশের রেওয়া রাজ্যের অন্তর্গত সাতনা নামক স্থানে গিয়া বাস করিলেন। সেইখানেই ঐ সালের ২২ আগষ্ট তাঁহার দেহান্ত হইল।

সোমপ্রকাশই ইঁহার প্রধান কীর্ত্তি ; সোমপ্রকাশই ইঁহাকে বঙ্গ সাহিত্যে চিরস্মরণীয় করিয়া রাখিবে ; স্ততরাং সোমপ্রকাশের সংক্ষিপ্ত ইতিবৃত্ত দিতেছি।

১৮৫৬ সালে হরচন্দ্র ঞ্চায়রত্ন মহাশয় স্বীয় পুত্র দ্বারকানাথকে সহায় করিয়া একটা মুদ্রা যন্ত্রের প্রতিষ্ঠা করেন। করিয়াই তিনি পীড়িত হইয়া পড়েন ; এবং অল্প কালের মধ্যেই গতাস্থ হন। ঐ বৎস হইতে দ্বারকানাথের লিখিত রোম ও গ্রীসের ইতিহাস নামক দুই বাঙ্গালা গ্রন্থ প্রকাশিত হয়। উৎকৃষ্ট বাঙ্গালা ভাষাতে লিখিত বৃহৎ ইতিহাস গ্রন্থ উহাই বোধ হয় প্রথম। যাহা হউক এই দুই ইতিহাস প্রকাশিত হইলে তাহা তদানীন্তন বঙ্গীয় পাঠকগণের দৃষ্টিকে আকর্ষণ করে ; এবং দ্বারকানাথের নাম বাঙ্গালা লেখক-দিগের মধ্যে পরিচিত হয়। তৎপরে তাঁহার রচিত বালক-পাঠ্য “নীতিসার,” প্রভৃতি প্রকাশিত হইয়াছে, কিন্তু সোমপ্রকাশের প্রভা সে সমুদয়কে ঢাকিয়া ফেলিয়াছে। গুনিয়াছি সোমপ্রকাশ প্রকাশের প্রস্তাব প্রথমে ঈশ্বরচন্দ্র বিজ্ঞানাগর মহাশয় বিজ্ঞানভূষণের নিকট উপস্থিত করেন। সারদা প্রসাদ নামে তাঁহাদের প্রিয় একজন বধির পণ্ডিতকে কাজ যোগান, তাঁহার অন্ততর উদ্দেশ্য ছিল। ১৮৫৮ সালে সোমপ্রকাশ প্রথম প্রকাশিত হইল। দ্বারকানাথ সম্পাদকতা ভার ও তাঁহার যন্ত্র মুদ্রাক্ষণের ব্যয়ভার গ্রহণ করিলেন।

বিজ্ঞানাগর মহাশয় প্রভৃতি কতিপয় বঙ্গ লেখক-শ্রেণীগণা হইলেন। কার্য্য-কালে সারদা প্রসাদ আসিলেন না; অপরাপর লেখকগণও অদর্শন হইলেন; সোমপ্রকাশ সম্পূর্ণ রূপে দ্বারকা নাথ বিজ্ঞানভূষণের উপরেই পড়িয়া গেল। তিনি অধ্যাপকতা বাদে যে কিছু অবসর কাল পাইতেন, তাহা সমুদয় সোম-প্রকাশ সম্পাদনে নিয়োগ করিতে লাগিলেন। তাঁহার ছায় কৰ্ত্তব্য-পরায়ণ মানুষ আমরা অল্পই দেখিয়াছি। তিনি যখন সংস্কৃত কালেজের পুস্তকালয়ে পাঠে নিমগ্ন থাকিতেন, তখন দেখিলে বোধ হইত না যে অধ্যাপকতা কার্য্য সূচাক্রমে নিপন্ন করা ভিন্ন তাঁহার পৃথিবীতে আর কোনও কাজ আছে। আবার যখন গৃহে সোমপ্রকাশের জন্ত রাশীকৃত দেশীও বিলাতী সংবাদ-পত্র, গবর্ণমেন্টের রিপোর্ট ও গ্রন্থাদি পাঠে মগ্ন থাকিতেন, তখন কোথা দিয়া ঘণ্টার পর ঘণ্টা যাইত তাঁহার জ্ঞান থাকিত না। রাত্রি ১১ টার সময় শয়ন করিতে যাইবার পূর্বে দেখিয়াছি তিনি কার্য্যে মগ্ন আছেন, রাত্রি ৪ টার সময়ে উঠিয়া দেখিয়াছি তিনি কার্য্যে মগ্ন আছেন। আমার বয়সের মধ্যে প্রত্যবে উঠিয়া তাঁহাকে কখনও ঘুমাইতে দেখিয়াছি এরূপ মনে হয় না।

দেখিতে দেখিতে সোমপ্রকাশের প্রভাব চারিদিকে বিস্তৃত হইয়া পড়িল। প্রভাকর ও ভাস্কর প্রভৃতি বঙ্গসমাজের নৈতিক বায়ুকে দূষিত করিয়া দিয়া ছিল, সোমপ্রকাশের প্রভাবে তাহা দিন দিন বিশুদ্ধ হইতে লাগিল। সোমবার আসিলেই লোকে সোমপ্রকাশ দেখিবার জন্ত উৎসুক হইয়া থাকিত। যেমন ভাবার বিশুদ্ধতা ও লালিতা, তেমনি মনের উদারতা ও যুক্তি-যুক্ততা, তেমনি নীতির উৎকর্ষ। চিন্তের একাগ্রতাটাই সোমপ্রকাশের প্রভাবের মূলে ছিল। তত্ত্ববোধিনী সম্পাদন বিষয়ে অক্ষয় বাবুর চিন্তের অদ্বুত একাগ্রতার অনেক গল্প শুনিয়াছি; আর সোমপ্রকাশ সম্পাদন বিষয়ে বিজ্ঞানভূষণ মহাশয়ের চিন্তের একাগ্রতা দেখিয়াছি; তাহার অতীক্রম সমগ্র হৃদয় মনের একীভাব আর কখনও দেখি নাই। তিনি সোমপ্রকাশে যাহা লিখিতেন তাহার এক পঙ্ক্তি কাহারও তুষ্টি সাধনের প্রতি দৃষ্টি রাখিয়া লিখিতেন না। লোক সমাজে আদৃত হইবার লোভে শোকের ক্রটি বা সংস্কারের অতীক্রম করিয়া কিছু বলিতেন না। যাহা নিজে সমগ্র হৃদয়ের সহিত বিশ্বাস করিতেন, তাহা হৃদয়-নিঃসৃত অকপট-ভাবে ব্যক্ত করিতেন। তাহাই ছিল সোমপ্রকাশের সর্ব্বপ্রধান আকর্ষণ। এই আকর্ষণ এতদূর প্রবল ছিল যে বিজ্ঞানভূষণ মহাশয় নিজ কাগজের বার্ষিক মূল্য করিয়াছিলেন ১০ দশ টাকা,

এবং তাহাও অগ্রিম দেয়। বাস্তবিক দশটা টাকা অগ্রে প্রেরণ না করিলে কাহাকেও একখানি কাগজ দেওয়া হইত না। ইহাতেও সোমপ্রকাশের গ্রাহক সে সময়ের পক্ষে বহুসংখ্যক ছিল।

সোমপ্রকাশ যদিও ১৮৬৩ সালের পূর্বেই প্রকাশিত হইয়াছিল, তথাপি ১৮৬০ হইতে ১৮৭০ পর্য্যন্ত এই কালের মধ্যেই ইহার প্রভাব সর্বত্র ব্যাপ্ত হয়; ইহা এক দিকে গবর্ণমেন্টের, অপর দিকে দেশবাসিগণের দৃষ্টিকে আকর্ষণ করে। প্রথম কয়েক বৎসর ইহা কলিকাতায় চাঁপাতলার এক গলি হইতে বাহির হইত। তখন সেই ভবনে ঈশ্বরচন্দ্র বিজ্ঞানাগর মহাশয় সর্বদা পদার্পণ করিতেন; এবং পরামর্শাদি দ্বারা সোমপ্রকাশ সম্পাদন বিষয়ে বিজ্ঞাতৃষণ মহাশয়ের বিশেষ সহায়তা করিতেন।

পরে ১৮৬১ কি ১৮৬২ সালে মাতলার রেলওয়ে খোলে। মাতলা বা পোষ্ট ক্যানিং একটা প্রধান বন্দর হইবে গবর্ণমেন্টের মনে এই আশা ছিল। গঙ্গার মুখে চড়া পড়িয়া বড় বড় জাহাজ কলিকাতাতে আসা চুঃসাধ্য হওয়াতে, মাতলাতে একটা বন্দর করিবার কথা চলিতেছিল, এবং পোষ্ট ক্যানিং কোম্পানি নামে এক কোম্পানি করিয়া টাকা তোলা হইয়াছিল। শেষে মাতলাকে অস্বাস্থ্যকর দেখিয়া সে সংকল্প ত্যাগ করা হইল। গবর্ণমেন্টের রেলওয়ে খোলাই সার হইল।

মাতলা রেলওয়ে খুলিলেই বিজ্ঞাতৃষণ মহাশয় সোমপ্রকাশ যন্ত্র তাঁহার বাস-গ্রাম চান্দড়িপোতাতে লইয়া যান, এবং সেখান হইতে উহা প্রকাশ করিতে থাকেন। সোমপ্রকাশ সে বিভাগের একটা প্রবল শক্তি হইয়া দাঁড়ায়। ইহার সাহায্যে অনেক সদলুষ্ঠানের সূত্রপাত হইয়াছে, অনেক অভ্যুত্থান নিবাহিত হইয়াছে। কেবল তাহা নহে, দেশে গিয়াই বিজ্ঞাতৃষণ মহাশয় নিজ বাস-গ্রামের নানাপ্রকার কলাগ সাধনে নিযুক্ত হইলেন। তন্মধ্যে একটা উচ্চশ্রেণীর ইংরাজী স্কুল স্থাপন। ঐ স্কুলটি তিনি নিজের বায়ে ও নিজের চেষ্টাতে রক্ষা করিতে লাগিলেন। তাহাতে কয়েক বৎসরে তাঁহার প্রচুর অর্থ ব্যয় হইয়া গেল। আত্মীয় স্বজন বন্ধু বান্ধব এই ব্যয়সাধ্য ব্যাপার হইতে নিরস্ত হইবার জন্ত তাঁহাকে কতই পরামর্শ দিয়াছিলেন, কিন্তু তিনি তাঁহার প্রতি কর্ণপাত করেন নাই। অনেক সময় দেখিয়াছি সংস্কৃত কালেজ হইতে বেতনটা পাইয়া বাড়ীতে ফিরিবার সময় পথে স্কুলগৃহে প্রবেশ করিয়া সে বেতনের অধিকাংশ তথাকার ব্যয় নির্বাহের জন্ত দিয়া সামান্য অর্থ লইয়া গৃহে ফিরিয়াছেন।

পাপের প্রতি তাঁহার এমনি ঘৃণা ছিল যে গ্রামের পাপাচারী লোকেরা তাঁহাকে দেখিয়া কাঁপিত। একবার একজন হুশ্চরিত্র পুরুষ একটা গোপ-জাতীয়া বিধবাকে বিপথে লইয়া গেল; এবং কিছুদিন পরে তাহাকে অন্তঃসত্ত্বা অবস্থাতে তাড়াইয়া দিল। বিজ্ঞাতৃষণ মহাশয় ইহা জানিবামাত্র নিজের ব্যয়ে সেই রমণীর দ্বারা আদালতে নালিস উপস্থিত করাইয়া সেই হুশ্চরিত্র পুরুষের নিকট হইতে ঐ নারীর মাসিক বৃত্তির ব্যবস্থা করিয়া দিলেন।

আর একবার একজন শিক্ষিতনামধারী ভদ্রলোক নিজ ধনাগমে দৃষ্ট হইয়া প্রতিবেশবাসিনী কোনও বিধবার কিছু জমি আত্মসাৎ করিবার জন্ত তাহার প্রতি বিবিধ প্রকারে অত্যাচার আরম্ভ করেন। একদিন বিজ্ঞাতৃষণ মহাশয় সোমপ্রকাশ লিখিতেছেন এমন সময়ে সংবাদ আসিল যে ঐ ধনী লোকটা সদলে সেই বিধবার বাটীতে প্রবেশ করিয়া তাহাকে প্রহার করিতে যাইতেছে। তিনি তৎক্ষণাৎ কলম রাখিয়া স্বীয় সহোদর ভ্রাতাকে লইয়া বিধবার গৃহাভিমুখে ধাবিত হইলেন। তিনি তাহার ভবনে প্রবেশ করিয়া স্বহস্তে সেই ধনীর ঐবা ধরিয়া বাড়ী হইতে বাহির করিয়া দিলেন। তাঁহার প্রতি সংভ্রম বশতঃ তাঁহাকে কেহ কিছু বলিতে পারিল না। এইরূপে গ্রামে তিনি দুর্ব্বলের রক্ষক ও সর্বপ্রকার সদহুষ্ঠানের উৎসাহদাতা রূপে বাস করিতে লাগিলেন।

বার্দ্ধক্যে একটা বিষয়ের জন্ত তাঁহাকে বড় উদ্বিগ্ন দেখা যাইত। ইংরাজী শিক্ষার প্রভাবে হিন্দুসমাজে ধর্ম্মের শাসন ও ধর্ম্মের উপদেশ রহিত হইতেছে বলিয়া দুঃখ করিতেন। তাঁহার একটা পুত্র এই সময়ে জপ, তপ, পূজা প্রভৃতিতে কিছু অধিক মাত্রায় মাতিয়া গেল। এমন কি সেজন্ত তার জ্ঞান চর্চ্চা, সংসারের কাজ কর্ম্ম প্রভৃতিতে মনোযোগ রহিল না। কেহ সে বিষয়ের উল্লেখ করিয়া দুঃখপ্রকাশ করিলে বিজ্ঞাতৃষণ মহাশয় বলিতেন—‘ও শিশু নহে বয়ঃপ্রাপ্ত, ও বাহা আত্মার কল্যাণকর ভাবিয়াছে তাহা করুক, দেশকাল যেরূপ দেখিতেছি তাহাতে ও যে অন্তদিকে মতি না দিয়া ধর্ম্মসাধনে মাতিয়া আছে তাহা ভাল।’ সাধারণ মানুষের ধর্ম্মোপদেশের সুবিধার জন্ত তিনি নিজভবনে হরিসভা করিতে দিয়া কথকতা, পাঠ, শাস্ত্রবাখ্যা প্রভৃতির ব্যবস্থা করিয়াছিলেন।

শেষ দশায় শারীরিক অস্বাস্থ্যনিবন্ধন তিনি সোমপ্রকাশ সম্পাদনে ততটা সময় দিতে পারিতেন না। এই সময়ে কিছুদিন স্বাস্থ্যলাভের উদ্দেশ্যে কাশীতে গিয়া বাস করেন। তীর্থস্থানের হ্রবস্থা পূর্বে কখনও দেখেন নাই।


কাশীতে গিয়া কাশীবাসী অনেকের বিশেষতঃ পাণ্ডাগণের মধ্যে ধর্ম ও নীতির ছরবহা দেখিয়া তাঁহার প্রাণে বড় আঘাত লাগে। তিনি হৃদয়ের সেই ভাব ব্যক্ত করিয়া “বিশ্বেশ্বর-বিলাপ” নামে একখানি কাব্যপুস্তক রচনা করেন। তৎপরে দেশে ফিরিয়া আর পূর্বের ত্রায় সোমপ্রকাশের কার্য্য করিতে পারিতেন না।

ইহার উপরে ভানেকিউলার প্রেস আক্ট (Vernacular Press Act) নামক আইন বিধিবদ্ধ হইলে, অমৃত বাজার পত্রিকা যখন ইংরাজী কাগজে পরিণত হইল, তখন তিনি কিছুদিনের জন্ত সোমপ্রকাশ তুলিয়া দিলেন, তথাপি নবপ্রণীত অপমানকর আইনের অধীন হইতে পারিলেন না। এই সময়ে বঙ্গের লেফটন্যান্ট গবর্নর সার রিচার্ড টেম্পল তাঁহাকে নিজ ভবনে ডাকাইয়া, সোমপ্রকাশ তুলিয়া না দিবার জন্ত অনেক অনুরোধ করিয়াছিলেন। পরে ঐ গহিত আইন উঠিয়া গেলে সোমপ্রকাশ আবার বাহির হইল বটে কিন্তু পূর্বপ্রভাব আর রহিল না। তাহাও ক্রমে হস্তান্তরে গেল। ইহার পরে তিনি “কল্লভ্রম” নামে এক মাসিক পত্রিকা কিছুদিন বাহির করিয়াছিলেন; তাহাও তাঁহার অসুস্থতা বশতঃ অধিক কাল রহিল না। চরমে তিনি পীড়িত হইয়া রেওরা রাজ্যের অন্তর্গত সাতনা নামক স্থানে গিয়া বাস করেন। সেখানে গুরুতর পৃষ্ঠব্রণ রোগে ১৮৮৬ সালের ২২শে আগষ্ট দিবসে গতানু হন।

লাহিড়ী মহাশয় কিছুদিন বাড়ীতে বসিয়া বিজ্ঞানভূষণ মহাশয়ের পিতা হরচন্দ্র জায়রাম মহাশয়ের নিকট পড়িয়াছিলেন। তাহা অল্পদিনের জন্ত; কিন্তু লাহিড়ী মহাশয়ের প্রকৃতিতে গুরুভক্তি ও সাধুভক্তি এমনি প্রবল ছিল যে সেই অল্পদিনের সঙ্গত্ব তিনি কখনও ভুলিতে পারেন নাই। চিরদিন জায়রাম মহাশয়ের নাম স্মৃতিতে ধারণ করিয়া আসিয়াছেন। জায়রাম মহাশয়ের অসম্পূর্ণ লোকদিগের প্রতি, বিশেষতঃ বিজ্ঞানভূষণ মহাশয়ের প্রতি, শ্রদ্ধা প্রচুর পরিমাণে ছিল। সেই কারণেই বোধ হয় আমাদের দেখিবামাত্র জায়রাম মহাশয়ের দৌহিত্র বলিয়া প্রেমালিঙ্গনের মধ্যে লইয়াছিলেন।

ডাক্তার মহেন্দ্রলাল সরকার ।

বঙ্গদেশকে যত লোক লোকচক্ষে উঁচু করিয়া তুলিয়াছেন এবং শিক্ষিত বাঙ্গালিগণের মনে মহাশয়ের আকাঙ্ক্ষা উদ্দীপ্ত করিয়াছেন, তাঁহাদের মধ্যে



স্বর্গীয় ডাক্তার মহেন্দ্রলাল সরকার, সি, আই, ই,

(২৯০ পৃষ্ঠা)

ডাক্তার মহেন্দ্রলাল সরকার একজন অগ্রগণ্য ব্যক্তি । একরূপ বিমল সত্যানুরাগ অতি অল্প লোকের মনে দেখিতে পাওয়া যায় ; একরূপ সাহস ও দৃঢ়চিত্ততা অতি অল্প বাঙ্গালীই দেখাইতে পারিয়াছেন ; একরূপ জ্ঞানানুরাগ এই বঙ্গদেশে ছলভ । তাঁহার সংশ্রবে আসিয়া এ জীবনে বিশেষ উপরূত হইয়াছি । তাঁহার নাম নব্য-বঙ্গের শিক্ষাগুরুদিগের মধ্যে গণনীয় ; সুতরাং আনন্দের সহিত তাঁহার জীবনের সংক্ষিপ্ত বিবরণ এই গ্রন্থে সন্নিবিষ্ট করিতেছি ।

কলিকাতার অদূরবর্তী হাবড়া বিভাগের পাইকপাড়া নামক গ্রামে, ১৮৩৩ সালের ২রা নবেম্বর দিবসে মহেন্দ্রলাল জন্মগ্রহণ করেন । পাঁচ বৎসর বয়সের সময় ইঁহার জননী ছয় মাস বয়স্ক আর একটা পুত্র কোলে ইঁহাকে লইয়া কলিকাতা নেবুতলাতে ইঁহার মাতামহালায়ে আগমন করেন । ইঁহার অল্পকাল পরেই ৩২ বৎসর বয়সে পাইকপাড়া গ্রামে ইঁহার পিতার মৃত্যু হয় । তখন ইঁহার মাতুলদ্বয়, ঈশ্বরচন্দ্র ঘোষ ও মহেশচন্দ্র ঘোষের উপরে ইঁহার রক্ষা ও প্রতিপালনের ভার পড়ে । এই পারিবারিক চর্যটনার চারি বৎসর পরেই তাঁহার জননীর মৃত্যু হয় । তখন পিতৃমাতৃহীন হইয়া তিনি উক্ত মাতুলদ্বয়ের নৈহ বস্ত্রে প্রতিপালিত হইতে থাকেন ।

তাঁহার মাতুলেরা প্রথমে বাঙ্গালা শিখিবার জন্ত তাঁহাকে গুরুমহাশয়ের পাঠশালাে ভর্তি করিয়া দেন ; এবং কিছুদিন পরে ইংরাজী শিখাইবার জন্ত ঠাকুর দাস দে নামক একজন ভদ্রলোককে নিযুক্ত করেন । উত্তর কালে এই ঠাকুর দাস দে বতদিন জীবিত ছিলেন ডাক্তার সরকার তাঁহাকে গুরুর স্থায় ভক্তি শ্রদ্ধা করিয়া আসিয়াছেন ; এবং নিজ কার্যের সহায়রূপে রাখিয়াছেন ।

সরকার মহাশয়ের মাতুলদিগের অবস্থা ভাল ছিল না । ইঁহার জ্যেষ্ঠ মাতুল ট্রাভলিং শ্টিণ্টারের কাজ করিতেন ; তাঁহার কনিষ্ঠ মাতুলের অবস্থাও যে খুব ভাল ছিল একরূপ মনে হয় না ।

ঠাকুর দাস দে মহাশয়ের নিকট সামান্যরূপ ইংরাজী শিক্ষা করার পর, তাঁহার কনিষ্ঠ মাতুল তাঁহাকে ফ্রী বালকরূপে হেয়ারের স্কুলে ভর্তি করিয়া দিলেন । মহামতি হেয়ার তখনও জীবিত ছিলেন । তাহার দেড় বৎসর পরে ১৮৪২ সালে ইহলোক পরিত্যাগ করেন । মহেন্দ্রলাল ১৮৪৯ পর্য্যন্ত হেয়ারের স্কুলে ছিলেন । ঐ সালে তিনি জুনিয়ার স্কলারশিপ পরীক্ষাতে উত্তীর্ণ হইয়া হিন্দু কালেজে গমন করেন । হিন্দু কালেজে তিনি ১৮৫৪ সাল পর্য্যন্ত পাঠ করেন । ইতিমধ্যে তাঁহার জ্ঞানপিপাসা অতিমাত্র বর্দ্ধিত হইল, তিনি নানা

জ্ঞানের বিষয়ে দৃষ্টিনিষ্কেপ করিতে আরম্ভ করেন । কালেজের পাঠ্য বিষয় ও গ্রন্থ সকলে তাঁর পরিতৃপ্তি হইত না । বিজ্ঞান পাঠের জন্ত তাঁহার মন ব্যগ্র হইত । তখন হিন্দু কালেজে বিজ্ঞান পাঠনার রীতি ছিল না ; তদনুরূপ আয়োজনও ছিল না । অবশেষে তিনি কলিকাতা মেডিকেল কালেজে ভর্তি হইবার সংকল্প করিলেন ; এবং তাঁহার হিন্দু কালেজের অধ্যাপকদিগের অমতে উক্ত কালেজে প্রবিষ্ট হইলেন ।

১৮৫৫ সালের বৈশাখ মাসে তিনি পরিণীত হইলেন ; এবং ১৮৬০ সালে তাঁহার একমাত্র পুত্র অমৃতলাল সরকার জন্মগ্রহণ করিলেন ।

ডাক্তার সরকার মেডিকেল কালেজে ছয় বৎসর পাঠ করিয়া ১৮৫৯ । ৬০ সালে এল, এম, এন্স পরীক্ষায় উত্তীর্ণ হইয়া চিকিৎসকরূপে বাহির হন । মেডিকেল কালেজে অধ্যয়নকালে, তিনি তাঁহার অধ্যাপক ও সহাধ্যায়িগণের দৃষ্টিকে আকর্ষণ করিয়াছিলেন ; এবং সে সময়ে পরীক্ষোত্তীর্ণ ছাত্রগণের জন্ত যতগুলি পারিতোষিক ছিল প্রায় সকলগুলিই অর্জন করিয়াছিলেন ; সুতরাং তিনি কালেজ হইতে বাহির হইলেই খ্যাতি প্রতিপত্তি তাঁহার সঙ্গে সঙ্গেই আসিল ; এবং তাঁহার বহুদর্শিতা ও প্রতিভার গুণে তিনি অচিরকালের মধ্যে সহরের একজন খ্যাতনামা চিকিৎসক হইয়া উঠিলেন ।

১৮৬৩ সালে তিনি কালেজের সর্বোচ্চ এম, ডি পরীক্ষাতে উত্তীর্ণ হইলেন । তখন তাঁহার মান সম্রম চারিদিকে ব্যাপ্ত হইয়া পড়িল । তৎপূর্বে ডাক্তার চন্দ্রকুমার দে মাত্র উক্ত উপাধি পাইয়াছিলেন । সুতরাং দ্বিতীয় এম, ডি বলিয়া তাঁহার নাম সকলের মুখে উঠিয়া গেল ।

এই ১৮৬৩ সালে ডাক্তার স্বর্য়াকুমার চক্রবর্তীর উদ্যোগে সহরে একটা নূতন সভা স্থাপিত হয় । তাহা ইংলণ্ডের ব্রিটিশ মেডিকেল এসোসিয়েশন নামক সভার বঙ্গীয় শাখা । কলিকাতার বড় বড় ইংরাজ ও দেশীয় চিকিৎসকগণ মিলিয়া এই সভার প্রতিষ্ঠা করেন । প্রতিষ্ঠার দিনে ডাক্তার সরকার একটা বক্তৃতা করেন, তাহাতে তাঁহার বাগ্মিতা ও চিন্তাশীলতা দেখিয়া সকলে মুগ্ধ হন । তিনি সভার প্রধান উদ্যোগী ও তন্নিযুক্ত সেক্রেটারীদিগের মধ্যে একজন ছিলেন । তিন বৎসর পরে তিনি উক্ত সভার একজন সহকারী সভাপতিরূপে বৃত হন ।

যে কারণে ঐ সভার প্রতিষ্ঠাকার্যের উল্লেখ করিতেছি তাহা এই ;—ঐ দিনের বক্তৃতাতে ডাক্তার সরকার অপরাপর কথার মধ্যে হোমিওপেথিক

চিকিৎসা প্রণালীর দোষ কীর্তন করেন। সেই বাক্যগুলি সুপ্রসিদ্ধ হোমিওপ্যাথ' রাজেন্দ্র দত্ত মহাশয়ের চক্ষে পড়ে। ডাক্তার সরকারের সহিত তাঁহার পূর্বেরই পরিচয় ছিল। তৎপরে উভয়ে সাক্ষাৎ হইবামাত্রই রাজাবাবু ঐ উক্তিগুলি অবলম্বন করিয়া ডাক্তার সরকারের সহিত বিচার উপস্থিত করেন। এই বিচার বহুদিন চলিতে থাকে। ক্রমে আর এক ঘটনা আসিয়া উপস্থিত হয়। একজন বন্ধু (Morgan) মর্গান নামক একজন প্রসিদ্ধ চিকিৎসকের লিখিত Philosophy of Homeopathy নামক একখানি পুস্তকের সমালোচনা করিবার জন্ত ডাক্তার সরকারকে অমুরোধ করেন। ঐ সমালোচনা 'Indian Field' নামক কিশোরীচাঁদ মিত্রের সম্পাদিত পত্রিকাতে বাহির করিবার কথা থাকে। কিন্তু পুস্তকখানি মনোযোগ পূর্বক পাঠ করিতে গিয়া ডাক্তার সরকার তদ্ব্যবহাে এমন কিছু কিছু কথা পাইলেন, যে বিষয়ে অভিজ্ঞতা বিনা মত প্রকাশ করা কঠিন বোধ হইতে লাগিল। তাঁহার মনে হইল যে কার্য্যতঃ হোমিওপ্যাথিক চিকিৎসার ফলাফল কিছুদিন না দেখিয়া মত প্রকাশ করা তাঁহার পক্ষে কর্তব্য নহে। সুতরাং তিনি হোমিওপ্যাথি চিকিৎসার ফলাফল দেখিবার জন্ত রাজাবাবুর শরণাপন্ন হইলেন। রাজাবাবু আনন্দের সহিত তাঁহাকে সঙ্গে করিয়া কতকগুলি কঠিন রোগের চিকিৎসা দেখাইতে লইয়া গেলেন। ডাক্তার সরকার সেই সকল রোগীর অবস্থা ও চিকিৎসা বিধিমেতে পরীক্ষা করিয়া দেখিতে লাগিলেন এবং ভুল ভ্রান্তি যাহাতে না হয় একরূপ উপায় সকল অবলম্বন করিলেন। এই রোগীগুলির চিকিৎসা কার্য্য দেখিতে দেখিতে ডাক্তার সরকারের মত পরিবর্তিত হইয়া গেল। হানিমানের অবলম্বিত প্রণালী যে যুক্তি-সঙ্গত তাহা প্রতীতি হইল। এই পরিবর্তন ঘটিতে ঘটিতে তাঁহার ১৮৬৬ সালে উপনীত হইলেন।

অন্য লোক হইলে মনের বিশ্বাস মনে রাখিয়া আপনার অর্থোপার্জন ও স্বর্থ সচ্ছন্দের উপায় দেখিতেন, কিন্তু মহেন্দ্রলাল সরকার সে ধাতুর লোক ছিলেন না। যাহা সত্য বলিয়া একবার প্রতীতি হইত তাহা তিনি হৃদয় মনের সহিত অবলম্বন করিতেন; তাহা প্রকাশ বা প্রচার করিতে কুণ্ঠিত হইতেন না; অথবা সত্যাবলম্বন বিষয়ে ক্ষতি লাভ, বা লোকের অহুবাগ বিরাগের ভয় করিতেন না। তাঁহার সেই প্রকৃতি অনুসারে, যখন তাঁহার মত পরিবর্তন হইল তখন তিনি তাহা তাঁহার চিকিৎসকবন্ধুগণের নিকট ব্যক্ত করিবার জন্ত বাগ্ণ হইলেন।

১৮৬৭ সালের ১৬ই ফেব্রুয়ারি দিবসে ব্রিটিশ মেডিকেল এসোসিয়েশনের বঙ্গদেশীয় শাখার চতুর্থ সাধারণিক অধিবেশন হইল। সেই দিন ডাক্তার সরকার “চিকিৎসা-প্রণালীর অনির্দিষ্টতা” বিষয়ে একটা বক্তৃতা পাঠ করিলেন। তাহাতে ভূমোদর্শন, চিন্তাশীলতা, সত্য-প্রিয়তা, নির্ভীক-চিন্তিতা সমুদয় একাধারে উজ্জলরূপে প্রকাশ পাইয়াছিল। তাহাতে তিনি এলোপেথিক চিকিৎসা-প্রণালীর সর্বজন-বিনিন্দিত কতকগুলি দোষ কীর্তন করিয়া হানিমানের আবিষ্কৃত প্রণালীর যুক্তিযুক্ততা প্রদর্শন করিতে অগ্রসর হইলেন। ইহার ফল যাহা দাঁড়াইল তাহা বোধ হয় তিনি অগ্রে সম্ভব বলিয়া বিবেচনা করেন নাই।

তাহার বক্তৃতা শেষ হইলে, ইংরাজ ডাক্তারগণ মহা আপত্তি উত্থাপন করিলেন। ডাক্তার ওয়ালার নামে একজন ইংরাজ ডাক্তার চটিয়া লাল হইয়া গেলেন ; ডাক্তার সরকার কাহারও কাহারও আপত্তির উত্তর দিতে প্রবৃত্ত হইলে তিনি থানাইয়া দিবার চেষ্টা করিলেন ; বলিলেন “ডাক্তার সরকার ! ডাক্তার সরকার ! আর একটা কথা যদি বল, তবে তোমাকে এখান হ’তে বাহির করে দেব।” পরে তিনি এই মত প্রকাশ করিলেন, যে ডাক্তার সরকার উক্ত সভার সহকারী সভাপতি থাকা দূরে থাক্, সভ্য থাকিলে তিনি তাহার সভ্য থাকিবেন না। ডাক্তার ইওয়ার্ট, ডাক্তার চক্রবর্তী প্রভৃতি ঐরূপ মতে সায় দিলেন। সভ্যমধ্যে আশ্বেষগিরির অধুনাৎপাতের ভায়া সভ্যগণের ক্রোধ-বহিঃ প্রজ্জ্বলিত হইল।

ডাক্তার সরকার স্তব্ধ প্রতিজ্ঞা হৃদয়ে লইয়া ধীর গম্ভীর ভাবে গৃহে প্রতিনিবৃত্ত হইলেন। বাড়ীতে আসিয়া বলিলেন ‘আমি চাষার ছেলে, না হয় সামান্য কাজ করে খাব তাতে আর কি ? সত্য যা তা বলতেই হবে ও করতেই হবে’। ওদিকে সংবাদ পত্রের স্তম্ভ সকল এই বার্তাতে পূর্ণ হইতে লাগিল। মেডিকেল মিশনারি ডাক্তার রবসন তাহার বিরুদ্ধে এক বক্তৃতা করিলেন ; ডাক্তার ইওয়ার্ট সংবাদ পত্রে অস্ত্র ধারণ করিলেন ; এবং চিকিৎসকগণ এক বাক্যে তাহাকে বর্জন করিলেন। সহর তোলপাড় হইয়া যাইতে লাগিল। ডাক্তার সরকারের পসার কিছু দিনের জন্ত মাটি হইয়া গেল। ছয় মাসের মধ্যে তিনি একটাও রোগী পাইলেন না। কিন্তু তিনি নির্ভীক চিন্তে দণ্ডায়মান রহিলেন। যাহা সত্য বলিয়া বুঝিয়াছিলেন তাহা ঘোষণা করিতে বিরত হইলেন না। পর বৎসরেই তাহার Calcutta Journal of Medicine বাহির হইল। লোকে দেখিতে পাইল মাহুষটা দমে নাই ; যাহাকে সত্য বলিয়া বুঝিয়াছে তাহাতে প্রাণ সমর্পণ করিয়াছে। এই ঘোর পরীক্ষার মধ্যে

তিনি কি ভাবে স্থির ছিলেন, তাহা তিনি নিজের এক স্থানে বাক্য করিয়াছেন ;
—“I was sustained by my faith in the ultimate triumph of truth—অর্থাৎ সত্য যাহা তাহা চরমে জয়যুক্ত হইবেই এই বিশ্বাসেই আমি সবল ছিলাম ।” তাঁহার ভূতপূর্ব প্রোফেসরদিগের অনেকে তাঁহার প্রতি ঋণগ্রস্ত হইয়াছিলেন এবং তাঁহাকে অবাচ্য কুবাচ্য বলিয়াছিলেন ; কিন্তু তিনি কি ভাবে সে সমুদয় কটুক্তি গ্রহণ করিয়াছিলেন, তাহা ঐ ১৮৬৭ সালে মার্চ মাসে মুদ্রিত তাঁহার ঐ বক্তৃতার ভূমিকা হইতে উদ্ধৃত করিতেছি । তিনি এক স্থানে বলিতেছেন ;—

Whatever may now have become the differences between my venerable Preceptors of the Medical College and myself, I shall always look back with ecstasy and gratitude on those days when I used to be charmed by their eloquence, pregnant with the words of Science.

আবার ঐ ভূমিকার উপসংহারে তিনি লিখিতেছেন :—

Persecution has already commenced. Professional combination is strong against me, and is likely to be stronger ; every one's arm seems to be raised against me ; but I cannot deprive myself of the satisfaction that mine has been, and shall be raised against none. It is probable “my bread will be affected,” but I shall never forget the words of Jesus, who certainly speaks as man never spake, that as beings, instinct with Reason, and made in the image of our Creator, “we must not live by bread alone, but by every word that proceedeth out of the mouth of God.”

সকলে অসুভব করুন যখন তাঁহার বিরোধিগণ কোলাহল করিতেছিলেন এবং তাঁহার প্রতি নানা প্রকার কটুক্তি বর্ষণ করিতেছিলেন, তখন এই মহামনা ব্যক্তি কোন জগতে বাস করিতেছিলেন । ইহারই কিঞ্চিৎ পরে অর্থাৎ ১৮৬৯ সালের প্রারম্ভে আমি তাঁহার অন্তিম সাধুতার এক পরিচয় পাই, তাহা চিরস্মরণীয় হইয়া থাকি। উচিত বলিয়া লিখিয়া রাখিতেছি ।

আমি তখন একুশ বাইশ বছরের ছেলে, সবে এল এ পরীক্ষা দিয়া উঠিয়াছি । সে সময়ে আমি ভবানীপুরে আমার আশ্রয়দাতা ও প্রতিপালক

হাইকোর্টের প্রসিদ্ধ উকীল স্বর্গীয় মহেশচন্দ্র চৌধুরী মহাশয়ের ভবনে বাস করিতেছিলেন। আমি দরিদ্র ব্রাহ্মণের সন্তান, আমার সহরে থাকিবার স্থান ছিল না। আমার পিতার সহিত বদ্ধতা হুজ্রে চৌধুরী মহাশয় আমাকে আনিয়া, দয়া করিয়া নিজ ভবনে স্থান দিয়াছিলেন। কেবল স্থান দিয়া ছিলেন তাহা নহে, ভ্রাতৃ-নির্বিশেষে পালন করিয়াছিলেন। ডাক্তার সরকার সেই ভবনের স্থায়ী-চিকিৎসক ছিলেন। এল, এ পরীক্ষা কালে গুরুতর শ্রম করিতে আমার একপ্রকার পীড়া জন্মে। বাসার লোকেরা আমাকে বলপূর্ব্বক ধরিয়া ডাক্তার সরকারের নিকট উপস্থিত করেন। বলেন আমাদের বাসাতে এই একটা বামনের ছেলে আছে, এল এ পরীক্ষার জন্য গুরুতর শ্রম করে এর কি অস্থখ হয়েছে দেখুন, আপনাকে দয়া করে এর চিকিৎসার ভার নিতে হবে।” ডাক্তার সরকার দয়া করিয়া আমার চিকিৎসার ভার লইলেন। বলিলেন ;—“তোমার পীড়ার আনুপূর্ব্বিক বিবরণ লিখে আমার কাছে পাঠিও।” কিন্তু সে দিন আর এক ঘটনা ঘটিল যাহাতে আমার মনটা ধারণ হইল। মহেশচন্দ্র চৌধুরী মহাশয়ের কনিষ্ঠ ভ্রাতা গিরিশচন্দ্র চৌধুরী একজন সাধুপুরুষ ছিলেন। আমরা যুবকদল তাঁহাকে গুরুত্ব্য ভক্তিভ্রদ্ধা করিতাম। কিন্তু তাঁহার একটা স্বভাব এই ছিল যে তিনি সকল বিষয়ে অতিরিক্ত মাত্রায় অহুসন্ধিৎসু হইতেন। সে দিন ডাক্তার সরকার যখন ব্যবস্থা পত্র লিখিতেছেন, তখন তিনি পার্শ্ব দাঁড়াইয়া জিজ্ঞাসা করিলেন “মশাই কি ঔষধ দিলেন?” ডাক্তার সরকার বিরক্ত হইয়া তাঁহার মুখের দিকে চাহিয়া জিজ্ঞাসা করিলেন, “আপনি কি মেডিকেল কলেজে পড়েছেন?”

গিরিশ বাবু—না।

ডাক্তার সরকার—তবে এমন আহাদ্যুকি করেন কেন? আমি কি ঔষধ দিচ্ছি তাতে আপনার দরকার কি?

এই কথাগুলি এমন রুদ্ধভাবে বলিলেন যে আমাদের সকলের প্রাণে বড় আঘাত করিল। তারপর আমার রোগের আনুপূর্ব্বিক বিবরণটা ইংরাজীতে লিখিয়া পাঠাইবার সময় তৎসঙ্গে বাঙ্গালাতে এক পত্র লিখিয়া পাঠাইলাম। তাহা তাঁহার গিরিশবাবুর প্রতি পূর্ব্বোক্ত কর্কশ ব্যবহারের জন্য তিরস্কারে পূর্ণ ছিল। পাঠাইবার সময় মনে হইল না যে নিজে ত গরীব ব্রাহ্মণের সন্তান, যাহার অহুগ্রহ প্রার্থী হইতে বাইতেছি, তাহাকেই তিরস্কার, এ কিরূপ ব্যবহার। চিঠিখানি পাঠাইয়াই চিন্তা হইল

বুঝি বা চৌধুরী মহাশয়দিগের আশ্রয় হইতে বঞ্চিত হইতে হইল। ভয়ে ভয়ে শাস করিতে লাগিলাম। তৎপরিদায়ক বৈকালে ডাক্তার সরকারের আসিবার কথা ছিল না। তথাপি তিনি আসিলেন। আসিয়াই নীচের ঘরে জিজ্ঞাসা করিলেন “শিবনাথ ভট্টাচার্য্য তোমাদের বাড়ীতে কে?” তাঁহার হাসিয়া বলিলেন “সেই বে মশাই পাগল। ছেলেটা।” শুনিলাম ডাক্তার সরকার গম্ভীর ভাবে বলিলেন—“ঈশ্বর করুন এমনি পাগল। ছেলে দেশে বেশী হয়। আমি তার সঙ্গে দেখা করতে চাই।”

আমি উপরে বসিয়া পড়িতেছিলাম, লোকে আসিয়া আমাকে টানিয়া লইয়া গেল; “ওরে আয় আয় ডাক্তার সরকার তোকে ডাকছেন।” আমি কাঁপিতে কাঁপিতে গিয়া উপস্থিত। আমি ঘরে প্রবেশ করিবামাত্র ডাক্তার সরকার টেবিলের অপর পার্শ্বে উঠিয়া দাঁড়াইলেন এবং হস্ত প্রসারিত করিয়া আমার হাত ধরিলেন। বলিলেন—“তোমার ইংরাজী স্টেটমেন্ট দেখে খুসি হয়েছি; আর তোমার বাঙ্গালা পত্রের জ্ঞান আমার আন্তরিক ধন্যবাদ গ্রহণ কর।” আমি ত অবাক, তারপর তিনি আমাকে তাঁর গাড়িতে তুলিয়া তাঁর বাড়ী পর্য্যন্ত আনিলেন। গিরিশবাবুর ওরূপ প্রশ্ন করা কেন উচিত হয় নাই, এবং এ শ্রেণীর লোকের কিছু শিক্ষার প্রয়োজন, এই সকল আমাকে বুঝাইয়া বলিলেন। তখন আমি কোথায় আর তিনি কোথায়! আমি কলেজের একটা গরীবের ছেলে, তিনি সহরের একজন লক্ষপ্ৰতিষ্ঠ চিকিৎসক। আমার তিরস্কারটা এই ভাবে গ্রহণ করাতে কি সাধুতারই পরিচয় পাইলাম। সেই তাঁহার সহিত আমার আত্মীয়তা জন্মিয়া গেল। তদবধি আমার বা আমার পরিবারস্থ কাহারও পীড়ার সংবাদ দিবামাত্র বুক দিয়া আসিয়া পড়িয়াছেন; এবং বিনাভিজিটে দিনের পর দিন আসিয়া চিকিৎসা করিয়াছেন। সে উপকারের স্বর্ণ আমার অপরিশোধনীয় রহিয়াছে।

এরূপ মানুষকে কে শ্রদ্ধাভক্তি না করিয়া থাকিতে পারে? অচিরকালের মধ্যে তাঁহার পসার আবার ফিরিয়া আসিল। তাঁহার অভ্যুত্থানের সঙ্গে সঙ্গে হোমিওপেথিও লোকচক্ষে উঠিয়া পড়িল।

১৮৭০ সালে তিনি কলিকাতা বিশ্ববিদ্যালয়ের ফেলো নিযুক্ত হইলেন। প্রথমে তাঁহাকে আর্ট-ফ্যাকল্টীর প্রতিনিধি করিয়া সিণ্ডিকেটে লওয়া হয়। তৎপরে ১৮৭৮ সালে সেনেটের সভ্যগণ তাঁহাকে ফ্যাকল্টী অব মেডিসিনের প্রতিনিধিরূপে সিণ্ডিকেটে প্রেরণ করিবার প্রস্তাব করেন। ইহাতে ফ্যাকল্টী

অব মেডিসিনের সভ্যগণের মধ্যে আপত্তি উপস্থিত হয়। উক্ত ফ্যাকল্টির ডাক্তারগণ তাঁহাকে গ্রহণ করিতে অস্বীকৃত হন। আবার সেই পুরাতন প্রশ্ন, সেই পুরাতন বিবাদ। ডাক্তার সরকারকে স্বীয় পক্ষ সমর্থন করিয়া ছইখানি পত্র লিখিতে হয়; তাহাতে সেনেটের সভ্যগণের মনের সকল সন্দেহ ভঞ্জন হয়; এবং তাহারা তাঁহাকে ফ্যাকল্টি অব মেডিসিনে বাহাল রাখেন।

১৮৭৬ সালে তাঁহার প্রধান উদ্যোগে ও তাঁহারি চেষ্টায় 'সাএন্স এসোসিয়েশন' প্রতিষ্ঠিত হয়; এবং অত্য়পি বর্তমান আছে।

১৮৭৭ সালে তিনি কলিকাতার অগ্রতম অনারারি মাজিষ্ট্রেটরূপে বৃত্ত হন; এবং তাঁহার মৃত্যুর পূর্ববৎসর পর্য্যন্ত ঐ কার্য্য দক্ষতার সহিত করিয়া আসেন।

১৮৮৩ সালে গবর্ণমেন্ট তাঁহার মান সম্মানের চিহ্নরূপে তাঁহাকে সি, আই, ই, উপাধি প্রদান করেন।

১৮৮৭ সালে তিনি ছোটলাটের ব্যবস্থাপক সভার সভ্যরূপে মনোনীত হন। ১৮৯৩ সালে চতুর্থ বার মনোনীত হওয়ার পর তিনি ঐ পদ নিজে পরিত্যাগ করেন।

১৮৮৭ সালে তিনি কলিকাতার শেরিফের পদে বৃত্ত হন।

১৮৯৩ হইতে ১৮৯৫ পর্য্যন্ত চারি বৎসরের জন্ত ফ্যাকল্টি অব আর্টের সভাপতির কার্য্য করেন।

বহুবৎসর এসিয়াটিক সোসাইটির সভাপদে অতিবিক্ত ছিলেন।

১৮৯৮ সালে কলিকাতা বিশ্ববিদ্যালয় তাঁহাকে অনারারি ডি, এল্ উপাধি প্রদান করেন।

এতদ্ভিন্ন তিনি স্বদেশ-বিদেশের অনেক বিজ্ঞান-সভার সভাপদে মনোনীত হইয়াছিলেন।

সায়েন্স এসোসিয়েশন স্থাপন ব্যতীত তিনি আর একটা সদগুষ্ঠানের সূত্রপাত করিয়াছিলেন। একবার স্বাস্থ্যলাভের উদ্দেশ্যে তিনি বৈজ্ঞানাথে বাস করিতে-ছিলেন। তখন তথাকার কুষ্ঠরোগীদিগের হৃদশা দেখিয়া তাঁহার পর-হঃখ-কাতর হৃদয় বড় ব্যথিত হয়। তিনি নিজে ৫০০০ হাজার টাকা ব্যয় করিয়া কুষ্ঠীদিগের জন্ত একটা আশ্রয়-বাটিকা নিৰ্ম্মাণ করেন; এবং তাঁহার পত্নী 'রাজকুমারীর' নামে তাহা উৎসর্গ করেন। ১৮৯২ সালে সার চালস ইলিয়ট তাঁহার ভিত্তি স্থাপন করেন।

অবিশ্রান্ত কার্যে ব্যস্ততার মধ্যে ডাক্তার সরকারের স্বাস্থ্য ভাল থাকিত না ; মধ্যে মধ্যে হাঁপকাশী প্রভৃতি রোগে ভগ্ন হইয়া পড়িতেন। তত্পরি চিকিৎসা-স্থলে কোনও কোনও স্থানে যাওয়াতে মালেরিয়া জরে ধরিয়াছিল। তাহাতে শেষ দশায় তিনি অতিশয় দুর্বল হইয়া পড়িয়াছিলেন। অবশেষে ১৯০৩ সালের শেষভাগ হইতে এক কঠিন রোগে ধরিল। মৃত্যুধারে একপ্রকার পীড়ার সঞ্চার হইয়া বড়ই ক্লেশ দিতে লাগিল। ঐ রোগে ১৯০৪ সালের ২৩এ ফেব্রুয়ারি দিবসের প্রাতঃকালে প্রাণবায়ু তাঁহার শ্রান্ত ক্লান্ত দেহকে পরিত্যাগ করিয়া গেল। বঙ্গের একটা উজ্জ্বল তারা চিরদিনের জগৎ অস্ত গেল।

আমরা তাঁহাতে যে কেবল সাহস ও সত্যপ্রিয়তাই দেখিয়াছিলাম তাহা নহে। এরূপ জ্ঞানানুরাগী মানুষ আমরা অল্পই দেখিয়াছি। চিকিৎসাবিজ্ঞা ও বিজ্ঞান তাঁহার নিজের স্বোপার্জিত বিশেষ বিজ্ঞা ছিল ; কিন্তু তাহাতে তিনি তৃপ্ত হন নাই ; তাঁহার জ্ঞানানুরাগ সর্বতোমুখীন ছিল। সর্বপ্রকার জ্ঞাতব্য বিষয়ে তাঁহার চিত্তের অভিনিবেশ দৃষ্ট হইত। সদগ্রন্থ সকল ক্রয় করা ও রক্ষা করা, তাঁর একটা বাতকের মত হইয়া দাঁড়াইয়াছিল। আমরা তাঁহার লাইব্রেরি দেখিবার জগৎ মধ্যে মধ্যে তাঁহার ভবনে যাইতাম। তিনি তাঁহার জ্ঞানসম্পত্তি দেখাইতে আনন্দলাভ করিতেন। তাঁহার ভবনে জ্ঞানানুরাগী বন্ধুগণের একটা আড্ডা ছিল। সেখানে বসিলেই অনেক জ্ঞানের কথা শোনা যাইত। অহুমান করি তিনি যে লাইব্রেরি রাখিয়া গিয়াছেন তাহার মূল্য লক্ষ টাকার অধিক হইবে। ধনী ব্যক্তির বিস্ময় সম্পত্তি রাখিয়া যায়, এই স্বাবলম্বনশীল, আত্মোন্নতিপরায়ণ দরিদ্রের সন্তান স্বোপার্জিত ধনের চিত্র স্বরূপ লক্ষ টাকারও অধিক মূল্যের জ্ঞানসম্পত্তি রাখিয়া গিয়াছেন।

বহুদিন সাধুযুগে শুনিয়া আসিতেছি, বাঁহাদের হৃদয় পবিত্র তাঁহাদের হৃদয়ে ঈশ্বর আবির্ভূত থাকেন। মহেন্দ্রলাল জীবনের সকল পথে, সকল সঙ্কটে, সকল সংগ্রামের মধ্যে, ঈশ্বরের সান্নিধ্য অনুভব করিতেন। যিনি মৃত্যুর কিছুদিন পূর্বে রোগযন্ত্রণার মধ্যে নিম্নলিখিত সংগীত রচনা করিতে পারিয়াছিলেন, তাঁহার স্বাভাবিক ধর্ম্মভাবের বিষয় আর কি বলিব।

পাহাড়ী—কাওয়ালি ।

সয় না রোগের যাতনা আর সয়না,
কোথায়, নাথ, তোমার অসীম করুণা ।

কৃপাদৃষ্টি থাকলে তোমার, থাকেনা ত (কোন)

যাতনা ।

দিয়ে এ বিশ্বাস, করো না নিরাশ, (একবার)

মেহ-নয়নে চাও না ।

কোপদৃষ্টি ফিরাইয়ে লও, আর বাঁচিবনা, বাঁচিবনা ।

সকলি খাদ, অধিক পোড়ালে কিছুই থাকবে না ।

জানি প্রভু, যা কর তুমি, তা সবে হয় মঙ্গল সাধনা,

তবু কাতর হয়ে আমি করিয়াছি যে প্রার্থনা ;

তাতে তব কাছে, যদি হয়ে থাকি অপরাধী

নিজগুণে দয়াময় করহে মার্জনা ।

কারে ছঃখ জানাই, প্রভু, তোমা বিনা,

তুমি ছাড়া কে আছে, বুঝিতে মনের বেদনা,

কে আছে আর শাস্তিদাতা দেখিতে পাই না ;

তাই কেঁদে ডাকি তোমায় ঘুচাতে জালা যন্ত্রণা ।

দ্বাদশ পরিচ্ছেদ ।

ব্রাহ্মসমাজের প্রভাবের হ্রাস ও হিন্দুধর্মের পুনরুত্থানের সূচনা ।

১৮৭০ হইতে ১৮৭৯ পর্য্যন্ত ।

১৮৭০ সালের শেষে কেশবচন্দ্র সেন মহাশয় ইংলণ্ড হইতে ফিরিয়া আসিলেন । আসিয়া নানাপ্রকার সদহুষ্ঠানের আয়োজন করিলেন । ‘ভারত-সংস্কার’ সভা নামে একটা সভা স্থাপন করিয়া তাহার অধীনে পাঁচ প্রকার কার্যের আয়োজন করিলেন । (১ম) সুলভ সাহিত্য, (২য়) সুরাপান নিবারণ, (৩য়) শ্রমজীবী-বিদ্যালয়, (৪র্থ) জ্ঞানীশিক্ষা, (৫ম) দাতব্য-বিতরণ । সুলভ-সাহিত্য বিভাগে ‘সুলভ সমাচার’ নামক এক পয়সা মূল্যের সাপ্তাহিক সংবাদপত্র বাহির হইল ; সুরাপান নিবারণ বিভাগে “মদ না গরল” নামে এক মাসিক পত্রিকা প্রকাশিত হইল ; শ্রমজীবী-বিদ্যালয় বিভাগে শ্রমজীবীদিগের জ্ঞান নৈশ বিদ্যালয় স্থাপিত এবং তাহার কার্যভার তাহার অন্তর্গত কার্যদক্ষ এক প্রচারকের

প্রতি অপিত হইল ; জীশিক্ষা বিভাগে বয়স্ক মহিলাদিগের জন্য এক বিদ্যালয় খোলা হইল ; তাহাতে আমাদের অনেকের স্ত্রী ভগিনী প্রভৃতি বয়স্ক মহিলাগণ পাঠ করিতে লাগিলেন ; এবং আমরা কয়েকজন তাহার শিক্ষক হইলাম ; দাতব্য বিভাগে এক মহাকাৰ্য্যের অনুষ্ঠান হইল । তখন বেহালা প্রভৃতি কলিকাতার উপনগরবর্তী স্থানে ম্যালেরিয়া জরের বড় প্রাদুর্ভাব দেখা গিয়া ছিল । কেশবচন্দ্রের দ্বারা প্রেরিত হইয়া তাঁহার একজন অহুগত প্রচারক সপ্তাহের মধ্যে কয়দিন গিয়া ম্যালেরিয়া-পীড়িত দরিদ্র লোকদিগের চিকিৎসা ও তাহাদের মধ্যে ঔষধ-বিতরণ করিতে লাগিলেন । এই প্রচারক খ্যাতনামা বিজয়কৃষ্ণ গোস্বামী । গোস্বামী মহাশয় শান্তিপুরের প্রসিদ্ধ অদ্বৈত বংশের সন্তান । যৌবনের প্রারম্ভে ব্রাহ্মসমাজের দিকে আকৃষ্ট হন ; এবং ব্রাহ্মধর্ম প্রচার কার্য্যে আপনাকে অর্পণ করেন । তিনি কলিকাতা মেডিকেল কলেজে পড়িয়া ছিলেন । তিনি প্রত্যাষে উঠিয়াই নান ও দৈন্যরোপাসনা সারিয়া কিঞ্চিৎ জলযোগ পূর্ব্বক, ঔষধ ও পথাদি লইয়া, বেহালাতে গমন করিতেন ; এবং সেখানে ১০।১১ টা পর্য্যন্ত রোগী দেখিয়া এবং ঔষধ বিতরণ করিয়া ১২টার সময় সহরে ফিরিতেন ; ফিরিয়া আহার করিয়াই বয়স্কবিদ্যালয়ে গিয়া পাঠনা কার্য্যে নিযুক্ত হইতেন । সে সময়ে তাঁহার যে পরিশ্রম দেখিয়াছি গবর্ণমেন্টের কোনও উচ্চ বেতনভোগী কর্ম্মচারীকে তত পরিশ্রম করিতে কখন দেখি নাই । সেই শ্রমে তাঁর শরীর জন্মের মত ভগ্ন হইয়া গেল । তিনি পরে এক প্রকার ব্রাহ্মসমাজ ত্যাগ করিয়াছিলেন বলিলে হয় ; কিন্তু আমাদের সঙ্গে বাসকালে যে নিঃস্বার্থ পরসেবা, যে সদহুষ্ঠানে একাগ্রমতি, যে ধর্ম্মোৎসাহ দেখাইয়া গিয়াছেন তাহা চিরদিন আমাদের আদর্শস্বরূপ স্মৃতিতে মুদ্রিত রহিয়াছে ।

পূর্ব্বোক্ত পঞ্চবিধ সদহুষ্ঠানের মধ্যে ‘স্বলভ সমাচার’ বিশেষ উল্লেখযোগ্য । স্বলভ সমাচার, এদেশে স্বলভ সংবাদপত্রের পথপ্রদর্শন করিল । এক পয়সা মূল্যের সংবাদপত্র যে বাহির হইতে পারে, এবং বাহির হইলে যে তিষ্ঠিতে পারে, তাহা কেহ অগ্রে জানিত না । “স্বলভ” যখন বাহির হইল তখন চারিদিকে আলোচনা পড়িয়া গেল । ‘স্বলভ’ একদিকে যেমন দেশের প্রচলিত সংবাদ দিতে লাগিল, অপরদিকে নীতিপূর্ণ প্রবন্ধের দ্বারা লোকচিত্তের সম্ভাব উদ্দীপন ও হান্তরসোদ্দীপক গল্পাদি দ্বারা আমোদস্বপ্ন চরিতার্থ করিতে লাগিল । দুঃখের বিষয় ‘স্বলভ’ কয়েক বৎসর পরে অন্তর্হিত হইয়া গেল ।

এই পাঁচ প্রকার সদ্ব্যুষ্ঠান ব্যতীত ভারতসংস্কার সভার অধীনে কেশবচন্দ্র সেন মহাশয় আরও কয়েক প্রকার কার্যে হস্তার্পণ করিয়াছিলেন। হরনাথ বসু নামক ব্রাহ্মসমাজের একজন উৎসাহী সভ্যের প্রতিষ্ঠিত একটি স্কুল নিজ-হাতে লইয়া তাহার এলবার্ট স্কুল নাম দিয়া চালাইতে লাগিলেন। তৎপরে কলেজ স্কোয়ারের উত্তরপার্শ্ববর্তী পুরাতন প্রেসিডেন্সি কলেজের ব্যবহৃত একটি বাড়ী ক্রয় করিয়া, তাহাতে এলবার্ট স্কুল স্থাপন করিলেন; এবং তাহার উপরের তালার বড় হলটি ট্রিগনের হস্তে দিয়া, এলবার্ট হল নাম দিয়া, সর্বসাধারণের ব্যবহারের জন্ত রাখিলেন।

এতদ্ব্যতীত এই সময়ে কেশবচন্দ্র সেন মহাশয়ের অল্পাধিক আর একটি প্রধান কার্য ভারত-আশ্রমের প্রতিষ্ঠা। ১৮৭২ খ্রীষ্টাব্দে ঐ কার্যের সূত্রপাত হয়। কেশবচন্দ্র ইংলণ্ড বাসকালে ইংরাজজাতির গার্হস্থ্যনীতি দেখিয়া অত্যন্ত মুগ্ধ হইয়াছিলেন। তিনি সর্বদা বলিতেন ইংরাজের home বা গৃহ-পরিবারের ছায়া জিনিসটা আর পৃথিবীতে নাই। বাস্তবিক ইংরাজ মধ্যবিত্ত ভদ্রগৃহস্থের গৃহের ধর্মভাব, শৃঙ্খলা, সূনিয়ম, নিতাচার, পরিচ্ছন্নতা, কার্যবিভাগ, নরনারীর স্বাধীন সম্মিলন, শিশু পালন প্রভৃতি সমুদয় অতীব প্রশংসনীয়-এবং অমূল্যের বোগ্য। তিনি মনে করিলেন একটি আশ্রম স্থাপন করিয়া কতকগুলি ব্রাহ্ম-পরিবারকে তাহাতে থাকিবার জন্ত আমন্ত্রণ করিবেন; এবং তাহাদিগকে কিছুকাল সূনিয়মে ও ধর্মসাধনে নিযুক্ত রাখিয়া পারিবারিক ধর্ম-জীবনে শিক্ষিত করিবেন। তৎপরে তাহারা সেই শিক্ষার ভাব লইয়া নানা স্থানে যাইবে; ক্রমে ব্রাহ্মপরিবার সকল ধর্মসাধন, শৃঙ্খলা ও সূনিয়ম বিষয়ে আদর্শ পরিবার হইবে। তাঁহার অভিপ্রায় অতি মহৎ ছিল। তাঁহার আহ্বানে আমরা অনেকে সপরিবারে ভারত-আশ্রমে গিয়া বাস করিয়াছিলাম। সেখানে একত্র উপাসনা, একত্র আহার, সময়ে পাঠ, সময়ে কার্য প্রভৃতির ব্যবস্থা হইয়াছিল। তদ্বারা আমরা আপনাদিগকে বিশেষ উপকৃত বোধ করি। চুঃখের বিষয় আশ্রমটা বহুদিন স্থায়ী হয় নাই; কয়েক বৎসর পরেই উঠিয়া যায়।

আর এক কারণে এই আশ্রমপ্রতিষ্ঠার কালটা বিশেষ ভাবে স্মরণীয়। এই সময়ে ব্রাহ্মসমাজে ও তদ্বারা বঙ্গসমাজে জ্ঞাতি-স্বাধীনতার আন্দোলন ও চর্চা উপস্থিত হয়। ব্রাহ্মসমাজের ভিতরে ভিতরে অনেকদিন হইতে ঐ চর্চা চলিতেছিল। ইহার কিছু পূর্বে পূর্ববঙ্গের বিক্রমপুর প্রদেশ হইতে একজন

দৃঢ়চেতা, নির্ভীক, একাগ্রচিত্ত ও নারীহিতৈষী পুরুষ কলিকাতাতে আগমন করেন। তাঁহার নাম দ্বারকানাথ গঙ্গোপাধ্যায়। তিনি আসিবার সময় তাঁহার প্রকাশিত “অবলাবান্ধব” নামক সাপ্তাহিক পত্র সঙ্গে করিয়া আসেন। “অবলাবান্ধব” ইহার কয়েক বৎসর পূর্বে ঢাকা হইতে প্রকাশিত হয়; এবং নারীগণের শিক্ষা ও উন্নতি সম্বন্ধে অত্যাগ্রসর দলের কাগজ বলিয়া পরিগণিত হয়। কলিকাতাতে আসিয়া নূতন নূতন লেখকদিগের সাহায্যে অবলাবান্ধবের শক্তি ব্রাহ্মসমাজ মধ্যে প্রবল হইয়া উঠে। ব্রাহ্ম যুবকযুবতীদিগের মধ্যে অনেকে ঐ ভাবাপন্ন হইয়া উঠেন। এই ক্ষেত্রে হাইকোর্টের ভূতপূর্ব সুপ্রসিদ্ধ উকীল জর্জমোহন দাস মহাশয় ১৮৭০ সালে হাইকোর্টে ওকালতী করিবার জন্ত বরিশাল হইতে কলিকাতায় আসিলেন। তিনি আসিয়া গাঙ্গুলী মহাশয়ের প্রধান পৃষ্ঠপোষক হইলেন। ব্রাহ্মদিগের উপাসনাস্থান যে ভারতবর্ষীয় ব্রাহ্মমন্দির তাহাতে কেন মহিলাদিগের জন্ত পর্দার বাহিরে বসিবার স্থান থাকিবে না, অগ্রসর যুবকদের মধ্যে এই আলোচনা কিছুদিন চলিল। অবশেষে তাঁহারা কেশবচন্দ্র সেন মহাশয়কে আপনাদের অভিপ্রায় জানাইলেন। বলিলেন যে তাঁহারা স্বীয় স্বীয় পরিবারের মহিলাদিগকে লইয়া পর্দার বাহিরে প্রকাশ্যভাবে বসিতে ইচ্ছুক, এ বিষয়ে তাঁহাকে সম্মতি দিতে হইবে। আচার্য্য কেশবচন্দ্র মহা সমস্তার মধ্যে পড়িয়া গেলেন। তাঁহার উপাসকমণ্ডলীর কতকগুলি লোক যেমন এই প্রার্থনা জানাইলেন, অপরদিকে প্রাচীন ভাবাপন্ন অনেক সভা তদ্বিরুদ্ধে মত প্রকাশ করিতে লাগিলেন। এই চর্চা যখন চলিতেছে এমন সময়ে একদিন অগ্রসর দলের কতিপয় ব্যক্তি স্বীয় স্বীয় পত্নী ও কন্যাগণকে লইয়া আসিয়া পর্দার বাহিরে সাধারণ উপাসকগণের মধ্যে বসিলেন। প্রাচীন ও নবীন উপাসকগণের মধ্যে মহাবিরোধ ও আন্দোলন উপস্থিত হইল। স্বয়ং কেশবচন্দ্র সেন মহাশয়ও এতদূর যাইতে প্রস্তুত ছিলেন না। তিনি অগ্রসর দলকে এরূপ করিতে নিষেধ করিলেন। কিন্তু তাঁহারা সেরূপ নিষেধ শ্রাস্তসঙ্গত বিবেচনা করিলেন না। বলিলেন—“তাঁহারাও উপাসকমণ্ডলীর সভ্য, মন্দির নির্মাণ বিষয়ে তাঁহারাও সাহায্য করিয়াছেন, মন্দিরের মধ্যে যেখানে ইচ্ছা তাঁহাদের বসিবার অধিকার আছে।” কিন্তু সে আপত্তি শোনা হইল না। ব্যারিস্তরে তাঁহারা মহিলাগণের সহিত উপস্থিত হইলে তাঁহাদিগকে বসিতে নিষেধ করা হইল। তখন তাঁহারা বিরক্ত হইয়া ভারত-বর্ষীয় ব্রহ্মমন্দিরে আসা পরিত্যাগ করিলেন; এবং প্রসিদ্ধ ডাক্তার অন্নদাচরণ

খাস্তগির মহাশয়ের ভবনে এবং তৎপরে অল্প স্থানে একটি স্বতন্ত্র সমাজ স্থাপন করিলেন। এই সমাজের কার্য স্বতন্ত্রভাবে কিছুদিন চলিয়াছিল; তৎপরে কেশবচন্দ্র সেন মহাশয় ব্রহ্মমন্দিরে পর্দার বাহিরে মহিলাদিগের জন্ম বসিবার আসন করিয়া দিলে, প্রতিবাদকারিগণ নিজেদের সমাজ তুলিয়া দিয়া আবার ব্রহ্মমন্দিরে ফিরিয়া আসিলেন।

স্বতন্ত্র সমাজটা উঠিয়া গেল বটে, কিন্তু জ্ঞানীশিক্ষা ও জ্ঞানীজাতির উন্নতি-বিষয়ে প্রাচীন ও নবীন দুই দলের মধ্যে যে পার্থক্য ঘটিয়াছিল তাহা সম্পূর্ণ তিরোহিত হইল না। কেশবচন্দ্র ভারতাত্মম ভবনে বয়হা বিদ্যালয় স্থাপন করিয়া নারী-কুলের শিক্ষার যে আদর্শ অনুসরণ করিতে লাগিলেন তাহা অগ্রসর দলের মনঃপূত হইল না। তাঁহার নিজ নিজ পরিবারের কন্যাদিগকে সে বিদ্যালয়ে দিলেন না। প্রধানতঃ দ্বারকানাথ গাঙ্গুলি মহাশয়ের উত্তোগে ১৮৭৩ সালে “হিন্দুমহিলা-বিদ্যালয়” নামে একটি স্বতন্ত্র বিদ্যালয় স্থাপিত হইল। সেখানে গাঙ্গুলি মহাশয় শিক্ষকতা করিতে আরম্ভ করিলেন।

এই বিবাদ ক্ষেত্রে অল্পমান ১৮৭২ সালের শেষে একজন শিক্ষিতা ইংরাজ রমণী আসিয়া উপস্থিত হইলেন। তিনি কুমারী এক্সয়েড। ইনি পরে বরিশালের মাজিষ্ট্রেট বেভেরিজ সাহেবের সহিত পরিণীতা হইয়াছিলেন। কুমারী এক্সয়েড ইংলণ্ডের প্রসিদ্ধ গার্টন কলেজে শিক্ষা প্রাপ্ত হইয়া তদানীন্তন ইংলণ্ডীয় নারী-কুলের মধ্যে সুশিক্ষিতা রমণী ছিলেন। ভারতের নারীগণের শিক্ষার দুরবস্থা কথ্য শুনিয়া, এদেশে আসিয়া, নারীকুলের শিক্ষাবিধান বিষয়ে সাহায্য করিবার বাসনা তাঁহার মনে উদ্ভূত হয়। তিনি আসিয়া পূর্ব আলাপান্ত্রে সুপ্রসিদ্ধ বারিষ্টার মনোমোহন ঘোষ মহাশয়ের ভবনে প্রতিষ্ঠিতা হইলেন; এবং নব-প্রতিষ্ঠিত হিন্দুমহিলা বিদ্যালয়ের তত্ত্বাবধায়িকা হইলেন। ওদিকে আনন্দমোহন বসু মহাশয় বারিষ্টারিতে উত্তীর্ণ হইয়া স্বদেশে ফিরিয়া আসিলেন। তিনি আসিয়া জ্ঞানীশিক্ষা বিষয়ে দ্বারকানাথ গাঙ্গুলি ও হর্গামোহন দাস প্রভৃতি বন্ধুগণের পক্ষ অবলম্বন করিলেন। কয়েক বৎসর পরে কুমারী এক্সয়েড পরিণীতা হইয়া সহর পরিত্যাগ করাতে হিন্দুমহিলা বিদ্যালয় রূপান্তরিত হইয়া “বঙ্গমহিলা বিদ্যালয়” নাম ধারণ করিল; এবং প্রধানতঃ আনন্দমোহন বসু ও হর্গামোহন দাসের অর্থ সাহায্যে চলিতে লাগিল। ইহাই বঙ্গনারীর উচ্চশিক্ষার প্রথম আয়োজন। কয়েক বৎসর পরে এই বঙ্গমহিলা বিদ্যালয় বেথুন কলেজের সহিত সম্মিলিত হয়; এবং আনন্দমোহন বসু, হর্গামোহন দাস, মনোমোহন

ঘোষ প্রভৃতি বেথুন স্কুল কমিটিতে স্থান প্রাপ্ত হন; এবং নারীগণকে বিশ্ববিদ্যালয়ের উন্নত শিক্ষা দিবার জন্ত বেথুন স্কুলে কলেজ বিভাগ খোলা হয়।

এই সময়ে ব্রাহ্মসমাজের মধ্যে আর এক প্রকার আন্দোলন উপস্থিত হয়। অনেক যুবক সভা ব্রাহ্মসমাজের কার্যকলাপের মধ্যে নিয়মতন্ত্র প্রণালী স্থাপন করিবার জন্ত প্রয়াসী হইলেন। কেশবচন্দ্র সেন মহাশয় নিয়মতন্ত্র-প্রণালীর বড় পক্ষ ছিলেন না। তিনি ইহাকে ভয়ের চক্ষে দেখিতেন; সুতরাং একটা মতবিরোধ ও আন্দোলন উপস্থিত হইল। সভাসমিতিতে ও প্রকাশ্য পত্রাদিতে আন্দোলন চলিল। অবশেষে নিয়মতন্ত্র-পক্ষীয়গণ “সমদর্শী” নামে এক মাসিক পত্রিকা প্রকাশ করিলেন। তদবধি তাঁহাদের নাম ‘সমদর্শী’ দল হইল। জীবাধীনতা পক্ষের অনেকে এ দলেও প্রবেশ করিলেন। এই আন্দোলনের চরম ফলে অবশেষে ব্রাহ্মসমাজে দ্বিতীয় গৃহ-বিচ্ছেদ ঘটে।

কিন্তু যেজন্ত এই কাল বিশেষভাবে স্মরণীয় তাহা অগ্ন্যুৎসব। কেশবচন্দ্র সেন মহাশয় বিলাত হইতে আসিয়া আর একটা কার্যো হস্তার্পণ করেন; যেজন্ত ব্রাহ্মসমাজ মধ্যে এবং তৎসঙ্গে হিন্দুসমাজ মধ্যেও ঘোর আন্দোলন উপস্থিত হয়; এবং যে আন্দোলনের ফলে বাহিরের লোকের মনে ব্রাহ্মসমাজের শক্তি হ্রাস হইয়া হিন্দুধর্মের পুনরুত্থানের তরঙ্গ উত্থিত হয়। তাহা এই—

ইহা পূর্বেই উক্ত হইয়াছে যে ১৮৬৮ সাল হইতে ব্রাহ্মদিগের মধ্যে সংস্কৃত পদ্ধতি অনুসারে বিবাহাদি অনুষ্ঠান আরম্ভ হয়। এতদর্থ দেবেন্দ্রনাথ ঠাকুর মহাশয় এক নব বিবাহ-পদ্ধতি প্রণয়ন করেন। তাহাতে হিন্দু-বিবাহ-প্রণালীর সাকারোপাসনা, ও হোম প্রভৃতি অনুষ্ঠান পরিত্যক্ত হইয়াছিল; তন্নিম্ন আর সকল বিষয়েই উহা প্রাচীন পদ্ধতির অনুরূপ ছিল।

যতদিন এক জাতীয় ব্যক্তিগণের মধ্যে বিবাহ-ক্রিয়া সম্পন্ন হইতেছিল, ততদিন ঐ সংস্কৃত পদ্ধতির বৈধতা সন্দেহে প্রশ্ন উঠে নাই। কিন্তু ১৮৬৪ সাল হইতে বিভিন্ন জাতীয় ব্যক্তিগণের মধ্যে বিবাহ-সম্বন্ধ স্থাপিত হইতে লাগিল; এবং ১৮৬৬ সাল হইতে উন্নতিশীল ব্রাহ্মদল মহর্ষি দেবেন্দ্রনাথের প্রণীত পদ্ধতি পরিবর্তিত করিয়া আপনাদের বিশ্বাস ও রুচির অনুরূপ এক নূতন পদ্ধতি প্রণয়ন করিলেন। তখন হইতে এই বিচার উপস্থিত হইল ব্রাহ্মসমাজের নবপ্রণীত পদ্ধতি আইন অনুসারে বৈধ কি না? কয়েক বৎসর এই বিচার

চলার পর কেশবচন্দ্র আইনজ্ঞ ব্যক্তিগণের মত নির্ধারণের জন্ত, আদিসমাজের পদ্ধতি ও নিজেদের অবলম্বিত পদ্ধতি, উভয় পদ্ধতি তদানীন্তন এডভোকেট জেনারেলের হস্তে অর্পণ করিলেন। তিনি উভয় পদ্ধতিকেই আইনের চক্ষে অবৈধ বলিয়া মত প্রকাশ করিলেন। তখন আদি ব্রাহ্মসমাজের সহিত উন্নতিশীল দলের ঘোর বাকযুদ্ধ উপস্থিত হইল। আদি ব্রাহ্মসমাজ নবদ্বীপ, কাশী প্রভৃতি স্থানের পণ্ডিতগণের মত সংগ্রহ পূর্বক দেখাইবার চেষ্টা করিতে লাগিলেন যে তাঁহাদের অবলম্বিত পদ্ধতি হিন্দুশাস্ত্রানুসারে বৈধ। কেশবচন্দ্র সেন মহাশয় ও কতিপয় লক্ষ্যপ্রতিষ্ঠ সংস্কৃত-শাস্ত্রজ্ঞ পণ্ডিতের মত সংগ্রহ করিয়া দেখাইলেন যে উভয় সমাজের পদ্ধতিই শাস্ত্রানুসারে অবৈধ।

ব্রাহ্মসমাজের মধ্যেই এই মতভেদ ও বিবাদ দেখিয়া গবর্ণমেন্ট ব্রাহ্ম-ম্যারেজ বিল নামে যে নূতন আইন প্রণয়ন করিবার সংকল্প করিয়াছিলেন তাহা পরিত্যাগ করিলেন। ঐ নাম পরিত্যাগ করিয়া “নেটিব ম্যারেজ বিল” নামে এক নূতন আইন বিধিবদ্ধ করিবার সংকল্প করিলেন। কিন্তু হিন্দুসমাজের মুখপাত্র হিন্দুপেট্রিয়ার্ট প্রভৃতির ও দেশের অপরাপর প্রদেশের পত্রিকাদির প্রতিবন্ধকতায় সে সংকল্পও পরিত্যাগ করিতে হইল।

ওদিকে কেশবচন্দ্র সেন মহাশয় ১৮৭১ সালে আইনটিকে নামহীন রাখিয়া পরিবর্তিত আকারে যখন বিধিবদ্ধ করিয়া লইবার জন্ত ব্যগ্র হইলেন, তখন দুইটা গুরুতর প্রশ্ন উঠিল। প্রথম, এই নূতন আইনে কত্থার বিবাহোপযুক্ত বয়স কত রাখা হইবে? দ্বিতীয়, এই আইন কাহাদের জন্ত বিধিবদ্ধ করা হইতেছে? প্রথম প্রশ্নের মীমাংসার জন্ত কেশবচন্দ্র ভারতসংস্কার সভার সভাপতি-রূপে দেশের নানা প্রদেশের সুপ্রসিদ্ধ চিকিৎসকগণের মত জিজ্ঞাসা করিলেন। তাঁহাদের অধিকাংশের মতে এদেশীয় বালিকাদের বিবাহোপযুক্ত বয়স ষোড়শ বর্ষের উপরে নির্দিষ্ট হইল। কেবল কলিকাতা মেডিকেল কলেজের অগ্রতম প্রোফেসর ডাক্তার চার্লস প্রভৃতি কেহ কেহ লিখিলেন যে চতুর্দশ বর্ষকে সর্ব-নিম্নতম বয়স মনে করা যাইতে পারে। তদনুসারে, ১৮৭২ সালের তিন আইন নামে যে আইন বিধিবদ্ধ হইল, তাহাতে চতুর্দশ বর্ষ বালিকাদিগের সর্বনিম্ন বিবাহোপযুক্ত বয়স বলিয়া নির্দিষ্ট হইল।

দ্বিতীয় প্রশ্নটার মীমাংসা গবর্ণমেন্ট এইরূপ করিলেন যে, এই নূতন আইন তাহাদেরই জন্ত বিধিবদ্ধ ব্যবহৃত হইয়াছে যাহারা প্রচলিত হিন্দু, মুসলমান, খ্রীষ্টান, ব্রাহ্ম প্রভৃতি কোনও ধর্মে বিশ্বাস করে না, এবং ঐ সকল ধর্মের

নির্দিষ্ট পদ্ধতি অনুসারে বিবাহ করিতে অনিচ্ছুক । বাহিরের লোকের মনে এই কথা দাঁড়াইল যে ব্রাহ্মেরা বলিতেছে—“আমরা হিন্দু নই ।” আদিসমাজ এই কথার ঘোর প্রতিবাদ করিতে লাগিলেন । উন্নতিশীল ব্রাহ্মদলও আপনাদের পক্ষসমর্থন করিয়া দেবাইতে লাগিলেন যে, তাঁহারা সামাজিক ভাবে হিন্দু হইলেও তাঁহাদের ধর্ম উদার, আধ্যাত্মিক ও সার্বজনীন একেশ্বর-বাদ ; সুতরাং তাহাকে ঠিক হিন্দুধর্ম বলা যায় না ।

এই আন্দোলন চারিদিকে ব্যাপ্ত হইয়া পড়িতে লাগিল । নবগোপাল মিত্র মহাশয়ের জাতীয় সভা এবং শোভাবাজারের রাজা কমলকৃষ্ণ বাহাদুর ও কালীকৃষ্ণ বাহাদুরের প্রতিষ্ঠিত সনাতন ধর্মরক্ষণী সভা প্রধানরূপে বিবাদ ক্ষেত্রে অবতরণ করিলেন । জাতীয় সভার উত্তোগে “হিন্দুধর্মের শ্রেষ্ঠতা” বিষয়ে এক বক্তৃতা দেওয়া হইল । আদিসমাজের সভাপতি ভক্তিজান রাজনারায়ণ বসু মহাশয় সেই বক্তৃতা দিলেন এবং মহর্ষি দেবেন্দ্রনাথ বক্তৃতাতে সভাপতির কার্য করিলেন । অচির কালের মধ্যে ঐ বক্তৃতার ভূয়সী প্রশংসা এদেশের সর্বত্র ও অপরদেশেও ব্যাপ্ত হইয়া গেল । সনাতন ধর্মরক্ষণী সভার সভাগণ এবং তাঁহাদের সভাপতি রাজা কালীকৃষ্ণ দেব বাহাদুর এই বক্তৃতার দ্বারা উৎসাহিত হইয়া, হিন্দুধর্মের ও হিন্দু আচারাদির শ্রেষ্ঠতা প্রতিপাদন পূর্বক সুপ্রসিদ্ধ মনোমোহন বসু প্রভৃতির দ্বারা বক্তৃতা দেওয়াইতে লাগিলেন ।

কলিকাতার প্রসিদ্ধ ধনী খেলুচন্দ্র ঘোষ মহাশয়ের ভবনে সনাতন ধর্ম-রক্ষণী সভার অধিবেশন হইত । এই সভা কয়েক বৎসর পূর্বে প্রতিষ্ঠিত হইয়া প্রাচীনশাস্ত্রের ব্যাখ্যা, শাস্ত্রীয় সাংখ্যিক আচারের প্রতিষ্ঠা, হিন্দু ভাবের পুনরুত্থান, ব্রাহ্মণ পণ্ডিতের অভ্যর্থনা, প্রভৃতি কার্য লইয়া ব্যস্ত রহিয়াছিল । কিন্তু এই সময়েই ইহা একটি প্রবল শক্তিরূপে দাঁড়াইল । ছি ! ছি ! ব্রাহ্মগণ আপনা-দিগকে হিন্দু বলিতে চায় না, এই রব যেমন দেশে উঠিয়া গেল, তেমনি এই সভার উত্তোগে হিন্দু ধর্মের পুনরুত্থানের প্রয়াস বাড়িতে লাগিল ।

চিন্তা করিয়া যতদূর অনুভব করিতে পারি এই সময় হইতেই দেশের লোকের মনের উপরে ব্রাহ্মসমাজের শক্তি অল্পে অল্পে হ্রাস পাইতে লাগিল । আমরা অনুভব করিতে লাগিলাম কেশবচন্দ্র সেন আর পূর্বের স্থায় নবাবঙ্গের অবিসম্বাদিত নেতা রহিলেন না ; এবং যুবক দলের তাঁহার দিকে আর সে প্রবল আকর্ষণ থাকিল না । ওদিকে ব্রাহ্মসমাজের মধ্যেই তাঁহার বিরোধী

দল দেখা দিল; তাহার বিবরণ অগ্রেই দিয়াছি। কেশবচন্দ্র সেন মহাশয় যুবক দলের নেতৃত্ব এক প্রকার পরিভাগ করিয়া যোগ, ভক্তি, বৈরাগ্য প্রভৃতির সাধনার্থ কলিকাতার সন্নিকটে এক উদ্যান ক্রয় করিয়া, কতিপয় অল্পবয়স্ক শিষ্যসহ একান্তবাসী হইলেন; স্বপাকে আহার করিতে লাগিলেন; গেরুয়া বস্ত্র ধারণ করিতে লাগিলেন; এবং বৈরাগ্য প্রচারে রত হইলেন। ‘সমদর্শী’ দল এই সকলের প্রতিবাদ করিয়া দ্বন্দ্ব করিতে লাগিলেন, যে যুবক দলের উপর হইতে ব্রাহ্মসমাজের শক্তি চলিয়া গেল।

কিন্তু যুবক দল সম্পূর্ণ নেতৃহীন রহিল না। দুই জন প্রতিভাশালী নেতা আসিয়া এই সময়ে বঙ্গের রঙ্গ-ভূমিতে অবতীর্ণ হইলেন। ১৮৭৪ সালে এক দিকে আনন্দমোহন বসু বিলাত হইতে ফিরিলেন; অপর দিকে সেই সময়েই বা কক্ষিং পরেই সুরেন্দ্রনাথ বন্দ্যোপাধ্যায় মহাশয় কল্যাণ হইতে অবস্থত হইয়া কলিকাতাতে আসিয়া বসিলেন। ইঁহারা উভয়েই ছাত্রদলের মধ্যে কার্য আরম্ভ করিলেন। হাজার হাজার যুবক ইঁহাদের কথা শুনিবার জন্য ছুটিতে লাগিল; এবং হাজার হাজার হৃদয়ে উন্নতির আকাঙ্ক্ষা ও স্বদেশাত্মরাগ প্রবল হইয়া উঠিল। যুবকদল যেন ব্রাহ্মসমাজের দিকে পিঠ ফিরিল, এবং রাজনীতি ও জাতীয় উন্নতির দিকে মুখ ফিরিল। মধ্যে সাধারণ ব্রাহ্মসমাজের ছাত্রসমাজ স্থাপিত হইয়া সেই গতিকে কিয়ৎপরিমাণে নিয়মিত করিয়াছিল; কিন্তু আবার মনে হয়, যুবক দলের সে ভাব এখনও সম্পূর্ণ ঘুচে নাই।

যখন ছাত্র দল এই সকল আন্দোলনে আন্দোলিত, তখন এক মহৎ কার্যের সূত্রপাত হইল; তাহা ভারতসভার স্থাপন। তাহার ইতিবৃত্ত এই:— বারিষ্ঠার মনোমোহন ঘোষ মহাশয়ের ভবন আনন্দমোহন বসু ও সুরেন্দ্রনাথ বন্দ্যোপাধ্যায় প্রভৃতির সম্মিলনের স্থান ছিল। সেখানে রাজনীতি বিষয়ে ইঁহাদের সর্বদা কথা বার্তা হইত। সকলেই অনুভব করিতে লাগিলেন যে বঙ্গদেশে মধ্যবিত্ত শ্রেণীর লোকদিগের জন্ত রাজনীতির শিক্ষা ও আন্দোলনের উপযোগী কোনও সভা নাই। কথা বার্তা হইতে হইতে অবশেষে একটি রাজনৈতিক সভা স্থাপনের সংকল্প সকলের হৃদয়ে জাগিল। সেই সংকল্পের ফলস্বরূপ ১৮৭৬ সালে ভারতসভা স্থাপিত হইল। বঙ্গদেশের সামাজিক ইতিবৃত্তে সে একটা স্মরণীয় দিন। যত দূর স্মরণ হয়, সেদিন সুরেন্দ্রনাথ বন্দ্যোপাধ্যায় মহাশয়ের একটা পুত্রের মৃত্যু হয়। তাহা সন্দেহও তিনি সভাস্থলে আসিয়া

ভারত সভা স্থাপনে সহায়তা করিলেন। আমাদের অনেকের সহিত দ্বারকানাথ গাঙ্গুলি মহাশয় ভারত সভাতে যোগ দিলেন; এবং পরে ইহার সহকারী সম্পাদকরূপে প্রসিদ্ধি লাভ করিয়াছিলেন।

আনন্দ মোহন বসু ও সুরেন্দ্র নাথ বন্দ্যোপাধ্যায়ের নেতৃত্বাধীনে ভারত সভা একটা মহৎকাজ করিতে লাগিলেন। কয়েকজন ভ্রমণকারী বক্তা নিযুক্ত করিয়া স্থানে স্থানে সভা করিয়া বক্তৃতা করাইতে লাগিলেন। এই ভ্রমণকারী বক্তৃগণ সর্বত্র ভারত সভার দিকে মধ্যবিত্ত শ্রেণীর দৃষ্টিকে আকর্ষণ করিতে লাগিলেন; ইহার অল্পাধিক নানাপ্রকার কার্যের জন্ত অর্থসংগ্রহ করিতে লাগিলেন; এবং রাজনীতির চর্চার অভ্যাস যাহাদের ছিল না, সেই চর্চাতে তাহাদিগকে নিযুক্ত করিতে লাগিলেন। দ্বারকানাথ গঙ্গোপাধ্যায় মহাশয় এই সকল কার্যে বিশেষ উৎসাহী ও যত্নপর ছিলেন।

১৮৭৮ সালে কুচবিহারের নাবালক রাজার সহিত কেশবচন্দ্র সেন মহাদেয়ের অপ্রাপ্তবয়স্ক কন্যার বিবাহ উপলক্ষে ব্রাহ্মদিগের মধ্যে মতভেদ ঘটয়া, উন্নতি-শীল ব্রাহ্মগণ দুই ভাগে বিভক্ত হন। প্রতিবাদকারী দল ১৮৭৮ সালের মে মাসে সাধারণ ব্রাহ্মসমাজ নামে একটা স্বতন্ত্র সমাজ স্থাপন করেন। এই সাধারণ ব্রাহ্মসমাজের অগ্রণী সভাগণের উৎসাহে ও উদ্যোগে সিটাস্কুল নামে একটা নূতন স্কুল স্থাপিত হয়। উহার অধ্যক্ষ-পত্র আনন্দমোহন বসু, সুরেন্দ্র নাথ বন্দ্যোপাধ্যায় ও আমার নামে বাহির হয়। আনন্দমোহন বাবু তাহার পরামর্শ দাতা, সুরেন্দ্র বাবু একজন শিক্ষক ও আমি প্রথম সেক্রেটারি থাকি। এই সিটাস্কুলের স্থাপন সে সময়কার একটা বিশেষ ঘটনা বলিয়া এসকল বিষয় উল্লেখ করিতেছি। সে সময়ে ইহা সকলের দৃষ্টিকে আকর্ষণ করিয়াছিল। তখন আনন্দমোহন বসু ও সুরেন্দ্র নাথ বন্দ্যোপাধ্যায় ছাত্রদলের ও তাহাদের অভিভাবকদিগের এত প্রিয় পাত্র ছিলেন, যে স্কুল খুলিবা মাত্র প্রথম মাসেই ছাত্র সংখ্যা এত হইল যে ব্যয় বাদে অর্থ উদ্ধৃত হইল।

ঐ ১৮৭৯ সালেই সাধারণ ব্রাহ্মসমাজের সভাগণ ছাত্রদিগের জন্ত ছাত্র-সমাজ নামে একটা সমাজ স্থাপন করিলেন। নবপ্রতিষ্ঠিত সিটাস্কুলের ভবনে প্রতি রবিবার প্রাতে তাহার অধিবেশন হইত। বিশ্ববিদ্যালয়ের অবলম্বিত শিক্ষা প্রণালী ধর্ম শিক্ষা বিহীন এই অভাবকে কিয়ৎ পরিমাণে দূর করা ঐ ছাত্র সমাজের উদ্দেশ্য ছিল। বহুসংখ্যক ছাত্র এই সমাজে যোগ দিল। আনন্দমোহন বসু মহাশয় ও আমি প্রধানতঃ

এই সমাজে উপদেশ দিতাম। ধর্ম-সংস্কার, সমাজ সংস্কার, সাধারণ জ্ঞানোন্নতি প্রভৃতি বিষয়ে উপদেশ হইত। মধ্যে মধ্যে আমরা ২০০। ৩০০ ছাত্র লইয়া শিবপুরের কোম্পানির বাগান প্রভৃতি স্থানে বাইতাম, এবং নানা প্রকার সদ্যালোচনাতে সমস্ত দিন ব্যাপন করিয়া আসিতাম। এই প্রকারে ছাত্র দলের মধ্যে কিছু দিনের জন্ত নবোৎসাহের সঞ্চার হইয়াছিল। ছাত্রসমাজ অষ্টাঙ্গি বর্তমান আছে।

এক্ষণে এই কালের মধ্যে পূর্ববঙ্গে কি প্রকার আন্দোলনের তরঙ্গ উঠিয়া ছিল তাহা কিঞ্চিৎ নির্দেশ করিতে প্রবৃত্ত হইতেছি। দশম পরিচ্ছেদে বলিয়াছি যে কেশব চন্দ্র সেন মহাশয় তাঁহার বিলাত গমনের পূর্বে ১৮৬৯ সালের শেষ ভাগে ঢাকার ব্রাহ্মমন্দির প্রতিষ্ঠা করিবার জন্ত ঢাকাতে গমন করেন। তৎপূর্ব চৈত্র মাসে তিনি দ্বিতীয় বার ঐ সহরে গিয়াছিলেন; এবং একমাস কাল তথায় বাস করিয়া ব্রাহ্মধর্ম প্রচার করিয়াছিলেন। কিন্তু ১৮৬৯ সালের শেষ ভাগে যে আবার গমন করেন তাহার ফল কিরূপ দাড়াইয়াছিল তাহা নির্দেশ করা হয় নাই। তাহার কিঞ্চিৎ বিবরণ সুপ্রসিদ্ধ কালী প্রসন্ন ঘোষ মহাশয় এক স্থানে এই ভাবে দিয়াছেন :—

“স্বনাম-ধন্ত কেশবচন্দ্র তাঁহার কতিপয় শিষ্যসহ ঢাকায় আগমন করিলেন; কেশব ইংরাজীতে ও তৎপরে বাঙ্গলায় বক্তৃতা করিলেন; তাঁহার বক্তৃতা শ্রবণ করিয়া ঢাকায় সকল সম্প্রদায়ের লোক মোহিত ও বিস্মিত হইল। ব্রাহ্মধর্মের জয় পতাকা ঢাকার নগর সঙ্কীর্ণনে প্রথম উত্তোলিত হইল। যাহারা কোন অংশেও ব্রাহ্ম নহে, তাহারাও নগর সঙ্কীর্ণনে বহির্গত, ঋষিবেশে সুশোভিত, রিক্তপদ, কেশবচন্দ্রকে ধর্ম-পুরুষ মনে করিয়া নমস্কার করিল; এবং ব্রাহ্মধর্মকে একটা আশ্চর্য্য ও অতি পবিত্র বস্তু জ্ঞানে সম্মান করিতে শিখিল।”

“কিন্তু এই সময় হইতে ঢাকার ব্রাহ্মসমাজের মূর্তি পরিবর্তিত হইল। উহা এখন আর ব্রহ্মোপাসনার মন্দির মাত্র, এই ভাবে লোকের চক্ষে প্রতিভাত হইল না। ব্রাহ্মগণ সমাজ-বদ্ধ হইয়া যথারীতি দীক্ষিত হইতে আরম্ভ করিলেন। এই উপলক্ষে পিতাপুত্রে বিচ্ছেদ, জাতিপাত, সমাজ ত্যাগ, দলাদলি আরম্ভ হইল, দেশে একটা হৈ চৈ পড়িয়া গেল। বহু ব্রাহ্মণ যুঁবা উপবীত ত্যাগ করিয়া ব্রাহ্ম হইলেন। তাঁহাদিগের মধ্যে নবকান্ত, নিশিকান্ত ও তদনুজ শীতলাকান্তের নাম বিশেষ ভাবে উল্লেখযোগ্য। তাঁহারা তিন ভ্রাতাই

ধনসম্পত্তিশালী সম্ভ্রান্ত পিতার পুত্র। তাঁহার যখন পৈতৃক বিষয় সম্পত্তি হইতে বঞ্চিত হইবার আশঙ্কাও অগ্রাহ করিয়া ব্রাহ্মধর্ম গ্রহণ করিলেন, তখন আরও বহু যুবা তাঁহাদিগের পথ লইল, তখন ঢাকার ব্রাহ্মসমাজ হিন্দুসমাজ হইতে স্বতন্ত্র হইয়া পড়িল।”

উক্ত মন্দির প্রতিষ্ঠার সময় সুপ্রসিদ্ধ কে, জি, গুপ্তের পিতা কালীনারায়ণ গুপ্ত সপুত্রে ও অপরাপর যুবক প্রভৃতি প্রায় ৪০ চল্লিশজন লোক ব্রাহ্মধর্মে দীক্ষিত হইয়াছিলেন। এক দিকে এই দীক্ষার ফলস্বরূপ প্রাচীন সমাজের সহিত ব্রাহ্মসমাজের বিচ্ছেদ ঘটনা হইল বটে, কিন্তু অপরদিকে ব্রাহ্মসমাজে নব প্রবিষ্ট যুবকগণ মহোৎসাহে নানা বিভাগে কার্য আরম্ভ করিলেন।

কেবল তাহা নহে। ১৮৭০ সালে কালীপ্রসন্ন ঘোষ মহাশয় “শুভসাধিনী” নামে এক সাপ্তাহিক পত্রিকা প্রকাশ করিলেন। তাহা লোকের চিত্ত বিনোদন ও শিক্ষা উভয়ের প্রধান উপায় স্বরূপ হইল। তৎপরে ঘোষজ মহাশয় সমাজ-সংস্কারে উৎসাহদানার্থ “সমাজ-শোধিনী” নামে একখানি গ্রন্থ প্রচার করেন। একরূপ গুনিতে পাওয়া যায়, এ গ্রন্থ পূর্ববঙ্গে সামাজিক আন্দোলনের বিশেষ সহায়তা করিয়াছিল।

তৎপরে কলিকাতাতে বঙ্কিমচন্দ্রের সুবিখ্যাত “বঙ্গদর্শন” প্রকাশিত হইলে, তাহার এক বৎসর পরে কালীপ্রসন্ন বাবু তাঁহার সুপ্রসিদ্ধ “বাকব” নামক মাসিক পত্রিকা প্রকাশ করেন। ‘বাকব’ বঙ্গ সাহিত্যে পূর্ববঙ্গের খ্যাতি প্রতিপত্তি স্ফূট ভিত্তির উপরে প্রতিষ্ঠিত করিল।

ব্রাহ্মসমাজে নব প্রবিষ্ট যুবকগণের যে কার্যাতৎপরতার উল্লেখ আগে করিয়াছি, তাহা এই কালের মধ্যে ঢাকাতে মহা আন্দোলন উপস্থিত করে। এই সকল কার্যে পূর্বোল্লিখিত নবকান্ত চট্টোপাধ্যায় প্রভৃতি কতিপয় যুবক প্রধান সারথিরূপে দণ্ডায়মান হইলেন। প্রথম এই সময়ে কিছুদিন “শুভসাধিনী” নামে ব্রাহ্মদিগের একটা সভা ছিল। বোধ হয় তাহার সংশ্রবেই কালীপ্রসন্ন ঘোষ মহাশয় তাঁহার “শুভসাধিনী” পত্রিকা বাহির করিয়া থাকিবেন। ১৮৭০ সাল হইতে নবকান্ত চট্টোপাধ্যায় ও অভয় কুমার দাসের পুত্র প্রাণকুমার দাস তাহার সম্পাদকতা ভার গ্রহণ করিয়া তাহাকে পুনরুজ্জীবিত করিয়া তুলিলেন। এই সভার উদ্ভোগে “অন্তঃপুর স্ত্রীশিক্ষা সভা” নামে একটা সভা স্থাপিত হইল। নবকান্ত বাবুই তাহার সম্পাদক হইলেন। ইঁহার অর্থসংগ্রহ

করিয়া অন্তঃপুরবাসিনী মহিলাদিগের পাঠের ব্যবস্থা এবং পরীক্ষা ও পারিতোষিক প্রদানের ব্যবস্থা করিলেন। শুনিতে পাওয়া যায় এই বিষয়ে ইহাদের কৃতকার্যতা দেখিয়া গবর্ণমেন্টও নাকি ১৫০ টাকা সাহায্য দিয়াছিলেন।

১৮৭৩ সালের ফাল্গুন মাসে নবকান্ত চট্টোপাধ্যায় ও তাঁহার ভ্রাতা নিশিকান্ত চট্টোপাধ্যায়ের উদ্যোগে “বালা বিবাহ নিবারণী সভা” নামে এক সভা স্থাপিত হইল। ঢাকা কালেক্টরের অধ্যাপক সোমনাথ মুখোপাধ্যায় মহাশয় ঐ সভার সভাপতি হইলেন। ইহাতেই প্রমাণ যে ওই সভা সকল শ্রেণীর উদার-ভাবাপন্ন ব্যক্তিদিগকে লইয়াই স্থাপিত হইয়াছিল। কিছু দিন পরে এই সভার সভাগণ “মহাপাপ বালাবিবাহ” নামে এক মাসিক পত্রিকা প্রকাশ করেন। নবকান্ত বাবু ঐ পত্রের সম্পাদকতা ভার গ্রহণ করেন। এরূপ তাজা তাজা মনের ভাব প্রকাশক, হৃদয় মনের তন্ময়তা-সূচক পত্রিকা আমরা অন্যই পড়িয়াছি! তাহার ফল কোথায় যাইবে! দেখিতে দেখিতে ঢাকার যুবকদের, বিশেষতঃ ব্রাহ্মদের, মধ্যে মহোৎসাহের লক্ষণ সকল প্রকাশ পাইতে লাগিল। একদিকে ব্রাহ্ম-যুবকগণ জাতিভেদ বর্জন করিয়া, মুসলমানের সহিত আহারাদি করিয়া, সমাজ হইতে বর্জিত হইলেন; এবং ঘোর নির্যাতন সহ করিতে লাগিলেন; অপর দিকে আশ্রয়গ্রহণার্থিনী কুলীন কন্যাদিগকে ও হিন্দু বিধবাদিগকে আশ্রয় দিয়া ব্রাহ্মসমাজে আনিবার জন্ত বন্ধপরিচর্য হইলেন। তাহার এক একটা ঘটনা যেন কোনও অদ্ভুত উপস্থানের এক এক পরিচ্ছেদের স্থায়! এক একটা বিধবা বা কুলীন কুমারীকে উদ্ধার করিতে গিয়া যুবকদিগের অনেকে প্রাণ পর্যাস্ত পণ করিতে লাগিলেন। একটা কুলীন কুমারীকে আসন্ন বহুবিবাহের বিপদ হইতে উদ্ধার করিয়া কলিকাতায় প্রেরণ করাতে, একজন যুবক, ঐ কল্যার অভিভাবকগণের প্রেরিত গুপ্তার লগুড়াঘাতে মাথা ফাটিয়া, মৃত্যু শয্যায় শায়িত হইলেন। তথাপি তাহাদের উৎসাহের বিরাম হইল না।

আর একটা পলায়িতা ও আশ্রয়ার্থিনী কুলটার কল্যাকে আশ্রয় দেওয়াতে নবকান্ত চট্টোপাধ্যায়কে আদালতে উপস্থিত হইতে হইল। সৌভাগ্য-ক্রমে ইংরাজ বিচারপতির বিচারে ঐ কল্যার অভিভাবকতা ভার তাহার মাতার হস্ত হইতে লইয়া নবকান্ত বাবুর প্রতি অর্পিত হইল।

নবকান্ত চট্টোপাধ্যায় স্বদেশ-প্রেমিক মানুষ ছিলেন। নিজে ধনী ব্রাহ্মণ গৃহস্থের সন্তান হইয়াও যখন দারিদ্র্য পড়িলেন, তখন দরিদ্র ভদ্রসন্তানদিগকে

পথ দেখাইবার জন্ত নিজে জুতার দোকান করিয়া জুতা বিক্রয় করিতে লাগিলেন। তাহাতে প্রাচীন সমাজের অনেকে তাঁহার প্রতি অশ্রদ্ধা প্রকাশ করিতে লাগিলেন, কিন্তু তিনি তাহা গ্রাহ্য করিলেন না। তিনি জ্ঞানে বা পদ-সম্মানে পূর্ববঙ্গে অগ্রগণ্য ব্যক্তি ছিলেন না; কিন্তু এই কালের মধ্যে ঢাকাতে যত প্রকার সদহুষ্ঠানের আয়োজন হইয়াছিল, তিনি তাহার অধিকাংশের উদ্ভাবনকর্তা। তিনি সকল সদহুষ্ঠানের সহিত সংশ্লিষ্ট ছিলেন বলিয়া তাঁহার সংক্ষিপ্ত জীবনচরিত এখানে দিতেছি। বঙ্গাব্দ ১২৫২ ইংরাজী ১৮৪৬ সালের ১৪ই আশ্বিন বিক্রমপুরের অন্তর্গত পশ্চিমপাড়া গ্রামে তাঁহার জন্ম হয়। তিনি ঐ গ্রামের সুপ্রসিদ্ধ ঢাকা জজ আদালতের উকীল কালীকান্ত চট্টোপাধ্যায়ের দ্বিতীয় পুত্র। কালীকান্ত চট্টোপাধ্যায় মহাশয় স্বধর্ম্মাভিরাগী ও ব্রাহ্মসমাজ-বিদ্বেষী মানুষ ছিলেন। ১৮৬৫ সালের শেষে কেশবচন্দ্র সেন যখন ঢাকাতে গমন করেন, তখন তাঁহার প্রভাব হইতে যুবকদলকে বাঁচাইবার জন্ত যে হিন্দুধর্ম্মরক্ষণী সভা ও হিন্দু-হিতৈষিনী পত্রিকা স্থাপিত হয় তিনি তাহার মূলে ছিলেন। তিনিই স্বধর্ম্মাভিরাগী মানুষদিগকে একত্র করিয়া ঐ নবধর্ম্মকে বাধা দিবার জন্ত বন্ধপত্রিকার হইয়াছিলেন। কিন্তু কি বিচিত্র ঘটনা! তাঁহার পুত্রগণই ব্রাহ্মসমাজের আশ্রয় গ্রহণ করিল! জ্যেষ্ঠ শ্রামিকান্ত ব্যতীত আর তিন পুত্র নবকান্ত, নিশিকান্ত ও শীতলাকান্ত ব্রাহ্মসমাজের দিকে আকৃষ্ট হইলেন। ইহাদের মধ্যে নবকান্তকেই নির্ধাতন ও দারিদ্র্যের তাড়না বিশেষভাবে সহ্য করিতে হইয়াছিল।

ব্রাহ্মধর্ম্মের প্রতি তাঁহার অহুসারের সঞ্চার দেখিয়া পিতা কালীকান্ত উগ্র-মূর্ত্তি ধারণ করিলেন। এমন কি প্রহার পর্য্যন্ত করিতে বিরত হন নাই। কিন্তু কিছুতেই নবকান্তকে নিরস্ত করিতে পারিলেন না।

তাঁহার পিতৃবিদ্বেষের পরে তাঁহার কঠোর সংগ্রাম উপস্থিত হইল। পিতা উইল করিয়া গেলেন যে ছেলে স্বধর্ম্মে না থাকিলে সে তাঁহার পরিত্যক্ত সম্পত্তি পাইবে না। তদনুসারে নবকান্ত সর্বপ্রকার পৈতৃক সম্পত্তি হইতে বঞ্চিত হইয়া অসম্পূর্ণ শিক্ষা লইয়া পরিবার প্রতিপালনের জন্ত ঘোর সংগ্রামের মধ্যে পড়িলেন। তিনি প্রথমে ধামরাই নামক স্থানের স্কুলে শিক্ষকতা কার্যে নিযুক্ত হন। পরে শ্রীনগর মাইনর স্কুলের প্রধান শিক্ষকের কাজ করেন। তাঁহার পরিবারস্থ ব্যক্তিগণ বলেন, যে “স্কুলের সম্পাদক তাঁহাকে স্কুলের বিল সম্বন্ধে একটা অসঙ্গত প্রস্তাবে সম্মত হইতে অহুরোধ করায়, তিনি তৎক্ষণাৎ কার্য পরিত্যাগ করিয়া ঢাকায় চলিয়া গেলেন”।

ঢাকাতে আসিয়া তিনি প্রথমে পোগোশ স্কুলে; তৎপরে জগন্নাথ কলেজে শিক্ষক রূপে প্রতিষ্ঠিত থাকেন। ১৮৬৯ সালের শেষে কেশবচন্দ্র সেন মহাশয় ঢাকা ব্রহ্মমন্দিরের প্রতিষ্ঠা উপলক্ষে ঢাকাতে গিয়া ৪০ জনকে ব্রাহ্মধর্মে দীক্ষিত করেন। তাঁহার মধ্যে নবকান্ত চট্টোপাধ্যায় একজন ছিলেন। সে সময়ে ঢাকাতে কিরূপ আন্দোলন উঠিয়াছিল, তাহা অগ্রেই প্রদর্শন করিয়াছি।

ইহার পরে নবকান্ত বাবু নানা সংকার্যে প্রবৃত্ত হইতে লাগিলেন। তাহারও উল্লেখ করিয়াছি। তাঁহার ভবন আশ্রয়ার্থিনী হিন্দু বিধবা ও কুলীন কন্যা-গণের আশ্রয়স্থান হইয়া উঠিল। তিনি কোলীয়া-প্রথা ভঙ্গন, বহু বিবাহ নিবারণ, সুরাপান ও দ্বন্দ্বীতি নিবারণ প্রভৃতি সকল প্রকার দেশহিতকর কার্যে অবিরাম পরিশ্রম করিতে লাগিলেন। এইরূপ নানা সদচরিত্রানে রত থাকিতে থাকিতে বাঙ্গালা ১৩১১ সালের ১৫ই আশ্বিন তাঁহার জন্মদিনে ইহলোক পরিত্যাগ করিলেন।

ব্রাহ্মসমাজ ও নবকান্ত চট্টোপাধ্যায়ের কার্য ব্যতীত এই কালের মধ্যে রাসবিহারী মুখোপাধ্যায়ের কোলীয়া-প্রথা নিবারণের চেষ্টাতে যাহা যাহা মনকে উত্তেজিত রাখিয়াছিল, তাহা দশম পরিচ্ছেদে তাঁহার জীবন চরিত্রের মধ্যে উল্লেখ করিয়াছি। বিভাসাগর মহাশয় যে রাজবিধির দ্বারা বহুবিবাহ নিবারণে প্রয়াসী হইয়াছিলেন, তাহার পশ্চাতে যে রাসবিহারী মুখোপাধ্যায়ের প্রয়াস বহু পরিমাণে ছিল তাহাতে সন্দেহ নাই। বিভাসাগর মহাশয় তাঁহার সেই উত্তম শিক্ষিত ব্যক্তিদিগের সেরূপ সহায়তা পান নাই। রাসবিহারী অশিক্ষিত হইয়াও তাঁহার উৎসাহদ্বারা হইয়াছিলেন বলিয়া তিনি শিক্ষিত ব্যক্তিদিগের প্রতি হাড়ে চটিয়া গিয়াছিলেন। যাহা হউক পূর্ববঙ্গ হইতে বহুদিন সর্ববিধ সামাজিক উন্নতির অন্তর্কূল বাক্য শোনা যাইতেছে।



অগ্নীয়া রাজনারায়ণ বসু ।

৩১৫ পৃষ্ঠা ।

বুখলীন প্রেস, কলিকাতা ।

ত্রয়োদশ পরিচ্ছেদ ।

নব্যবঙ্গের তৃতীয় যুগের নেতৃবৃন্দ ।

রাজনারায়ণ বসু ।

প্রকৃত পক্ষে রাজনারায়ণ বসু মহাশয় নব্যবঙ্গের তৃতীয় যুগের মাহুয নহেন । ১৮৫১ সালে তিনি মেদিনীপুর জেলা স্কুলের হেড মাস্টার হইয়া যান ; এবং সেই সালেই তাঁহার প্রধান কার্য আরম্ভ হয় । সে দিক দিয়া দেখিলে তাঁহার কার্যের উল্লেখ অগ্রেই করা উচিত ছিল । কিন্তু ১৮৭০ হইতে ১৮৭৯ সালের মধ্যে তাঁহার শক্তি বঙ্গসাহিত্যে ও বঙ্গদেশীয় জাতীয় চিন্তাতে প্রধান রূপে অহুত হয়, এইজন্ত এই কালের নেতৃবৃন্দের মধ্যে তাঁহার নাম উল্লেখ করা যাইতেছে । তাঁহার জীবনের সংক্ষিপ্ত বিবরণ এই :—

১৮২৬ সালের ১৭ই সেপ্টেম্বর দিবসে, কলিকাতার পাঁচ ক্রোশ দক্ষিণ পূর্ব বর্তী বোড়াল গ্রামে, প্রসিদ্ধ বসু বংশে, রাজনারায়ণ বসু মহাশয়ের জন্ম হয় । এই বোড়ালের বসুরা কলিকাতার আদিম অধিবাসী ছিলেন । ইংরাজের গোবিন্দপুরে যখন বর্তমান কেল্লা নিৰ্মাণ করেন, তখন তত্রতা বসু পারিবারকে বাহির সিমাতে এওয়াজি জমি দিয়া সেখান হইতে উঠাইয়া দেন । কালক্রমে রাজনারায়ণ বসুর পপিতামহ শুকদেব বসু, কলিকাতা হইতে উঠিয়া গিয়া বোড়ালে বাস করেন । ইহার পিতামহ রামসুন্দর বসু, দয়া দাক্ষিণ্য, সদাশয়তা প্রভৃতির জন্ত বিখ্যাত ছিলেন । পিতা নন্দকিশোর, বসু বংশের সর্বজন-প্রশংসিত গুণসকলের অধিকারী হইয়াছিলেন ; এবং তদুপরি মহাত্মা রাজা রামমোহন রায়ের সংশ্রবে আসিয়া ধর্মসম্বন্ধে উদার ভাব প্রাপ্ত হইয়াছিলেন । তিনি রামমোহন রায়ের একজন অগ্রগত শিষ্য ছিলেন ; এবং কিছুদিন রাজার আইভেট সেক্রেটারির কাজ করিয়াছিলেন । ১৮৪৫ সালে তাঁহার মৃত্যু হয় । এক্ষণে কথিত আছে যে মৃত্যু শয্যাতে শয়ান হইয়া তিনি রামমোহন রায়ের রুত শব্দ-ভাষ্যের অনুবাদ আনাইয়া পাঠ করাইয়াছিলেন ; এবং ইংলণ্ডের ব্রিটলনগরে গুঁকার জপিতে জপিতে যেমন রাজার মৃত্যু হইয়াছিল তেমনি গুঁকার জপিতে জপিতে ইহারও মৃত্যু হয় ।

রাজনারায়ণ বসু মহাশয় এই পিতার সন্তান । বাল্যকালে বোড়াল গ্রামেই গুরুমহাশয়ের পাঠশালাে তাঁহার বিদ্যারম্ভ হয় । তখন কলিকাতার দক্ষিণ

প্রদেশস্থ অনেক গ্রামের পাঠশালা বর্দ্ধমানের গুরু দেখা বাইত । এই গুরুরা আসিয়া ধনী গৃহস্থদের চণ্ডীমণ্ডপে পাঠশালা খুলিতেন । একা গুরু মহাশয় খুঁটি ঠেশান দিয়া বেজ হস্তে বসিতেন, সর্দার ছেলেরা তাঁর সহকারীর কাজ করিত ; নিম্ন শ্রেণীর বালকদিগের শিক্ষার সাহায্য করিত ; গুরুমহাশয়ের পয়সাদি আদায় করিয়া দিত ; তাঁহার পাকাদিকার্যের সাহায্য করিত ; পলাতক বালকদিগকে ধরিয়া আনিত ইত্যাদি । এইরূপ পাঠশালা রাজনারায়ণ বসুর শিক্ষা আরম্ভ হইল ।

পাঠশালাে কিছু দিন শিক্ষা করার পর, সাত বৎসর বয়সের সময়, পিতা তাঁহাকে কলিকাতাতে আনিয়া আর এক গুরুর পাঠশালাে ভর্তি করিয়া দিলেন । সেখানে কিছু দিন থাকিয়া বঙ্গজ মহাশয় বোবাজারের শম্ভু মাষ্টারের স্কুলে ইংরাজী পড়িতে আরম্ভ করেন । সে সময়ে ইংরাজি শিক্ষিত ব্যক্তিদিগের মধ্যে অনেকে নিজ নিজ পাড়ায় ছোট ছোট স্কুল খুলিয়া ছাত্র সংগ্রহ করিয়া পড়াইতে আরম্ভ করিয়াছিলেন । শম্ভু মাষ্টার তাঁহাদের মধ্যে একজন ছিলেন । এই শম্ভু মাষ্টারের স্কুলে রাজনারায়ণ বাবুর ইংরাজী শিক্ষা আরম্ভ হইল ; কিন্তু তাহা অধিক দিন থাকিল না । অচির কালের মধ্যে তাঁহার পিতা তাঁহাকে মহাত্মা হেয়ারের স্কুলে ভর্তি করিয়া দিলেন । চতুর্দশ বর্ষ বয়স পর্যন্ত তিনি সেখানে থাকেন । এই থানে থাকিতে থাকিতেই তাঁহার প্রতিভার লক্ষণ সকল প্রকাশ পাইতে লাগিল । স্কুলের বালকগণ মিলিয়া এক সদালোচনা সভা স্থাপন করিল । তাহাতে রাজনারায়ণ বাবু একজন প্রধান উদ্যোগী হইলেন ; এবং তাহার এক অধিবেশনে Whether Science is preferable to Literature,—সাহিত্য অপেক্ষা বিজ্ঞান অধিক আদরণীয় কি না—এই বিষয়ে এক বক্তৃতা পাঠ করিলেন । শুনিতে পাওয়া যায় সে দিনকার অধিবেশনে হেয়ার স্বয়ং উপস্থিত ছিলেন ; এবং তাঁহার বক্তৃতা শুনিয়া অতিশয় প্রীত হইয়াছিলেন ।

হেয়ার তাঁহাকে ফ্রী বালকরূপে হিন্দু কলেজে প্রেরণ করেন । এই হিন্দু কলেজ পরে প্রেসিডেন্সি কলেজরূপে পরিণত হইয়াছে । হিন্দু কলেজে গিয়া তিনি একদিকে যেমন প্রতিভাশালী ও কৃতিত্বসম্পন্ন শিক্ষকদিগের হস্তে পড়িলেন, তেমনি অপর দিকে এরূপ সকল সমাধার্মী বন্ধু পাইলেন, যাহাদের দৃষ্টান্ত ও সহবাসে তাঁহার জ্ঞানপ্ৰহা উদ্দীপ্ত হইতে লাগিল । শিক্ষকদিগের মধ্যে সাহিত্যের অধ্যাপক হু প্রসিদ্ধ ডি, এল, রিচার্ডসন, ও গণিতাধ্যাপক

মিষ্টার রীজের নাম প্রধানরূপে উল্লেখযোগ্য। ডি, এল, রিচার্ডসনের বিবরণ অগ্রেই দেওয়া হইয়াছে। রীজ সাহেব এক সময়ে সুবিখ্যাত নেপোলিয়ান বোনাপার্টির সৈন্য দলে সামান্য একজন পদাতিক সৈনিক ছিলেন। তৎপরে নানা ঘটনা ও নানা অবস্থা অতিক্রম করিয়া অবশেষে হিন্দকালেজের গণিতাধ্যাপকের কার্য্যে প্রতিষ্ঠিত হইয়াছিলেন। গণিতে তাঁহার মত সুশুণ্ডিত লোক প্রায় দেখা যায় না। তাঁহার সংশ্লেষে যে কোন ছাত্র একবার আসিয়াছে সেই তাঁহার গণিত-বিজ্ঞা-পারদর্শিতা দেখিয়া আশ্চর্য্যাবিত হইয়াছে। কিন্তু রাজনারায়ণ বাবু চিরদিন গণিতকে ডরাইতেন; সুতরাং রীজকে যমের মত দেখিতেন।

যাহা হউক এই সময় প্রতিভাশালী শিক্ষকের সংশ্লেষে আসিয়া তাঁহার চিত্তে জ্ঞানস্পৃহা উদ্দীপ্ত হইল। অপর দিকে মাইকেল মধুসূদন দত্ত, পারীচরণ সরকার, জ্ঞানেন্দ্রমোহন ঠাকুর, ভূদেব মুখোপাধ্যায়, আনন্দকৃষ্ণ বসু, জগদীশ নাথ রায়, ঈশ্বরচন্দ্র মিত্র প্রভৃতি পরবর্ত্তীকালপ্রসিদ্ধ ব্যক্তিদিগকে সহাধ্যায়ী রূপে পাইয়া তাঁহার আত্মোন্নতির বাসনা প্রবল হইল। তাহার ফলস্বরূপ তিনি কলেজের ভাল ভাল পারিতোষিক ও ছাত্রবৃত্তি প্রভৃতি পাইতে লাগিলেন।

হিন্দুকলেজে পাঁচ বৎসর পাঠ করিয়া তিনি ১৮৪৪ সালে উত্তীর্ণ হইলেন। পর বৎসর তাঁহার পিতার দেহান্ত হইল। ১৮৪৬ সালে তিনি দেবেন্দ্রনাথ ঠাকুর মহাশয়ের দ্বারা আকৃষ্ট হইয়া ব্রাহ্মসমাজে যোগ দিলেন; এবং উপনিষদের ইংরাজী অম্বুবাদ করিয়া, তত্ত্ববোধিনী পত্রিকা সম্পাদন বিষয়ে, অক্ষয়কুমার দত্ত মহাশয়ের সহায়তা করিতে প্রবৃত্ত হইলেন।

১৮৪৮ সাল পর্য্যন্ত ঐ কার্য্য করিয়াছিলেন। তৎপরে ইংলণ্ডে দ্বারকানাথ ঠাকুর মহাশয়ের মৃত্যুর পর, দেবেন্দ্রনাথ ঠাকুর মহাশয়ের বৈষয়িক অবস্থা মন্দ হইলে, উপনিষদ অম্বুবাদকের পদ উঠিয়া যাওয়াতে তাঁহারও কর্ম্ম গেল। তিনি প্রায় দেড় বৎসর কাল বসিয়া রহিলেন। পরে ১৮৪৯ সালে তিনি কলিকাতা সংস্কৃত কালেজের দ্বিতীয় ইংরাজী শিক্ষকের পদে নিযুক্ত হইলেন। এই সময়কার স্মরণীয় বিষয় একটা আছে। সংস্কৃত কলেজে যে তিনি কেবল ক্লাসের ছাত্রদিগকে ইংরাজী পড়াইতেন তাহা নহে, কিন্তু ঈশ্বরচন্দ্র বিজ্ঞানাগর, দ্বারকানাথ বিজ্ঞানভূষণ, মদনমোহন তর্কালঙ্কার, রামগতি শ্রায়রত্ন প্রভৃতি পরবর্ত্তী-সময়-প্রসিদ্ধ ব্যক্তিগণও তাঁহার নিকট ইংরাজী পড়িতেন। এই সূত্রে রাজনারায়ণ বাবুর সঙ্গে উহাদের আত্মীয়তা জন্মে।

১৮৪৮ হইতে ১৮৫০ এই কালের মধ্যে ব্রাহ্মসমাজের অবলম্বিত ধর্ম বিশ্বাসে একটা স্তম্ভন পরিবর্তন ঘটে ; তাহাতে রাজনারায়ণ বাবুর একটু হাত ছিল বলিয়া তাহার উল্লেখ করা যাইতেছে ;—সে পরিবর্তনটা এই । তৎপূর্বে ব্রাহ্ম-সমাজের সভ্যগণ বেদকে আপনাদের ধর্মবিশ্বাসের অদ্রোহ ভিত্তি বলিয়া প্রচার করিয়া আসিতেছিলেন । রাজনারায়ণ বাবুও সেইরূপ বিশ্বাস করিতেন ; এবং প্রচার করিতেন । কিন্তু ডাক্তার ডফ প্রভৃতি খ্রীষ্টীয় প্রচারকগণের সহিত এই বিষয়ে বিচার উপস্থিত হইয়া তাহার ফল স্বরূপ ব্রাহ্মসমাজ মধ্যেও বিচার উপস্থিত হইল । কালী হইতে চারিজন বেদজ্ঞ ছাত্র ফিরিয়া আসিলে এই বিচার আরও পাকিয়া উঠিল । রাজনারায়ণ বাবু যখন বেদে অদ্রোহতাবাদ রক্ষা করা কঠিন বলিয়া অনুভব করিলেন, তখন অক্ষয়কুমার দত্ত মহাশয়ের সঙ্গে মিলিত হইয়া দেবেন্দ্রনাথ ঠাকুরের সহিত বিচার উপস্থিত করিলেন । তাহার ফল স্বরূপ বেদের অদ্রোহতাবাদ ব্রাহ্মসমাজের অবলম্বিত মত হইতে পরিত্যক্ত হইল ; এবং মানবের ধর্ম বিশ্বাসের ভিত্তি আত্ম-প্রত্যয়ের উপরে নিহিত হইল ।

১৮৫১ সালের ফেব্রুয়ারি মাসে তিনি মেদিনীপুর জেলা স্কুলের হেড মাষ্টার হইয়া যান । সেখানে তিনি ১৮৬৬ সালের মার্চ মাস পর্য্যন্ত ছিলেন । মেদিনীপুরে গিয়া তাঁহার কার্যশক্তি অদ্ভুত রূপে বিকাশ পাইল । তিনি দেশহিতকর নানা কার্যে ব্যাপৃত হইয়া পড়িলেন । সভার পর সভা এইরূপে এত প্রকার সভা সমিতি করিতে লাগিলেন, যে একবার সেখানকার একজন জুদ-লোক তাঁহাকে বলিয়াছিলেন যে—আপনার সভার জ্বালাতে আমরা অস্থির ; এইবার সভানিবারিণী সভা নামে একটা সভা স্থাপন না করিলে আর চলিতেছে না । ঐ সভায় সভ্যদিগের প্রধান কাজ হইবে, আপনাদের কোনও সভার সংবাদ পাইলেই লাঠি সোটা লইয়া উপস্থিত হওয়া ।

মেদিনীপুরে অবস্থান কালে রাজনারায়ণ বাবু প্রধানতঃ সাত প্রকার কার্যে হাত দিয়াছিলেন ।

- (১ম) মেদিনীপুর জেলা স্কুলের উন্নতি সাধন ।
- (২য়) মেদিনীপুর ব্রাহ্মসমাজের পুনঃ স্থাপন ।
- (৩য়) জাতীয়-গৌরব-সম্পাদনী সভা স্থাপন ।
- (৪) সুরাপান নিবারিণী সভা স্থাপন ।
- (৫ম) বালিকা বিদ্যালয় স্থাপন ।
- (৬) ধর্মতত্ত্ব দীপিকা গ্রন্থ প্রণয়ন ।

(৭) Defence of Brahmoism and of the Brahmo Somaj নামক পুস্তিকা প্রণয়ন ।

ইহার প্রত্যেকটির জন্য তাঁহাকে প্রভূত পরিশ্রম করিতে হইয়াছিল । প্রথমতঃ মেদিনীপুর জেলা স্কুলে তাঁহার পূর্বে একজন ফিরঙ্গী হেড মাষ্টার ছিলেন । তাঁহার অধিকার কালে স্কুলটির অবস্থা শোচনীয় হইয়া দাঁড়াইয়াছিল । কি শিক্ষক কি ছাত্র কাহারও মনে উন্নতির স্পৃহা দৃষ্ট হয় নাই । বঙ্গজ মহাশয় কার্যভার গ্রহণ করিয়াই স্কুলটির সর্বাঙ্গীণ উন্নতি বিধানে আপনাকে নিয়োগ করিলেন । একদিকে শিক্ষকগণের সহিত প্রীতি ও শ্রদ্ধার সম্বন্ধ স্থাপন করিয়া তাঁহাদিগকে স্বীয় স্বীয় কার্যে উৎসাহিত করিয়া তুলিলেন ; অপরদিকে উৎকৃষ্টতর শিক্ষাপ্রণালী প্রবর্তিত করিয়া ছাত্রগণকে শিক্ষা-বিষয়ে মনোযোগী করিয়া তুলিলেন । তিনি তাঁহার আত্ম-জীবন চরিতে বলিয়াছেন যে তিনি প্রথম প্রথম ছাত্রদিগকে শারীরিক শাস্তি দিতেন ; কিন্তু ত্বরায় সে পথ পরিত্যাগ করিলেন ! দেখিলেন যে শারীরিক শাস্তি অপেক্ষা প্রেমের দ্বারা বালকদিগের হৃদয় আকর্ষণ করিলে অধিক কাজ করা যায় । সেইরূপে তিনি তাহাদিগকে আপনাদিগকে আকৃষ্ট করিতে সমর্থ হইলেন । ইহার ফল আমরা পরবর্তী সময়ে দেখিয়াছি । অতি অল্প ছাত্রকেই গুরুর প্রতি একরূপ প্রীতি ও শ্রদ্ধা স্থাপন করিতে দেখিয়াছি । উত্তর কালে তাঁহার ছাত্রদিগের অনেকে কৃত্তী ও বশস্বী হইয়া নানা বিভাগে নানা কার্যে গিয়াছেন । প্রায় সকলেই মেদিনীপুরের ও রাজনারায়ণ বাবুর স্বতি হৃদয়ে দৃঢ়মুদ্রিত করিয়া লইয়া গিয়াছেন । এই ছাত্রেরাই উত্তর কালে উদ্বোধনী হইয়া তাঁহাদের গুরুভক্তির চিহ্নস্বরূপ মেদিনীপুরে একটি আবাস বাটী নির্মাণ করিয়া রাজনারায়ণ বাবুকে উপহার দিয়াছিলেন ।

তাঁহার দ্বিতীয় কার্য ব্রাহ্মসমাজের পুনঃ স্থাপন । কোননগর নিবাসী সুপ্রসিদ্ধ শিবচন্দ্র দেব মহাশয় যখন মেদিনীপুরে ডিপুটী কালেক্টরের কাজ করেন, তখন তাঁহার উদ্বোধনে সেখানে ব্রাহ্মসমাজ প্রথম স্থাপিত হয় । কিন্তু শিবচন্দ্র বাবু কর্তৃকৃত্তে সে স্থান পরিত্যাগ করিলে কিছুদিন পরে সে সমাজ উঠিয়া যায় । রাজনারায়ণ বাবু ১৮৫১ সালে মেদিনীপুরে পদার্পণ করিয়াই ১৮৫২ সালে সমাজের পুনঃ প্রতিষ্ঠা করেন ; এবং নিজেই তাহার উপাসনাদি কার্য করিতে প্রবৃত্ত হন । বলিতে গেলে এতৎসংক্রান্ত কার্যই তাঁহার জীবনের প্রধান কার্যরূপে গণ্য হইবার উপযুক্ত ; এই সমাজের সংস্রবে

তিনি যে উপদেশাদি দিতে লাগিলেন, তাহা মুদ্রিত হইয়া দেশমধ্যে ব্রাহ্মধর্ম প্রচারের পক্ষে বিশেষ সহায়তা করিতে লাগিল। ইহা স্মরণীয় ঘটনা যে তাঁহার মেদিনীপুরের উপদেশ পাঠ করিয়াই অপ্রসিদ্ধ কেশবচন্দ্র সেন মহাশয় ব্রাহ্মসমাজের দিকে আকৃষ্ট হইয়াছিলেন।

অচির কালের মধ্যে ব্রাহ্মধর্ম বিষয়ে মেদিনীপুর বঙ্গদেশের মধ্যে একটা প্রধান স্থান হইয়া উঠিল। বঙ্গজ মহাশয় কেবল মুখে ব্রাহ্মধর্ম প্রচার করিয়া সন্তুষ্ট থাকিলেন না; কিন্তু ব্রাহ্মধর্ম অনুসারে পারিবারিক অনুষ্ঠান করিতে অগ্রসর হইলেন। অনুমান ১৮৬৪ কি ১৮৬৫ সালে ব্রাহ্মধর্মের পদ্ধতি অনুসারে কৃষ্ণধন ঘোষ নামক একজন চিকিৎসা-ব্যবসায়ী যুবকের সহিত তাঁহার জ্যেষ্ঠা কন্যার বিবাহ হইল। এতদুপলক্ষে কলিকাতা হইতে দেবেন্দ্রনাথ ঠাকুর, কেশবচন্দ্র সেন প্রভৃতি ব্রাহ্মসমাজের অগ্রণীগণ মেদিনীপুরে গমন করিলেন; এবং মেদিনীপুরস্থ সকল শ্রেণীর সম্ভ্রান্তব্যক্তিগণ সমবেত হইলেন। সে অনুষ্ঠানের তরঙ্গ দেশের অপরাপর দূরবর্তী স্থানেও অনুভূত হইল।

কিন্তু ব্রাহ্মধর্ম ও ব্রাহ্মসমাজ সম্বন্ধে রাজনারায়ণ বাবুর মেদিনীপুর বাস কালের প্রধান কার্য্য “ধর্ম্যতত্ত্বদীপিকা” নামক গ্রন্থ প্রণয়ন। এই গ্রন্থ তিনি ১৮৫৩ সালে আরম্ভ করিয়া ১৮৬৬ সালে শেষ করেন। বলিতে গেলে এই গ্রন্থ প্রণয়ন করিতে গিয়াই তিনি গুরুতর শিরঃপীড়া দ্বারা আক্রান্ত হইয়া জন্মের মত অসুস্থ হইলেন। এই গ্রন্থে যে প্রভূত গবেষণা ও চিন্তার পরিচয় পাওয়া যায়, তাহা দেখিলে বিস্মিত হইতে হয়।

তৎপরে উল্লেখ যোগ্য বিষয় জাতীয়-গৌরব-সম্পাদনী সভা। দেশীয় শিক্ষিত দলের মধ্যে জাতীয় ভাব উদ্দীপ্ত করা এই সভার উদ্দেশ্য ছিল। এতৎসংস্রবে তিনি ইংরাজীতে “A society for the promotion of national feeling among the educated Natives of Bengal, নামে এক প্রস্তাবনা পত্র বাহির করিয়াছিলেন। শুনিতে পাওয়া যায়, ঐ প্রস্তাবনা পত্র পাঠ করিয়াই হিন্দুমেলার প্রবর্তক নবগোপাল মিত্র মহাশয়ের মনে তাঁহার নিজের প্রতিষ্ঠিত জাতীয় সভা ও জাতীয় মেলায় ভাব উদিত হয়। এই জাতীয়-গৌরব-সম্পাদনী সভা সংক্রান্ত একটা কৌতুকজনক স্মরণীয় বিষয় আছে। সে সময়ে ইংরাজী শিক্ষিত ব্যক্তিগণের মধ্যে উঠিতে বসিতে নড়িতে চড়িতে ইংরাজী ভাষা ব্যবহারের বাড়াবাড়ি দেখিয়া উক্ত সভার সভাগণ এই নিয়ম করিয়াছিলেন যে তাঁহারা পরস্পরের সহিত আলাপে বা চিঠি পত্রাদিতে ইংরাজীর পরিবর্তে বাঙ্গালা

ভাষা ব্যবহার করিবেন; পরস্পর সাক্ষাৎ হইলে good morning, বা good night এর পরিবর্তে “সুপ্রভাত ও “শুভরজনী” বলিবেন; কথা বার্তা কহিবার সময় বাঙ্গালার সঙ্গে ইংরাজী মিশ্রিত করিবেন না; যদি কেহ ভুল ক্রমে ওরূপ করেন, তবে প্রত্যেক ইংরাজী বাক্যের জন্ত এক এক পয়সা জরিমানা দিতে হইবে।

স্বরাপান-নিবারিণী সভার বিষয়ে এইটুকু স্মরণীয় যে রাজনারায়ণ বাবুর প্রভাবে মেদিনীপুরের সম্ভ্রান্ত ব্যক্তিদিগের মধ্যে অনেকে স্বরাপান ত্যাগ করিয়াছিলেন। সে জন্ত নাকি তাঁহার প্রতি মাতালদিগের মহা আক্রোশ উপস্থিত হয়। এই মেদিনীপুর বাস কালে তাঁহারই উত্তোগে তাঁহার জ্যেষ্ঠতাত পুত্র দুর্গানারায়ণ এবং তাঁহার মধ্যম সহোদর মদনমোহন, বিজ্ঞানাগর মহাশয়ের মতামুসারে বিধবা-বিবাহ করেন।

১৮৬৬ সালের মার্চ মাসে অতিরিক্ত মানসিক শ্রম বশতঃ তাঁহার মাথা ঘুরণি আরম্ভ হইল। একদিন তিনি আর মাথা লইয়া উঠিতে পারিলেন না। সেই শিরঃপীড়া উত্তরোত্তর বৃদ্ধি পাইতে লাগিল। অবশেষে তিনি কৰ্ম হইতে অবসর গ্রহণ করিতে বাধ্য হইলেন। অবসৃত হইয়া প্রথমে কলিকাতাতে আসিয়া বাস করিলেন। তিনি কলিকাতাতে আসিয়া প্রতিষ্ঠিত হইবা মাত্র নব্য ও প্রাচীন ব্রাহ্মদল তাঁহাকে ঘিরিয়া লইল। শরীর একটু ভাল হইতে না হইতে তাঁহার আবার শ্রম আরম্ভ হইল। অতঃপর তিনি সাত প্রকার কার্যে হস্তার্পণ করিয়াছিলেন :—(১ম) ব্রাহ্মসমাজে নরপূজা নিবারণের প্রয়াস; (২য়) হিন্দুধর্মের শ্রেষ্ঠতা বিষয়ক বক্তৃতা; (৩য়) সে কাল এ কাল বিষয়ে বক্তৃতা; (৪র্থ) হিন্দুকালেজ ইউনিয়ান নামক শিক্ষিতদিগের সম্মিলনীর আয়োজন; (৫ম) বঙ্গভাষা ও বঙ্গ সাহিত্য বিষয়ে বক্তৃতা; (৬ষ্ঠ) বৃদ্ধ হিন্দুর আশা (An old Hindu's Hope) নামক প্রবন্ধ প্রকাশ; (৭ম) সারধর্মবিষয়ে গ্রন্থ রচনা।

ইহার সকলগুলিরই প্রভাব বঙ্গসমাজে অনুভূত হইয়াছিল; এবং কোন কোনওটির শক্তি বহুদূর ব্যাপ্ত হইয়াছিল। প্রথম, ১৮৬৮ সালে যখন কতিপয় অনুগত শিষ্য কেশবচন্দ্র সেন মহাশয়ের পদধারণ করিয়া ক্রন্দন ও প্রার্থনা করিতে আরম্ভ করেন, এবং তন্নিবন্ধন ব্রাহ্মসমাজের মধ্যেই নরপূজার আন্দোলন উপস্থিত হয়, তখন রাজনারায়ণ বসু মহাশয় স্বাস্থ্যলাভের উদ্দেশে উত্তর পশ্চিমাঞ্চলে বাস করিতেছিলেন। তাঁহার সমক্ষেই পুরোক্ত প্রকার কোনও কোনও আচরণ ঘটে। তাহাতে তিনি (Brahmic Caution, Advice and Help) নামে একখানি পুস্তিকা প্রণয়ন করিয়া তাঁহার

ব্রাহ্মবন্ধুদিগকে সাবধান করেন; এবং ব্রাহ্মসমাজ মধ্যে নর পূজা নিবারণ করিতে প্রবৃত্ত হন।

কিন্তু এই কাণ্ডের মধ্যে তাঁহার হিন্দুধর্মের শ্রেষ্ঠতা বিষয়ক বক্তৃতা লোকের দৃষ্টিকে যেরূপ আকর্ষণ করিয়াছিল এবং যে তরঙ্গ তুলিয়াছিল এরূপ অল্প বক্তৃতার ভাগ্যে দেখা গিয়াছে। এই বক্তৃতা যে কারণে ও যে প্রকারে প্রদত্ত হয় তাহা অগ্রে কিঞ্চিৎ বর্ণন করিয়াছি। ১৮৭১ সালে ১৩ নং কর্ণওয়ালিস স্ট্রীট ভবনে তদানীন্তন ট্রেনিং একাডেমির গৃহে উহা প্রদত্ত হইয়াছিল। নবগোপাল মিত্রের জাতীয় সভা এই বক্তৃতা দেওয়াইবার বিষয়ে প্রধান উত্তোগী ছিল; এবং ভক্তভাজন দেবেন্দ্রনাথ ঠাকুর মহাশয় সভাপতির আসন গ্রহণ করিয়াছিলেন। ব্রাহ্মসমাজের মধ্যে ব্রাহ্মবিবাহ আইনের আন্দোলন উপস্থিত হওয়াতে, এবং কেশব বাবুর দলস্থ ব্রাহ্মগণ তত্পলক্ষে তাঁহার নিকে হিন্দুধর্ম বিশ্বাসী নহেন বলিয়া পরিচয় দেওয়াতে, আদি ব্রাহ্মসমাজের সহিত তাঁহাদের বিবাদ উপস্থিত হয়। রাজনারায়ণ বাবুর বক্তৃতা সেই বিবাদের প্রাতিধ্বনি মাত্র। কিন্তু এই বক্তৃতা এত চিন্তাপূর্ণ, সুবক্তিত্ব-সম্পন্ন ও জাতীয়-ভাবপূর্ণ হইয়াছিল যে, বক্তৃতা হইবামাত্র চারিদিকে ধত্ত ধত্ত রব উঠিয়া গেল। আমার স্বর্গীয় মাতুল দ্বারকানাথ বিদ্যাকৃষ্ণ মহাশয় তাঁহার “সোম-প্রকাশে” লিখিলেন যে হিন্দুধর্ম নিক্রাণোন্মুখ হইতেছিল রাজনারায়ণ বাবু তাহাকে রক্ষা করিলেন; সনাতন ধর্ম রক্ষণী সভার সভাপতি কালীকৃষ্ণ দেব বাহাদুর তাহার অশেষ প্রশংসা করিয়া রাজনারায়ণ বাবুকে হিন্দুকুল-শিরোমণি বলিয়া বরণ করিলেন; কেহ কেহ তাঁহাকে কলির ব্যাস বলিয়া সম্বোধন করিতে লাগিলেন; সুদূর মাদ্রাজ হইতে ধত্ত ধত্ত রব আসিতে লাগিল; এবং ইংলণ্ডে টাইমস্ পত্রিকাতে এই বক্তৃতার সারাংশ ও তাহার অশেষ প্রশংসা বাহির হইল। রাজনারায়ণ বাবু বঙ্গবাসীর চিত্তে অতি উচ্চ স্থান অধিকার করিলেন। কেশব বাবুর পক্ষ হইয়া আমরা কয়েক জন তত্বত্তরে বক্তৃতা করিলাম, কিন্তু সে কথা যেন কাহারও কর্ণে পৌঁছিল না; বরং কেশব বাবুর দলস্থ ব্রাহ্মগণ অহিন্দু বলিয়া হিন্দু-সমাজের অবজ্ঞার তলে পড়িলেন।

১৮৭৫ সালে মহারাজা যতীন্দ্র নোহনের “এমারেল্ড বাউয়ার” নামক উদ্যানে হিন্দু কালোজ ইউনিয়ান নামে হিন্দু কালোজের ভূত-পূর্ব ও তদানীন্তন ছাত্রদের এক সামাজিক সম্মিলন স্থাপিত হয়। রাজনারায়ণ বাবু তাহার প্রধান উত্তোগকর্তা ছিলেন। তিনি এই সভাতে “হিন্দু কালোজের ইতিবৃত্ত”

বিষয়ে এক বজ্জতা করেন, তাহা হইতে আমরা হিন্দুকালেক্সের প্রাচীন ইতিবৃত্তের অনেক কথা প্রাপ্ত হই।

১৮৭৯ সালে তিনি কলিকাতা পরিভাগ করিয়া দেওঘর নামক স্বাস্থ্যকর স্থানে গিয়া বাস করেন। সেখানে গিয়া বার্ককা ও শারীরিক দুর্বলতা সত্ত্বেও দেশের কল্যাণ চিন্তাতে বিমুগ্ধ হন নাই। এখানে অবস্থিতি কালে তিনি “An Old Hindu's Hopes—“একজন প্রাচীন হিন্দুর আশা” নামে ইংরাজীতে একখানি পুস্তিকা প্রচার করেন। তাহাতে স্বদেশবাসীগণকে এক মহাহিন্দু-সমিতি গঠন করিতে অনুরোধ করেন। ঐ গ্রন্থ অনেকের দৃষ্টিকে আকর্ষণ করে। বলিতে গেলে তাহাকে পরবর্তী কংগ্রেসের অথবা মহাধর্ম-মণ্ডল নামক সভার পূর্বাভাস বলা যাইতে পারে। তাহাতে যে স্বদেশ ও স্বজাতি প্রেমের উদ্দীপনা দেখা যায় তাহা অতীব স্পৃহণীয়।

ইহার পরে তিনি ‘তাম্বুলোপহার’ নামে বাঙ্গালাতে একখানি ক্ষুদ্রকায় পুস্তিকা প্রণয়ন করেন; এবং সর্বশেষে সারধর্মের লক্ষণ বিষয়ে ইংরাজীতে এক পুস্তিকা প্রণয়ন করেন। এই পুস্তকে দেখা যায় যে তিনি ধর্ম সম্বন্ধে অতি উচ্চ ও উদার স্থান অধিকার করিয়াছিলেন। আর বস্তুতঃ এই সময়ে তাঁহার নিকটে বসিলে একদিকে তাঁহার ক্ষমতা প্রগাঢ় ভক্তি, অপরদিকে সর্বদেশীয় ও সর্ব কালের সাধু ভক্তগণের প্রতি প্রগাঢ় শ্রদ্ধা, দেখিয়া বিম্বিত হইতে হইত। এক সময়ে তিনি ভারতীয় আধ্যাত্মিকগণের বচন উদ্ধৃত করিয়া তাঁহাদের চরণে নৃত্তিত হইতেছেন; পরক্ষণেই হাফেজের বচনাবলি উদ্ধৃত করিয়া ভক্তিতে গদগদ হইতেছেন; আবার হযরত তংপরফণেই মাদাম গেণ্ডর উক্তি সকল উদ্ধৃত করিয়া প্রেমাত্মক বর্ণন করিতেছেন। তাঁহাকে দেখিলে মনে হইত যেন তিনি ভক্তি-সুধাবনে ভ্রমর-গায়, ফুলে ফুলে মধুপান করাই তাঁহার প্রধান কাজ।

এরূপ অবস্থাতে যাহা স্বাভাবিক তাহাই ঘটিয়াছিল। তিনি সকল শ্রেণীর, সকল সম্প্রদায়ের, মাহুঘের পূজিত হইয়াছিলেন। একবার দেওঘরে তাঁহাকে দেখিতে যাইতেছি, মধুপুরে গাড়ি থাবিলে বৈষ্ণবনাথের পাণ্ডারা উপস্থিত—“মশাই কি বৈষ্ণবনাথে যাবেন?” উত্তর—“হাঁ যাব।” প্রশ্ন—“আপনার পাণ্ডা কে?” উত্তর—“রাজনারায়ণ বসু।” পাণ্ডা হাসিয়া বলিল—“ও ত আমাদের দোসরা বৈষ্ণবনাথ।” তাঁহার শেষ পীড়ার সংবাদ পাইয়া গিয়া দেখি তাঁহার শুশ্রূষার জন্য একজন খ্রীষ্টীয়ান বন্ধু নিযুক্ত আছেন; এবং একজন

হিন্দু সন্ন্যাসী তাঁহাকে দেখিবার জন্ত ও তাঁহার কাছে কয়েক দিন থাকিবার জন্ত বৈজ্ঞান্যের নিকটস্থ তপো পাহাড় হইতে নামিয়া আসিয়াছেন। ইহা কিছুই আশ্চর্য্য নয়, যে তাঁহার সহাধ্যায়ী বন্ধু প্রসিদ্ধ ভূদেব মুখোপাধ্যায় একবার নিজের গলদেশ হইতে উপবীত লইয়া তাঁহার গলে দিয়া বলিয়াছিলেন, “রাজনারায়ণ তুমিই প্রকৃত ব্রাহ্মণ, আমরা তোমার তুলনায় কিছুই নহি।”

এইরূপে সর্বশ্রেণীর, সর্ব সম্প্রদায়ের, সর্বজনের প্রীতি ও শ্রদ্ধায় প্রতিষ্ঠিত থাকিতে থাকিতে ১৮৯৯ সালে পক্ষাঘাত রোগে তিনি গতাস্থ হন। ইনি রামতল্লাহ লাহিড়ী মহাশয়ের একজন সন্মানিত বন্ধু ছিলেন।

আনন্দ মোহন বসু ।

চরিত্রবান মানুষই একটা জাতির প্রধান সম্পত্তি। কোন্ দেশে কত ধন ধাত্ত আছে, তাহা দিয়া সে দেশের মহত্বের বিচার নহে, কিন্তু সে দেশ কত চরিত্রবান, গুণী, জ্ঞানী, মানুষকে জন্ম দিয়াছে, সাহিত্য বিজ্ঞান প্রভৃতিতে কত প্রতিষ্ঠা লাভ করিয়াছে, সদহুষ্ঠানে কত কৃতিত্ব লাভ করিয়াছে, এই সকলের দ্বারা ই সেই মহত্বের বিচার। বঙ্গদেশ যে নব্যভারতে গৌরবান্বিত হইয়াছে তাহা ইহার ধন ধাত্তের জন্ত কখনই নহে। (যে দেশ রামমোহন রায়কে জন্ম দিয়াছে, যাহাতে ঈশ্বরচন্দ্র বিদ্যাসাগরের জন্ম মানুষ দেখা দিয়াছে, যে দেশে দেবেন্দ্র নাথের ধর্মতত্ত্ব, কেশবের বাগ্মিতা, রাজেন্দ্র লালের পাণ্ডিত্য, মহেন্দ্রের সত্যাহুত্যাগ, বঙ্কিমের প্রতিভা, কৃষ্ণদাসের কৃতিত্ব, আরও ছোট বড় কত কত ব্যক্তির মহুয্য প্রকাশ পাইয়াছে, সে দেশ কি লোকচক্ষে বড় না হইয়া যায়!) আনন্দ মোহন বসু, শিক্ষা ও সাধুত্বতে এই গৌরবান্বিত দলের একজন অগ্রণী ব্যক্তি ছিলেন। নব্যবঙ্গের তৃতীয় যুগের নেতৃত্বের মধ্যে তিনি একজন প্রধান পুরুষ। সুতরাং তাঁহার জীবন চরিত্র সংক্ষেপে বর্ণন করিতে যাইতেছি :—

আনন্দমোহন পূর্ববঙ্গের ময়মনসিংহ জেলাস্থিত জয়সিদ্ধি নামক গ্রামে ১৮৪৭ খ্রীষ্টাব্দে জন্ম গ্রহণ করেন। তাঁহার পিতার নাম পদ্মলোচন বসু। পদ্মলোচন ময়মনসিংহ নগরে শেরেস্তাদারী কাজ করিতেন; এবং পদে ও সম্মানে বড় লোক ছিলেন। হরমোহন ও মোহিনী মোহন নামে পদ্মলোচন বসু মহাশয়ের আর দুই পুত্র ছিলেন; হরমোহন সর্বজ্যোষ্ঠ এবং মোহিনী মোহন সর্ব-কনিষ্ঠ, আনন্দমোহন দ্বিতীয়।